


神峯通考

冊上

上海文明書局印行



神峯通考

上海图书馆藏书



A541 212 0015 3435B



~~5022663~~

叙

神峯子曰。天之所賦者命。窮達殀壽。繫諸氣稟之先。雖聖賢大儒。莫能移易。故君子居易以俟命。唯不知命。無以爲君子。然命之理。溯其原則。肇於軒轅氏。始有干支之降。師大撓作甲子。遂以人之年月日時所生。謂之命焉。蓋與天賦之命。其揆一也。但始無書稽攷。至唐袁守成。始作指南五星書。呂才作合婚書。一行禪師作星歷書。五代有輓轡書。前宋有殿駕書。南宋遼金有喬拗書。元有耶律楚材書。裴大猷有琴堂虛實書。均以人之生年五行納音所屬。身命限度爲之主。七曜四餘爲之用。至有明徐均作子平書。專以日干爲主。本月令爲用神。歲時爲輔佐。吁。命書之作。至此盡矣。其故何歟。蓋五星之說。祇以生年爲主。月與日時或遺焉。或以納音爲主。干與支或遺焉。孰若子平之理。獨得其中。日通月氣。歲與時爲脈絡。日爲身主。月爲巢穴。歲與時爲門戶。得於此而不遺於彼。通於上而不遺於下。抑有餘補不足。中正之道。孰外是焉。余涉獵羣書。頗領旨趣。獨觀命理。有五星指南琴堂書。子平淵海書。理出於正。立法之善。但其中間頗有不根之言。進退之說。無確然一

定示人之見。後世緣此立說益多。益滋人惑。雖授受不過襲謬。殆若行者迷道。問盲人指示焉。是以究之窮陬僻壤。盡皆招搖售術。聽其言則是。校其理則非。瞽目盲心。竟無一人能埒其堂陛而撮其樞要也。嗚乎。非惟誣人。實自誣也。予深慨焉。由是究心此道。四十餘年。一旦恍然有得。始覺其理有正途。斷無旁出。爰立五星正說。五星謬說。子平諸格正說。子平諸格謬說。動靜說。蓋頭說。六親說。病藥說。雕枯弱旺損益長生八法說。人命見驗說。蓋取諸尊崇正理。闢諸謬說之意。因名之曰命理正宗。付諸剞劂。以公同好。庶可有補六藝中之萬一云爾。臨川西溪逸叟張楠叙。

# 神峰通考目錄

## 卷一

五星正說類

一安身命宮 一安星辰法 一論限行命宮 一論度主 一論五星諸書

五星謬說類

一呂才合婚 一論八敗諸說 一論進財退財 一女命

男子合婚說

總論子平謬說類

動靜說

蓋頭說

六親說

病藥說類

雕枯旺弱四病說類

損益生長四藥說類

正官格

偏官格

古純雜有制類 近時純雜有制類

古殺爲用神雜官有制例 古官爲用神雜殺有制例 古時偏官雜正官有制例 古時純偏官有制例

時上一位貴格

附官殺去留雜格

## 卷二

月支正財格

附棄從命財格

時上偏財格

附月偏財格

傷官食神格 附傷官十論

印綬格

陽刃格 附比劫建祿格 喜見財官例 古見殺有制例 古會殺為凶例

專祿格

雜氣財官印綬格 附時墓格

金神格

卷三

飛天祿馬格 附倒冲祿馬格

子遙巳格

丑遙巳格

壬騎龍背格

井欄叉格

六乙鼠貴格

六陰朝陽格

刑合格

合祿格

曲直仁壽格

稼穡格

炎上格

潤下格

從革格

年時上官星格

從化格

夾丘拱財格

歲德扶殺格

補歲德扶財格

專財格

日德格

日貴格

魁罡格

六壬趨艮格

六甲趨乾格

勾陳得位格

玄武當權格

財官雙美格

拱祿拱貴二格

日祿歸時格

四位純全格

天元一氣格

三合聚集格

福德格

神趣八法

類象

屬象

從象

化象

照象

返象

鬼象

伏象

論大運

論太歲

論格局生死總歌

五星論

金不換看命繩尺

不換金骨髓歌斷

卷四

十天干體象全編論

十二支咏

總咏

千支所屬

天干合

地支合

地支會局

五行相生

五行相尅

十干祿

五行發用

地支相冲

三刑

六害

十二支中所藏法

論五行生尅制化

吉神類

天乙貴人 天德 月德 學堂 官貴學館 華蓋 將星 驛馬 天赦 福德秀氣 福星貴

人 鸞喜二德解神

凶神類

六甲空亡 喪門 吊客 勾神 絞神 孤神 寡宿 隔角 咸池 返吟 伏吟 元辰 劫

殺 破軍 懸針 平頭 紫暗星 流霞殺 衝天殺 五鬼殺 紅艷殺 吞陷殺 三坵五墓 天



羅地綱 馬前神煞 流年星曜 太白星 斧劈星 孤虛神

起八字訣 年上遁月 日上遁時

看命入式 月令詳評

起大運法 陽男陰女 陰男陽女

子平舉要

江湖摘錦 男命小運定局

女命小運定局 陽順陰逆生旺死絕圖

地支造化圖 天干五陽通變

天干五陰通變 陰陽通變妙訣

定格局訣 子平泛論

十干從化定訣 十段錦

十段化氣 五陰歌

天元一字歌 運晦歌

運通歌 刑尅歌

刑妻歌

尅子歌

帶疾歌

壽元歌

飄蕩歌

女命歌

月建生尅

看命捷歌

正官格歌

七殺格歌

用財歌

印綬

歌 羊刃歌 三奇格歌

太乙妙指法

論諸格有救

取格指訣歌斷

節氣歌斷

萬尙書瓊璣三盤賦

崖泉男命賦

崖泉女命賦

講命捷徑賦

四言獨步

身弱論

棄命從殺論

五言獨步

卷五

喜忌篇

繼善篇

六神篇

渭涇篇

卷六

五行元理消息賦

一行禪師天元賦

絡繹賦

憎愛賦

相心賦

金玉賦

淵源集說

幽微天干賦

地支賦

氣象篇

定真篇

五行生尅賦

捷馳千里馬賦

玄機賦

萬金賦

仙機賦

人鑑論

妖祥賦

人元消息賦

病源賦



# 神峰通考卷一

臨川西溪逸叟神峰張楠著集

## 五星正說類

一安身命宮。原取逢卯安命。逢酉安身。其理何歟。然卯屬東方之正木。木主仁。仁主壽。故以命宮寓焉。酉屬西方之正金。金主義。義主宜。故以身宮寓焉。然命宮爲受胎之初。故以仁木主之。仁有生生之意也。身宮爲受胎之後。故以義主之。義有成身之道也。身命之立。其原於此。理出於正也。

一安星辰法。當以五星指南爲之體。琴堂殿駕爲之用。體可祖之。而爲造命之矜式。用可則之。而爲禍福之根底。若喬拗。若加盤。若步天經。俱以命宮爲祖。如寅亥二宮屬木。畏金尅之。喜水生之。卯戌二宮屬火。辰酉二宮屬金。申巳二宮屬水。子丑二宮屬土。午屬太陽。未屬太陰。生尅之例同前。獨午屬太陽。被木星遮蔽其光。其理頗非近正。然太陽爲萬物之尊。穹窿於萬仞之上。木豈能蔽焉。但喜金水以伴之。其理甚是。未屬太陰。未土計以蝕之。喜火羅金以護之。但諸星生尅。俱當以命宮而論。未可以身宮論之。蓋命在身先也。

一限行於命宮之後。而不從身宮之後何歟。蓋命屬身之先也。受胎之後。卽以命宮爲廬舍。人之禍福。但當究諸命宮。有何恩星。有何難星。如難星守命。主一生孤苦。恩星守命。主一生富貴。如命宮無星辰之可考。當以三合宮看。如

坐寅則看午戌宮也。如三合無則看四正宮。但四正宮頗不近理。如命宮畏金爲難。行限亦畏之。凡諸財帛田宅等宮俱同此也。此係五行生尅正理之說也。

一度主卽以木度所屬。如寅宮立命。纏尾火虎度。卽以水尅火星度爲難星。爲剋度星。卽以木爲恩星。但論度爲準。則又有一說焉。或命宮所喜。或又度主所忌。一喜一忌。將何爲主。然但當以命宮爲主。其理則近。若又以度論之。則惑人心矣。剋度則以張暘谷剋度歌爲則。若日月木火土金水爲正七曜星。若羅星則爲火之奴。計星則爲土之奴。氣星則爲木之奴。孛星則爲水之奴。此爲四餘星。然七曜星命限逢之見禍或淺。四餘星命限逢之見禍或烈。何也。七曜主星屬君子。四餘奴星屬小人。狐假虎威。正理然也。

一五星諸書之立。惟五星指南所立起八字。安身命。安星辰。節氣五行生尅之理。此係看命之門戶。不可無也。其餘則陳諸五行謬說類內。又若五星琴堂殿駕加盤步天經俱屬正理。但五星之說。近正理者頗少。近謬說者頗多也。

### 五星謬說類

夫金木水火土。原天一生水。地二生火。卽以水一火二木三金四土五次第列之。後婁景卽以海中爐中大路林傍之妄說。配其納音五行爲歌。使後人可以成誦。夫何後世妄以海中爐中無理之說。立爲門戶。若三車一覽。望斗真經。耶律經。玉井奧訣。蘭臺妙選等書。俱不祖其生命限度。近理之事爲言。漫以江山水石道風道雨言之。又以人之生年十二支生肖所屬。論人吉凶。夫何謬也。蓋原生肖本以十二禽獸身中各欠一件肖者似也。以十二禽

獸似此也。如鼠欠光。牛欠牙。虎欠項。兔欠唇。龍欠聰。蛇欠足。馬欠膽。羊欠瞳。猴欠脾。雞欠腎。犬欠胃。豬欠筋。皆以十二支所生肖此也。全不關係人之八字干支。妄以此生肖而論命耶。然以人所生之年。地支一字而論。如剋人肉而貼己肉。血氣實不相通。且如今宜黃縣顯宦譚二華命。庚辰甲申丁未丙午。本然八字是身強殺淺。假殺爲權。又曰身強殺淺。行殺旺地。貴封萬戶之侯。其理甚是。舍此正說。謬言其命屬龍。得了未丙午日時。謂之龍奔天河。以龍遇水爲極貴。假如有一貧命。是庚辰甲申癸亥癸亥。亦可以龍歸大海論之。何以極貧。蓋緣此八字水多。以水爲病。再行北方水運。以水濟水。正謂背祿逐馬。守窮途而悽惶也。且如人屬雞狗豬羊。亦有貴人命。請問將何理論之。二者所說俱謬。一五星指南。載破碎吞啗等殺。及小兒雷公金鎖斷橋休庵百日。四柱雞飛等關。祇以生年一字。妄以犯某時某日爲言。又立險語。哭斷腸不過三歲死。及打腦斷橋之說。以驚人之父母。並不以八字干支生尅制化財官論之。且以正理搜尋。尙且禍福不驗。此只把一字以定生死。此實謬說也。

一 呂才作合婚書。豈有是理耶。蓋人之婚姻。由於月老檢書。赤繩繫足。今之擇婚擇命。無過欲盡父母愛子之心。男之擇女也。八字貴看夫子二星。女之擇男也。八字貴得中和之道。夫何以下文男女所帶諸般爲忌。其理甚謬。說見下文。如俗諺云。此是滅蠻經。蓋滅退蠻人。羞與中國爲婚。故將此無理之說。以哄滅之。其理或是。

一 骨髓破鐵掃帚六害。大敗。狼籍。飛天。狼籍。八敗。孤虛。謬說。此說原止是將人十二支所屬生命。浪以月家一字爲犯。豈有是理耶。蓋論人之禍福。當以年月日時四字俱全。更加天干地支所藏配合。論人休咎。尙不可得。而以年月兩字。不與日時相關。斷頭絕脚爲說。不特立諸空言。而且刻諸板籍。妄立險語。以駭人之聽信。後世愚夫愚婦。

遂以爲真。或有斯犯。卽駭而驚。或有高明。知其果於無驗。以破其說。彼亦不信。且言曰。此是神仙留記。若果無驗。安肯刻板。又有登科及第。祇讀儒書。未諳此理。或亦酷信。遂使下愚之人。曰。此上人尙且信之。我何疑焉。一犬吠形。百犬吠聲。又或八字。果係偏枯。太弱太旺。有病無藥。兼帶謬說。愚人且不以八字正理不好爲說。只浪怨帶此謬說之害。又或浪聽愚人諺語。飛天狼籍。是八敗耶。此非君子之言。齊東野人之語也。愚謂此等妄語。刊諸板籍。必須焚其板。火其書。而後可也。

一進財退財。望門守寡。妻多厄。夫多厄。死墓絕妨妻。死墓絕妨夫。斯說之謬。原止以人之生年。金木水火土納音所屬。只論年月。以上一字犯之。嗚呼。豈有是理耶。只論年月。丟下日時。不論年月日時。全備方能論得人之禍福。且進財退財。係乎自己命運所招。安有他人家男女。而能致我之禍福耶。俗說退九年。退十九年。益見此說益妄也。又有金與祿。以馬前一位所犯一字。浪以男人爲忌。其謬之甚。何惑人之甚耶。

一女命禍福淫亂。或以八敗桃花殺爲首忌。八敗則以豬羊犬吠。春三月。蓋以亥未戌生人。見三月生者。遂爲之八敗。並不聯屬日時。並不論其夫子和之道。假如亥未戌三個生人。見此辰月。終不然是他仇家也。亦非天地將此辰月。虧負此三人也。八敗之說。其謬甚矣。又桃花殺之說。曰。寅午戌兔從卯裏出。蓋其立說之意何耶。其寅午戌屬火。火則裸形。沐浴於卯。謂其火在卯上。浴水有裸體之嫌。妄立此名。其謬可知矣。吾嘗屢見富貴夫子兩全老婦。幼帶八敗。父母另將年命改造。適人及至臨終。始告夫子真造。以紀譜券。其夫又無大敗之對。及我嘗將此婦真造視之。果係夫子星秀。理得中和。八敗謬說果然也。又或本然八字偏枯。夫子星虧。又帶八敗。世俗之人。只



謂其帶敗。不知其八字本然不美也。故人擇女之命。但以夫星爲主。子星次之。柱中若有夫星。便以夫星論之。原無夫星。別尋他格。蓋夫貴妻亦貴。夫貧妻亦貧。富貴從夫。其理甚明。何以名其官星爲夫。蓋尅我者。官星也。則身受制於夫。不敢淫亂。不敢妬暴。循規蹈矩。一生仰望而終其身也。若日主有氣。夫星氣弱。又喜夫星生旺之運。及有財神助起其夫。夫畏食神傷官之運。以尅其夫也。若日主弱。夫星太旺。帶有二三重者。此非好夫也。乃戕命之夫也。則喜食神傷官以制之。大運亦然。若制之太過。則又不足。貴得中和。大抵女命有夫。則有子。子則從夫。生無夫。則無子。子從何處覓。愚曾欲覓河準橋黃女爲子婦。閱其八字不美。拒之。是己未丁丑甲寅甲子。愚曰。用丑中辛金爲夫也。嫌未中丁火。鑽入丑中。破去其夫星。再加丁火透出天干。寅中又有丙火進氣。原夫星衰。而制夫星旺也。吾推其運。入寅五月必死。果五月患痘疹而死也。又如淫亂娼婢之說。亦甚有理。蓋或身主太旺。無夫星以制之。或又無財星以爲依托。尤且身主血氣壯旺。無官尅制。無夫管攝。踰於規矩準繩之外。安得不放逸爲淫爲奔乎。非特無夫。又且無子。蓋八字柱中無夫星。則子星何從而生也。又或身主太弱。被其偏官正官三四點。夫星以制之。又無食神傷官以制其夫星。又或財多以撓其身主。雖曰官殺爲夫也。此則非夫星也。乃尅身之賊也。若有此等。必須制夫之運。又若日主無根。官殺太多。或從官星。要行夫星旺處。蓋棄命從殺從夫。如人捨命而從強賊也。亦主富貴有子。但畏見從。苟或日主有根。而惟官殺太旺。又無尅制。多是爲婢爲娼。是不得已而從人也。此等八字。俱係淫亂。或因八字有此身旺身弱之病。而又帶桃花。愚人不言八字偏枯之病。而浪以帶桃花爲名。此等之謬。有智之士。請當細察。

## 男女合婚說

一原出呂才蠻滅之說。只以男女年命浪立數目。配合相成。名曰合婚。妄立天醫福德爲上婚。游魂歸魂爲中婚。五鬼絕命爲下婚。其謬甚矣。安可以以男女二年命。舍去月與日時。而能論人婚配者乎。若是有理。則天下之議婚者。俱擇上中二婚者而配之。擇下婚者而舍之。其書甚易而不難。宜乎天下無失奇之婦。喪偶之男矣。夫何後世又有孤孀之患者。分雖出於宿世之所定。而亦由於議婚者之不明也。然議婚之禮。人道之端。亦不可不慎也。其理當何如耶。但常看男命帶比肩劫財重者。必擇女命帶傷官食神重者配之。若女命帶傷官食神重者。必擇男命帶比肩劫財重者配之。此係合婚之正理。豈可以呂才上中下三婚無根之說。無據之理。而議人之婚配也。耶。呂才說之謬。不足信也明矣。

## 總論子平謬說類

格曰。如珞璣子。專以財官爲主。據其爲說亦謬矣。雖人身以財官爲依據。然財官太旺。日主太弱。則身主不能任其財官。苟日主太旺。財官氣輕。則財官不足身主之理。當以財官日主參看。若子平書云。財官輕。而日主旺。運行財官最爲奇。若財官旺。而日主弱。運行身旺最爲奇。此言至約至當。可爲看命之法則。若珞璣子所言。止要財官生旺。不看日主旺弱。豈不甚謬乎。

一曰貴格。如甲戌庚牛羊。乙巳鼠猴鄉之類也。焉有斯理。雖曰天乙貴人。日主臨此貴人之上。或作日貴論。其休咎。然貴人之說。名有數端。原取名之不據理出。卽與五星小兒。諸多關殺。妄謬之說同。雖曰日主臨之。不論財官印。

星獨以貴人爲主。甚爲虛誕。且原立諸多貴人之說。只是飄空而立。不根理出。豈可信乎。六乙鼠貴格。亦同此例。謬說無疑也。

一日德格。有五。甲寅戊辰丙辰庚辰壬戌日也。何以見其爲德也。不考原委。不詢來歷。誤以日德名之。豈不是子平中之謬說乎。

一魁罡格。取壬辰庚戌庚辰戌。臨四墓之上。取其爲魁罡。能掌大權。並不以理論。何以臨此四墓之上。就能掌握威權。此亦子平書之大謬也。

一六壬趨艮。謂用寅中甲木。能合己土。爲壬之官。謂用寅中丙火。能合辛金。爲壬之印。俱是無中生有之說。吾恐謬也。大抵與前拱祿飛天祿馬之說。相爲表裏。此說尤非。故以謬名之也。

一六甲趨乾。謂亥上乃天之門戶。謂甲日生人臨此。謂之趨乾。假如別日干生臨亥上。何以不謂之趨乾也。然天門亦只好此六甲日主來趨也。然天體至圓。本無門戶可入。然乾乃西北之界。類天之門戶。豈可論人之禍福乎。此說是子平之大謬也。

一勾陳得位。以戊己爲勾陳。其一理也。得位謂其臨財官之地。若戊己身主不柔。則能任財官也。則謂之勾陳得位也。宜矣。若戊己氣弱。臨其財官太旺之地。或爲財多身弱。或爲殺重身輕。若以勾陳得位爲美。豈不謬乎。玄武當權。與此理相同也。

一從革格。謂庚辛日干。見申酉戌全。或巳酉丑全。此多剝雜。原非純粹可觀。與壬癸潤下格理同。此二格吾見多矣。

未曾有富貴者。但當以別理推之。止有曲直稼穡二格多富貴。火全巳午未格。亦未見其美。由是尊其所正。而闢其所謬也。

### 動靜說

何以爲之動也。其體屬陽。陽主動。故天行健。圓轉循環而無端。故以人之八字。天干透露於上者。爲之動也。如八字天干之甲木。但能尅連上天干之戊土也。不能尅巳中所藏之戊土也。蓋以動攻動爲親切。如男人之攻得男人也。不攻閨闈中所藏之女人也。但雖不能攻人。而亦有搖動震驚之意。但不能作實禍也。如女人見男來攻。雖不能加捶楚於其身。而亦有恐懼之意焉。如運中申中地支之庚金。亦不能攻我八字中天干所透之甲木也。是以天干之動。只能攻得天干之動。不能攻地支之靜也。明矣。

何以爲之靜也。其體屬陰。陰主靜。故地承順。方靜守固而有常。故以人之八字。地支隱藏於下者。爲之靜也。如八字地支之庚金。但能尅連上地支之甲木。不能尅連上天干之甲木也。蓋以靜攻靜爲親切。如女人只攻得女人也。不能攻在外之男人也。但雖不能被其攻。亦有搖動震驚之意也。如運上地支之庚金。亦不能破我八字天干之甲木也。是以地支之靜。只能攻得地支之靜。不能攻天干之動也。亦明矣。又如辰戌丑未四地支之物。乃天地四方收藏之庫。極牢固。假如八字地支。辰中有戊土。乙木癸水運。或行寅。寅中雖有甲木。亦不能破其戊。又運行酉。酉中雖有辛金。亦不能破其乙。又或行午。午中雖有己土。亦不能破其癸。非不能破也。蓋其庫中。鎖鑰甚牢。真要戌字運來沖開之。就如有了鎖匙。開了其鎖。而放出戊土乙木癸水出來。如丑字就要未字沖。別物不能攻之。故

曰雜氣財官喜見冲。正此意也。

## 蓋頭說

何以爲之蓋頭也。如人之一身。猶有頭爲一身之端也。頭與面相連。耳目口鼻繫焉。統而言之爲之頭也。其下若四肢肚腹。稍有不善。可以衣服以飾其不善也。若頭之諸物。發見於外。則爲之動物。非若四肢肚腹所藏之物。不足爲輕重也。大抵人之八字。類如此。八字中上四個字是頭也。下地支四字是肚腹四肢也。支中所藏之物。是五臟六腑也。如肚腹秀氣。發出在面頭上來。便是英華發出外來。一生富貴貧賤。只從頭面上見得。如八字畏傷官。這傷官藏在內。尙不足畏。如天干透出此傷官。便是頭面上已見了。怎能掩飾。凡有所害之物。露出頭面。便是動物。就能作害。凡行運如原八字是乙日干。用丙丁火爲傷官。乙日干傷官重者。便以庚金官星爲病。若八字上見了庚金。便要丙丁爲疾病之神。如早年行壬申癸酉運。便是不好運。蓋因壬癸水蓋在申酉頭上。是壬癸水蓋了頭。便不好也。後行甲戌乙亥運。便好了。是甲乙木蓋了頭也。又行丙子丁丑運。又好。蓋得丙丁火蓋了頭。來尅庚也。雖下面地支有亥子丑水。其水被丙丁蓋了頭。亦不能爲害。又如庚辛日干。喜甲乙丙丁四字爲福神。庚辛壬癸四字爲病神。行運望見甲乙丙丁數字。蓋了頭便好。如望見庚辛壬癸數字。便是壞命。雖運上地支有甲乙丙丁。亦被庚辛壬癸蓋壞了頭。此地支雖有甲乙丙丁。亦不能作福。蓋爲庚辛壬癸。蓋在上面。出頭不得。看八字以此。蓋頭字望見了。就識得人一生好歹。此是真傳秘訣也。

## 六親說

年上財官。主祖宗之榮顯。月上官殺。主兄弟之凋零。又曰。年看祖宗興廢事。月推父母定留存。然年屬祖宗之宮。臨財官之地。乃坐祿馬之鄉。榮顯理然也。但坐比肩劫財。無財官之可依據。此乃祖宗凋零也。然父母之宮。又當與歲上之祖宗。月上兄弟兩宮相寓而參看焉。若歲月無財官。俱主根基淺薄。白手成家。獨月令官殺司權。俱主損傷兄弟。雖有兄弟。多主鬩牆。何也。比肩乃兄弟之星。見官殺而尅之。安得不損兄弟乎。故曰。官殺排門兄壽夭。殺官司戶弟郎當。故月乃門戶也。又若日通月氣。比肩神旺。多主鴻雁成行。理雖如是。亦貴變通。苟或日主根多。比肩太旺。亦主參商。蓋緣兄弟多來劫財神也。此又喜官殺而得兄弟也。偏財爲父。比劫重重損父親。正印爲母。財星旺處雖損母。以官殺爲子。傷官食神多損子。若官殺太重。尅制日主。則自身救死不贍。安能生子乎。必須食神傷官。制去官殺。方能生子也。男命如斯。女命亦然。若財官旺而日主弱。夫家興而母家滅。蓋財官乃旺夫之物也。然財能損母。官能尅兄弟。多主父母兄弟凋零。孤鸞曰。木火蛇無壻。蓋乙巳丁巳日也。然乙巳坐下有庚夫。丁巳坐下有庚財。有財能生夫也。不可謂無壻也。女命生此二日。多主旺夫旺子也。金豬豈有郎。辛亥日坐下有正財。財亦能主夫。豈可謂無郎乎。土猴長獨臥。乃戊申日也。坐下有庚金。能尅夫也。女命戊申日。極損夫也。木虎定居孀。甲寅日也。夫星絕於寅也。甲寅日。女命極尅夫也。又女命食神傷官多。泄損精神。不能生子也。又喜印星損其子。養其精。方能生子也。若食神傷官少。而又嫌印星。能損其食神傷官之子也。若辰戌丑未四字全。此坐天地之四獄也。又安能生子乎。若止犯二字。亦不畏也。若夫子星入墓。亦難爲夫子也。男女二命。俱不可犯。妻星夫星子星而論之。但只看八字有病能去其病。則有妻有夫有子也。論六親只是死格。說見上文五星謬說內。

## 病藥說類

何以爲之病。原八字中原有所害之神也。何以爲之藥。如八字原有所害之字。而得一字以去之之謂也。如朱子所謂各因其病而藥之也。故書云。有病方爲貴。無傷不是奇。格中如去病。財祿兩相隨。命書萬卷。此四句爲之括要。蓋人之造化。雖貴中和。若一一於中和。則安得探其消息。而論其休咎也。若今之至富至貴之人。必先勞其筋骨。餓其體膚。空乏其身。然後動心忍性。增益其所不能。人命之妙。其猶此乎。愚嘗先未諳病藥之說。屢以中和而究人之造化。十無一二有驗。又以財官爲論。亦俱無歸趣。後始得悟病藥之旨。再以財官中和參看。則嘗八九而得其造化所以然之妙矣。何以言之。假如人八字中。四柱純土。水日干則爲殺重身輕。如金日干。則爲土厚埋金。火日干則晦火無光。水日干則爲財多身弱。土日干則爲比肩太重。是則土爲諸格之病。俱喜木爲醫藥。以去其病也。如用財見比肩爲病。喜官殺爲藥也。如用食神傷官。以印爲病。喜財爲藥也。或本身病重而藥少。或本身病輕而藥重。又宜行運。以取其中和。若病重而得藥。大富大貴之人也。病輕而得藥。略富略貴之人也。無病而無藥。不富不貴之人也。究人之命。將何以探其玄妙。如八字中先看了日干。次看了月令。且如月令中支中所屬是火。先看月令中此一火字起。又看年上或有火。又看月時上或有火。宜將以上各火。做一處看。或爲病。或非病。又或地支雖又藏有別物。且不必看。若再看別物。則混雜不明。故曰從重者論。此理是看命下手法處。若以火論。又再看水看金看土。則不知命理之要也。若財官印綬有病。就要醫其財官印綬也。如身主有病。就要醫身主也。如八字純然不旺不弱。原財官印俱無損傷。日干之氣。又得中和。並無起發可觀。此是平常人也。然病藥之說。此是第

一家緊要。售斯術者不可不精察也。詳見見驗類。

### 雕枯旺弱四病說類

何以爲之雕也。如玉雖至寶也。而貴有雕琢之功。金雖至寶也。而貴有煅煉之力。苟玉之不琢。雖曰荆山之美。則爲無用之玉也。金之不煉。雖曰麗水之良。則爲無用之金也。人之八字。大概類此。如見官星未會有傷官。見財星未會有比劫。見印綬未會有財星。見食神傷官未會見印綬。若此純然無雜。不猶未琢之玉。未煉之金乎。大抵天之所生人也。盈虛消長之機。未嘗不寓焉。若四時之有生長也。必有春夏焉。若四時之有收藏也。必有秋冬焉。又如地理有龍穴砂水之美。而來脈又貴有蜂腰鶴膝斷續之妙焉。人之造化。窮通壽夭之理。亦貴宜有去留舒配。以取用焉。是以八字貴有雕也。

何以爲之枯也。風霜之木。春華之至。可觀焉。旱魃之苗。得雨之機。難遏焉。故冲霄之羽。健貴在三年之不飛。驚人之聲。雄貴在三年之不鳴。是以清涼之候。恒伸於炎烈之餘。和煦之時。每收於苦寒之後。故人之造化。官貴有枯也。行官旺地。貴不可言。財貴有枯也。行財旺鄉。財難計數。然又當喜其有根在苗先。實從花後。但貴其有根而枯也。不貴其有苗而枯也。苟若官星無根。則官從何出。財星無根。財從何生。是以財官印綬。貴有根而枯之病也。或者無根而自爲之枯焉。則亦非矣。是以八字貴有根枯之病也。

何以爲之旺也。羣芳茁長。可觀真木之光輝。萬物凋零。可識真金之肅殺。是以各全其質。各具其形。若木不木而金不金。旺不旺而弱不弱。則五行之質有虧矣。何以考人禍福也哉。若人之用木也。則宜類聚。斯木性之不雜。若人



之用火也。則宜照應。斯火性之不裂。若春林木旺。見水多益壯其神。夏月火炎。見木多愈資其烈。由此區別。則知其所以旺者。當何如耶。然或官星太旺者。宜行傷官運。以去其官星。財星太旺者。宜行比劫運。以去財星。印星太旺者。宜行財星運。以破其印星。日干太旺者。宜行官殺運。以制其日主。一理如是。百理皆然。若其旺弱之相參。斯其下矣。是以八字貴有旺之病也。

何以爲之弱也。雨露不足。則物性爲之消磨。血氣不充。人身爲之羸瘦。天根可躡。六陽之弱可聞乎。月窟可探。六陰之弱可究也。是以六陽之弱。不至於終弱。而有臨泰之可乘。六陰之弱。不至於終弱。而有遯比之可托。猶人之命。弱不弱而旺不旺。則何以稽其禍福哉。然雖貴有弱也。則猶恐極弱之無根。故水雖至已爲極弱。然已有庚金爲水根也。火雖至亥爲極弱也。然亥有甲木爲火之根也。人之造化。財官印綬。貴有弱也。弱則有旺之基焉。若官星太弱。宜行官旺之鄉。財星太弱。宜行財旺之地。日主太弱。宜行身旺之地。然猶畏弱之無根。所謂根在苗先也。弱而有根。則官星雖弱而可致其旺。財星雖弱而可致其強。是以八字貴有弱之病也。

### 損益生長四藥說類

何以謂之損。損者。損其有餘也。然木生震位。正木氣之當權也。金產兌宮。正金神之得位。當權者不宜資助。得位者不必生扶。假或水又滋土。土或培金。若木有餘之病。用金以制之。金氣有餘之病。用火以尅之。官星之氣有餘。則損其官星。財星之氣有餘。則損其財星。譬如人身元氣太旺爲疾。當以涼劑通藥以濟之也。是以八字貴有損之藥也。

何以謂之益。益者。益其不及也。若木之死於午。若水之死於卯也。不及則宜資助。且如木氣之本衰。庚辛又來尅木也。水氣之本衰。戊己土又來尅水也。則水木不及之病。在此矣。益之之理。又當何如耶。若木之不及。或行水運以滋其根本。或行木運以茂其枝葉。若水之不及。或行金運以浚其源流。或行水運以廣其潏潏。若官星之氣不足。則喜官旺之鄉。財星之氣不足。則喜行財旺之地。譬如人身血氣之不足。則用溫藥之劑以補之也。是以八字貴有益之藥也。

何以謂之生也。六陽生處。眞爲生也。如甲木生亥。亥有壬水來滋甲木也。六陰生處。俱爲弱。如乙木生於午也。午有丁火泄木之精英。有己土爲乙木之撓屈。又如六陰死處俱爲生。如乙木死於亥。亥有壬水反來滋木也。六陽死處眞爲死。如甲木死於午。且午中有丁火泄木眞精。己土爲之撓屈。且如生之理。形氣始分。赤子未離於襁褓。精華初判。嬰兒初脫於胞胎。如木之生於亥。根氣猶枯也。未可以木爲旺也。如火之生於寅。氣焰猶寒也。未可以火爲旺也。又或財官印臨於生地。未可以財官印爲旺也。凡氣之不足。故貴濟之有生之藥也。

何以謂之長也。春蠶作繭。木氣方敷。夏熱成爐。炎光始著。如木臨震位。火到離宮。若此帝旺之鄉。實不同於生長之位。是以生者長之初。長者生之繼也。如財官屬木。則長養在寅卯辰之方。此木氣方敷也。如是則貴行金運以尅之。則與長生之木理不同也。如財官屬火。火則長養在巳午未方。此火氣之方熾也。如是則貴行水運以尅之。則與長生之火理不同也。是以生長二字。衰旺之不同。故運行有喜生喜尅之異。是以八字貴有長之之藥也。以上諸格。楠於合理者取之。背理者闕之矣。以後各格。楠所未及者。附陳於後。以備參考。

# 正官格

楠曰。正官者。何以言之。蓋以陽見陰。陰見陽。故曰一陰一陽之謂道。如人之一夫一婦之有配對也。何以謂之官。蓋官者管也。如人焉。必須官管。然後循規蹈矩。居仁由義。不敢放逸爲非。故爲制我身主之官也。然月令提綱之官。若我之本府太守。本縣之令尹也。但當服其管。則豈能用之。故凡月上官星。世無用官之理。如此將何取用。但或止有官星一點。日主又旺。則官星輕而日主弱。運行官旺最爲奇。譬如府縣官。是我之主也。今主人弱也。當以財生之。行官運以助之。若行印運。則又泄弱官星之氣。若官星犯重。日主根弱。尅制日主太重。則不曰官星。而曰七殺也。七殺尅身。則喜傷官食神。以制其官殺也。大抵用月上官星。要官旺。官旺方好取用。要官星有病。各因病而藥之。官旺官多。喜食神以制去之。官星氣弱。喜財神以生之。官旺之運以助之。若日主官星二者。純和無病。俱是平常人也。若歲日時上虛官。用之十有九貴。然官爲扶身之本。夫人非官。則放於禮法之外。故官星不宜破損。而亦不可用也。惟官星太弱太旺。方爲有病。因其病而藥之。斯可作爲用神。而論禍福也。

繼善篇云。有官有印無破。作廊廟之材。

楠曰。舊註謂有官有印。乃雜氣所藏官印也。牽強不可從。或曰。有官有印。蓋言人命中有官星印綬雙全者。更無刑冲破害之物。破傷官印貴氣之物。則官生印。印生身。其人必是廊廟棟梁之大材。此說可從。蓋乙生辛。辛中丁生亥。月己生寅。月辛癸生巳。月皆官印兩全。何必拘拘於雜氣兩全乎。況雜氣喜冲破。謂之無冲可乎。古歌云。正氣官星月上推。無冲無破始爲奇。中年歲運來相助。將相公侯總可爲。

補曰。正氣官星。謂陽見陰。陰見陽。如六甲日生酉月。六乙日生申巳月。六丙日生子月。六丁日生亥月之類。乃月正官也。柱中無冲刑破害。功名顯達。始爲奇特。下文云。登科甲第。官星臨無破之宮是也。中年歲運遇財星印綬。身旺之助。更無刑傷殺雜。則台閣可登。古歌云。官印相生臨歲運。玉堂金馬作朝臣是也。

司馬季主云。真官時遇。早登金紫之封。

補曰。真官時遇。謂真正官星。遇於生時。正淵源所謂時上正官格是也。必早得腰金衣紫之貴。解時作月令之時。非生時之時。又於時正官格。刪而去之。則非也。若以此時遇爲月令之時。則喜忌篇云。偏官時遇。造微論之時遇。官星生旺位。亦可謂月令之時乎。牽強不可從。

張都憲造 辛未 乙未 丁未 辛亥

亥中壬水爲丁火正官。則真官爲生時之遇也。有准矣。

通明賦云。祿得天時。奇花生於金帶。

補曰。祿得天時。乃時干得正官。而且見其言之祿。必有奇花金帶之榮貴。與上文大同而小異。解謂祿馬爲官。則是爲天時。即天干。則泛而不切。曰天干。則年月亦在其中矣。於時干。則隱而晦矣。

都御史造 癸未 乙卯 丙子 癸巳

此造時干以癸水爲官。而建祿於子。官印相生。則天時爲時干。不可泛言天干也明矣。

甲午

壬生丑月水源深。

丁丑 宜黃縣劉景八公 楠 疊疊財官共拱臨。

壬辰 富命生生不已格 曰 水入巽宮尋貴格。

乙巳 陶朱之富異乎人。

壬水生臨丑月。水寓根源。四柱財官七殺太旺。此造本難尋究。蓋得巳時。水入巽宮。合起金局。蓋壬水能生甲乙木也。甲乙木來生丙丁火也。丙丁火來生戊己土也。戊己土來生庚辛金也。庚辛金來生壬癸水也。且四柱純粹。並無間隔。上下相親。正作生生不已格看。所以行東南西北俱美。宜邑第一富人也。壽高五福。蓋得時上有庚金印星也。

癸卯 乙木逢庚便作夫。

甲子 富夫女尅 楠 傷庚丙火氣盈餘。

乙巳 制夫星格 曰 火神未上重相見。

癸未 見火傷庚壽必殞。

乙木生於子月。用巳中庚金為夫星。則夫星得生於巳也。所以富出紅樓。原日主不弱。能任夫星。不合遇入丙寅。夫星尅制重重。患瘵死也明矣。

辛丑 夫星子宿兩星明。

乙未 貧天女見 楠 最是誇苗實不成。

戊戌 夫受制格 曰 枯木不堪金過尅。

庚申

早行金運壽先傾。

戊生未月。乙木夫星透出。庚金子星透出。俗儒推其夫明子秀。不知乙木被金破之。未中乙木。被丑中辛金破之。夫星受制太過。雖有庚金子星。夫星既制。子安可生乎。大運入酉。乙木損重。自縊死矣。

壬戌

夫明子秀透天干。

辛亥

貴而早寡

楠

運入西方福自完。

甲子

金輕火重

曰

最恨南方金受制。

丙寅

不堪鏡破舞孤鸞。

甲木生亥月。夫子星透天干。日主有根。樂堪任矣。夫何夫星頗弱。運入西方夫星生旺之地。夫登科甲。官至御史。運入南方。火制辛夫太過。入未夫死而孀居也。丙午火氣盈甚。帶疾而終驗也。

丁巳

丁逢戊土太重。

戊申

天女官

楠

壬水重遭剋制凶。

丁巳

輕制重

曰

戊運不宜重見土。

乙巳

中間早已失行蹤。

丁火以壬水為夫也。夫何戊土四重。剋制太過。雖已有庚金。亦不能生之。大運入戌。又見戊土。一勺之水。豈勝衆土之攻乎。患癱疾而死。蓋為丁火身衰。見土泄弱精英也。

丁酉

殺星得制獨留官

壬寅

貴女命去

楠

官殺相停兩得安

辛巳

殺留官格

曰

最喜南方官旺地

丙申

時師莫作等閑看

辛金生寅。本畏丁火為殺。得丁壬化之。更畏丙火官星太重。喜有申中壬水。冲去月上丙火。獨存時日丙火為夫星。原夫星氣弱。喜行甲乙丙丁。旺夫之地。夫作廉使。其貴宜矣。

甲辰

癸生戌月土重重

甲戌

孤天女土

楠

甲制干頭返有功

癸未

重木輕格

曰

大運不宜重見土

壬戌

再行土運壽年終

癸水生戌。夫何年月日時俱有土旺。水強進氣。亦不能勝衆土也。早行壬癸。水滋木旺尅土。母夫家富。但四庫太多。生子不育。運入未字。土神太重。嘔血而死。

丙午

甲木逢辛本作夫

辛丑

貧女命木

楠

庚辛夫旺木神枯

甲戌

少金多格

曰

豈宜再入西方運

己巳

孤苦貧寒壽早孤。

甲戌日主。四柱官殺太盛。本以官星為夫也。夫星太旺。變為尅身之殺也。運入西方。官殺重見。尅子夫淫賤。為身不由己。而從人也。運入申運。殺重死矣。世人不知。謬以八敗而責其不美。殊不知八字本然不美也。

癸丑

戊土分明賴木扶。

己未

貧天女命

楠

木星入庫兩樸糊。

戊辰

夫輕制重

曰

不堪再入西方運。

庚申

貧天應知賦稟枯。

戊土生未。夫星入墓。再加丑字冲之。辰中雖亦有乙木。庚申金貼克牛山之木。安得為美乎。運入西方。綠窗貧女。夫出遠遊。入酉會金。損傷乙木夫星。服藥而死。宜矣。

庚午

己生寅月正初旬。

戊寅

先富後孤貧

楠

木嫩逢金太損神。

己酉

夫弱被制格

曰

運早北方夫子秀。

甲子

西方運入受孤貧。

己生寅月。甲木夫星得祿。豈不美乎。夫何生在立春後一二日。甲木柔嫩。年上庚金露出。酉中又有辛金。其木極衰矣。早行丙子乙亥甲運。衰夫得比得生。旺夫生子。富足金珠。一入西方運。夫星受制。夫子俱死。而孤貧也。



丁巳

乙逢庚旺旺夫星。

丁未

布政妻命

楠

火重傷金理自明。

乙未

火重金輕

曰

自信柱中夫子秀。

庚辰

重重封贈豈常人。

乙未月。夫子兩星明透。且日主有根。則夫子兩星能任矣。運入西方。相夫相子。俱登雲路。運入北方。見水破火。存夫享受褒封。其理然也。

### 偏官格

附棄命從殺格

楠曰。偏官爲陽見陽。陰見陰。原非陰陽配合。更得食神傷官。以制去其凶銳。雖先爲尅我之凶神。今則馴致其凶。而反爲我之奴僕也。用偏官。如人之畜奴僕。擒制太過。則爲盡法無民。則奴僕力衰。不能爲我運動。若擒制之不及。則奴欺主矣。偏官卽七殺也。如甲日干。數至第七個字逢庚字。號爲七殺。乃尅身之刀劍一般。偏官無制。曰七殺。故宜制伏。亦畏太過。亦畏不及。凡看命先看七殺。若有七殺。就要將此七殺處置了。方能用得別物。若不能制去。其七殺。則殺星能害我性命。譬如人雖有金銀田產。無性命。此實爲閑物。原書云。有殺須論殺。無殺方論用。蓋先人立有此言。特未分明顯說。故使學者心上模糊。但殺是勢惡權貴。奸邪小人之象。故用殺得宜。多主顯耀。宦臣相類。與其媚於奧。不若媚於竈之意也。月上逢官者。無可用之理。但能管束我之身。安肯爲我用也。但或官星衰。則生之。官星太旺。則尅之。取此以定禍福。吾亦未見用月上官星是貴命。只見用殺星。多富貴人也。子平書俱涵。

蓄說隱而不發其真理。故殺者。殺我也。是殺身之對手。官者管我也。是制身之繩法。此造化之正理。不可不知也。又曰。棄命從殺格。緣日主全無一點生氣。四柱純然有官殺。則不得已而只得從殺也。譬如遇強盜。本身無主。只得捨命而從之。就要有財。生起其殺。行財殺運。以生助其殺也。畏見八字有根處。及制殺運。猶如從盜。又思歸父母兄弟之鄉。則盜放汝乎。又如從盜。就要助起其盜。若又尅害之。則盜必惡汝。此格出正理。甚有驗也。但六陰日干。有從之之理。如婦人屬陰。亦有從人之道。若六陽日干。見殺多。只或作殺重身輕看。若日主全無氣。亦作棄命看。亦畏見根死。

喜忌篇云。五行遇月支偏官。歲時中亦宜制伏。類有去官留殺。亦有去殺留官。四柱純雜有制。定居一品之尊。略見一位正官。官殺混雜反賤。

補曰。四柱純雜有制。蓋言四柱中純殺無官。有食神制伏得宜。定居一品之尊。上文所謂五行遇月支偏官。歲時中亦宜制伏之謂也。若殺爲用神。雜以正官。有傷官尅制。或官爲用神。雜以七殺。有食神制伏。亦定居一品之尊。上文類有去官留殺。亦有去殺留官之謂也。略見一位正官。官殺混雜反賤。是無制伏。無去留之謂也。或者改純雜有制。爲純殺有制。誤矣。

## 古純雜有制類

岳總領造 癸卯 丁巳 壬寅 甲辰

趙侍郎造 丙午 丙申 甲寅 丁卯

劉八門司造 甲申 乙亥 丙戌 庚寅

周伯蘊右丞相造 戊戌 甲子 丁未 庚戌

### 近時純雜有制類

毛价川尙書造 甲寅 庚子 丁巳 戊辰

### 古殺爲用神雜官有制例

帖木丞相造 戊申 辛酉 乙巳 丙子

李御帶造 戊子 丁丑 丁未 辛亥

黃狀元造 壬子 甲辰 己卯 壬申

何參政造 丙寅 戊戌 壬戌 辛丑

雖不一品。亦合官星七殺交差。却以合殺爲貴。

郎中造 丙子 甲午 辛亥 辛卯

雖不富。亦合殺有去留而貴。

### 古官爲用神雜殺有制例

脫脫太師造 甲寅 己巳 癸酉 丁巳

葉丞相造 壬寅 壬寅 己卯 壬申

陳寺丞造 乙酉 辛巳 辛未 戊子

古官煞混雜例 癸亥 癸亥 丙午 壬辰

### 古時偏官雜正官有制例

史衛王彌遠造 甲申 丙寅 乙卯 辛巳

右丞相造 己亥 癸酉 庚午 丙戌

三寶奴丞相造 庚午 辛巳 甲申 壬甲

### 古時純偏官有制例

鄭尙書造 庚寅 壬午 戊寅 甲寅

朱尙書造 庚辰 丙戌 戊戌 甲寅

范尙書造 辛巳 辛丑 乙卯 丁亥

格解。又分五行遇月支偏官。歲時中亦宜制伏爲一節。分四柱純雜有制。定居一品之尊。略見一位正官。官殺混雜。反賤爲一節。至於中間類有去官留殺。亦有去殺留官二句。乃刪之而不用。俱屬可疑。

喜忌篇云。四柱殺旺運純。身旺爲官清貴。

舊註云。此七殺卽偏官也。且如甲忌庚爲七殺。而甲生於寅地。乃身旺。其中暗包丙長生。則不畏金爲殺。以殺化爲偏官。則甲庚各自恃旺之勢。而行純殺之運。乃爲極品之貴。此說似牽強。蓋身殺或強。而或制伏得宜。固多權。

貴者使柱中殺旺身強無制。又行純殺無制之運。乃爲極品之貴。恐不可從。或者又解爲身旺殺旺。身殺居長生。臨官帝旺之鄉。及通月氣者是也。運純謂中和之道。制殺化殺之運是也。清貴者。清高而貴顯。繡衣黃門是也。蓋四柱中七殺日主俱旺。無食神制殺。運入制伏之地。則爲清高而貴顯也。此說可從。

喜忌篇云。柱中七殺全彰。身旺極貧。

舊註解曰。傷官本祿之七殺。敗財本馬之七殺。偏官本身之七殺。四柱有之。身旺建祿不爲富矣。此誠確論。可從。蓋建祿身旺之人。喜見財官。所謂一見財官。自然成福是已。忌見七殺反傷。所謂切忌會殺爲凶是已。若柱中有傷官。則官祿之七殺彰矣。有敗財。則財馬之七殺彰矣。有七殺偏官。則身之七殺彰矣。此所以爲全彰。雖見祿身旺。貧不自聊者。故曰身旺極貧。或曰。此乃純殺格怕身弱也。蓋言人命四柱中七殺之神全彰著。又身弱者。乃極貧窮夭壽之人也。乃又爲身弱極貧無壽。噫。以此解殺重身輕。終身有損可也。以此解非夭。卽貧定是身衰遇鬼可也。解此節則鑿之甚矣。

繼善篇云。庚值寅而遇丙。主旺無危。

補曰。庚日值寅。坐休絕之地。而柱中又遇丙。似乎衰而有危。然寅中戊土長生。能生庚金。以泄丙火之氣。乃絕處逢生。名曰胎元受氣。又名小長生。人命逢之。主一生造化。衣祿興旺而無危。非言日主之旺也。下文云金逢艮而遇土。號曰還魂。或者以庚寅日爲主旺不通。遂以庚值寅而爲庚值申。以迎合主旺爲日主之旺。非經本義。不可從。

古歌云。絕處逢生少人知。却去當生命理推。返本還原宜細辨。忽然迤否莫猜疑。  
又歌云。或云胎養小長生。人命惟逢自積靈。若也修文應稱遂。不然榮運亦光亨。  
古歌云。偏官如虎怕冲多。運旺身強豈奈何。身弱虎強成禍害。身強制伏貴中和。

補曰。月上偏官。謂陽見陽。陰見陰。如甲生申月。乙生酉月。是已爲人剛暴好殺。觸之卽怒。性情如虎。最怕三刑六害。或羊刃罡魁相冲。必有凶禍。最喜運皆旺相。身強有制。化爲權貴。若身弱殺強。無制之運。則虎加翼者也。其咆哮之威不可禦。反爲所噬。然偏官固宜制伏。亦貴中和。如一位偏官。制伏有二三。復行制伏之運。反不作福。何以言之。蓋盡法無民。可釋思也。

又歌曰。偏官不可例言凶。有制還他衣祿豐。干上食神支又合。兒孫滿眼福無窮。

解曰。偏官卽尅我之神。本爲惡宿凶殺。然不可例言凶也。須要制伏。有制化之權要。則衣祿不期豐而自豐。天干有食神。如甲見丙。地支有食神。如卯中乙木合申中庚金之類。則子孫振振。有無窮之福矣。所謂七殺有制亦多兒是已。

又歌曰。偏官有制化爲權。英俊文章發少年。歲運若行身旺地。功名大用福雙全。

解曰。偏官之格。雖爲人凶暴無忌。憚然無制。則爲七殺。有制則爲偏官。卽化爲權貴。少年穩步青雲。早歲題名黃榜。必是文章顯赫之人。故曰英俊文章發少年。殺強有制。故曰美矣。若運衰弱。欲其大用也難矣。若歲運又無制。則聲名特達遍朝野。所謂從殺多是大富大貴之人。所謂平生爲富貴。只因殺重身柔。此等格局。但多天耳。若連

扶身旺與殺爲敵。或七殺透露。食神破局。皆不吉。

古歌云。五陽坐日全逢殺。棄命相逢命不堅。如見五陰臨此地。殺星根敗吉難言。

補曰。舊文末句。本謂殺星之根敗而無氣。身無所從。則禍卽至。而爲吉難言。或者改根敗爲臨敗。非也。又一說。改殺星而爲殺強。以根敗而爲日主之根敗。亦非也。格解謂殺強根敗。吉難言。但非棄命從殺之意。蓋從殺者。正不嫌於殺強根敗耳。誠是。但未知其根敗。非日主之根敗。識者詳之。

又歌云。土臨卯位三合全。不忌當生金水纏。火木旺鄉名利顯。再逢坤坎禍連綿。

補曰。舊文第二句。原是不忌當生金水纏。而或者改爲不見。與末句再逢字不相應。仍當作不忌看。蓋土臨卯位。謂己卯日主。亥卯未三合殺局。謂從殺亦可。當生金水。俱有謂金生水。水生殺。亦不忌。或行火木旺運。殺印相生。功名顯達。再行坤坎金水之運。必禍連。蓋當生既逢金制。而運又逢之。必禍連綿不已。所謂食神破局。反不吉。是已。又一說。末句舊文。原是福連綿。而或改爲禍連綿。亦非。蓋己卯日主。逢亥卯未三合。是謂殺強身弱。當生金水。相纏。水固生殺。而金能制殺。故不忌。及卯行身旺之地。則廊廟之客。金紫之貴。所必至矣。故曰功名大用福雙全。又歌曰。煞星原有制神降。制旺身強貴必昌。若見制神先有損。反將富貴變災殃。

解曰。煞星者。七殺偏官也。制神者。食神也。使月上逢七殺。而有食神降制得宜。又身居強旺之地。則富貴榮昌必矣。若食神逢梟。則食神先自損矣。不惟失其富貴。且有災殃。所謂食神制殺逢梟。不貧則夭是也。玄機賦云。身強殺淺。殺運無妨。殺重身強。制鄉爲福。

解曰。身居強旺而殺淺者。強行殺旺無制之運。亦無妨害。所謂原犯鬼輕。制却為非是也。七殺太重而身弱者。雖行制伏得宜之鄉。方可發福。所謂一見制伏却為貴是已。

天玄賦云。殺星重而行殺旺。運早赴幽冥之客。

補曰。身弱殺重。宜行制伏之運。則為福為壽。而又行殺旺之鄉。必至於天壽而死。故云。

定真篇云。七殺無制。逢官祿為禍。而壽元不久。

七殺以有制為貴。若無制伏。又逢正官。且建其官之祿。如甲逢庚無制。又逢辛金官星祿之數。則為官殺混雜。萬

金賦云。官殺混雜。常壽夭。

幽玄賦云。身太柔。殺太重。聲名遍野。

身勢太柔。略無一點根氣。七殺太重。而滿盤重重。三合火木旺鄉。木生火。火生土。殺印相生。功名著。再逢申坎金水之運。福自連綿。蓋當生雖有金水。而制伏尚不及。必再逢金水。方為制伏得宜。常享福於不替也。

丙戌 重重土厚去埋金

戊戌 進賢朱廷升尙書 楠 官殺那堪泄氣深

辛未 貴命土厚埋金格 曰 最喜運行財旺地

壬辰 聲華不日振儒林

辛未日干。身坐土位。年月日時俱有土旺。正謂金賴土生。土厚而金遭埋沒。初行北方庚子辛丑運。金土氣盈。塞滯



不利。後行東方寅卯甲乙運。破土而生官殺。位登臺閣。

庚子 見殺雖當論殺星。

己卯 嚴介溪閣老貴。楠 殺衰誰養殺精神。

癸酉 命去食存殺格。曰 不堪卯木為真病。

辛酉 時有辛金去病人。

癸水生卯。己土殺星。天干透出。是以有殺只論殺。蓋喜殺衰。要嫌地支兩重乙木。暗來尅殺。作七殺制伏太過。則為重病。蓋得辛酉時。冲去卯木為藥也。早行南方。衰殺得地。擢登科甲。運入西方金運。制去病神。位登宰相。名顯天下。貴而且壽。直入亥運。會起木來損殺。膏肓之疾復作。忽生奇禍而死。

丙子 丁生子月水汪洋。

庚子 肝江格。溪劉翰十。楠 七殺雖多喜內藏。

丁丑 六公水重土輕格。曰 幸得丑中微土制。

辛亥 南方土運發非常。

丁火生於子月。七殺極旺矣。再加年日時中。俱有水氣來尅丁火。但水雖多。喜靜伏於地支。其凶未逞於天干。若原殺逞天干。主早年夭也。壬寅癸丑甲辰運。雖是東方。亦嫌壬癸水蓋頭。雖好亦蹇晦。大運入巳午未。冲去水神。財發萬緡。蓋喜土來尅水也。入申水得長生。壽至八十餘死。

丁丑

庚生寅月火神輕。

壬寅

書坊楊員四公

楠

壬癸重來制伏明。

庚子

富命制殺太過

曰

土木運中人富貴。

乙酉

再行金水禍來併。

庚子日生寅月。年月丁壬作化。生火助殺。用殺明矣。本命三陽之火尙衰。金水寒威猶在。壬癸水透天干。制伏太過。病在此矣。猶喜羊刃存時。丑酉合金得局。身主不弱。又得乙庚存時。化金成旺。早行子丑。丙火氣寒。殺衰不能爲我運動。故多蹇滯。漸行己亥。甲木財神得生。財來生殺。隱隱興隆。一入戊戌。原壬水爲丙火之病神。一見戊土。尅去壬水。淨盡。如鴻毛之遇風。飄然而舉。如枯苗之得雨。勃然而興。財發萬緡。書林出色。豈偶然哉。大運入酉。丙火殺神死地。更且財來生水。水來滅殺。法盡無民。其死也。非偶然也。

癸巳

庚生未月火雖炎。

己未

臨川饒舜臣春元

楠

制殺那堪水火嚴。

庚子

貴命制殺太過格

曰

甲乙丙丁資殺運。

甲申

青雲得路豈能淹。

此格與李閣老制殺之理頗同。但未月二陰。水方進氣。水氣比肩更甚。運行東方。財來生殺。七殺得權。雲路高登。其理宜也。

丙戌 丁生子月水雖寒。

庚子 吾都王仁五公 楠 一殺那堪制兩般。

丁卯 制殺太過富命 曰 己土病神宜卯木。

丙午 東方木運始堪歡。

丁火子月殺星本旺。那堪一殺而有戌午兩土以制之。正謂殺不足而制有餘。賴有日下卯木。破出午中己土。以卯木為福神。東方壬寅癸卯甲乙運。助起木來尅土。財發千緡。一入巳午未鄉。破敗如洗。未運土重。殺墓死矣。

己酉 癸水生辰土氣重。

戊辰 盱江格溪傳佑十五 楠 土生金印助身榮。

癸酉 公富命殺多生印格 曰 不堪丙火為金病。

丙辰 見水名為既濟功。

癸日生辰。本為土重水輕也。官殺雖重。蓋得己土貪生於酉。戊土自坐辰庫。更得辰酉相合。其土見金不來尅身。反去生印。而助身也。遙見時上丙火精欲克酉為病。迨後入丙寅運。金絕於寅。傾家蕩產。片瓦未留。一入北方。見水去火存印。一發如雷。入戌。火土太重死矣。

庚午 壬臨丑月水之垣。

己丑 撫城過桓文生 楠 殺重官多也作愆。

壬辰 員土重水輕格 曰 制殺喜看時有甲。

甲辰 棘闌之陣幾乎先。

壬辰日生丑月。壬水之氣有寓焉。但四柱有土。官殺之氣盛。水氣輕也。喜時上甲木進氣制殺。本為登科之命。但不合年上。有庚壞甲。故此未遂。運行寅卯壬運。木神生旺。屢戰秋闈。大運入辰丙午流年。戊土殺得地。殺旺攻身而死。

甲午 壬臨丑月殺星多。

丁丑 宜黃縣住廩牽豬 楠 印破難生受折磨。

壬辰 枯貧命殺重身輕 曰 再看運行財殺地。

甲辰 一生勞碌受奔波。

壬水雖生丑月。蓋因財殺太多。雖丑中有一點辛金。蓋緣不會會局。月有丁火。貼身暗破辛金壞印。作不得殺化印生。只作殺重身輕。運行東方木神制殺。衣食頗給。再行南方殺旺運。身雖不死。亦住廩牽豬牯度活。入未殺重而死。

壬辰 辛生未月火乘權。

丁未 臨川劉覺吾貴 楠 時殺重逢一氣全。

辛丑 命火重水輕格 曰 制殺水輕宜水運。

甲午 官居樞要掌銓衡。

辛金生於未月。伏制猶炎。喜年上丁壬合殺為貴。月中雖有丁火。丑中癸水去之。止用時上一位貴格。然火氣旺而

水氣輕。原雖有壬癸之水。且四柱土重。亦能去水也。所以運入亥位。擢顯官。其理然也。

壬辰

兩火那堪六水傷

丁未

水重火

楠

殺星制過害非常

辛丑

輕之格

曰

再行水運生難獲

壬辰

死敗徒流禍幾場

辛金生未。本是火炎之域。夫何止有二火為殺。水制之。此為七殺制過。盡法無民。可不畏哉。與前貴造天淵之隔。理則然也。前則有甲午時。多一重木火之氣。則火重水輕。所以宜行北方。此則水重火輕。則畏行北方。此命一入亥運。問遼東三萬里衝軍。壬水年水又旺。非命而死也。

甲寅

辛金坐未殺星多

辛未

臨川周半峯

楠

丁火傷辛苦太過

辛未

火多為病格

曰

運喜北方能去殺

丁酉

最宜水火制中和

辛生未月。丁火過多。運入北方子運。濫知命術。而得冠帶。自且不知。吾以水濟火炎之理告之。方諳斯理。吾以寅運火旺必死。寅運果死耳。

己未

庚金巳月殺雖強

己巳 建寧李默閣老制殺 楠 制殺那堪水性狂。

庚子 太過貴命火不足格 曰 衰殺喜行寅卯運。

甲申 北方重見水難當。

庚生巳月。殺星本然旺矣。夫何見水結局。尅制殺星。雖年支有丁火相幫。然又見土多。亦泄弱火之氣。此以制殺太過。運行丙寅丁卯乙丑。火木之地。助起殺神。能為我用。此所謂火不足宜補起火也。位登黃閣。運行亥子。水來破殺。死宜矣。

丁酉 戊寅日下殺星微。

丙午 臨川帥謙齋貴 楠 己酉那堪太制之。

戊寅 命制殺太過格 曰 運入東方官殺顯。

丁巳 枯苗得雨發生機。

也。戊土生午。火氣炎盛。運入壬癸去火之炎。再喜培起寅中甲木。其貴然耳。此以火旺衰殺為病。去火存殺為去病神也。

乙酉 丙生亥月兩幫身。

丁亥 先伯瑛四公 楠 一殺那堪三制神。

丙午 制殺太過格 曰 運入西方生殺地。

己丑

超騰不作等閑人。

丙火生亥。殺星本可畏也。然有丁火合去。三重己土制之太過。大運入乙酉甲申。破土生殺。發財數千緡。壬癸運。亥午未運中。制殺太甚。屢遭凶變。入己丙戌年。六十二歲死矣。重見戊土破壬也。

丁未

乙木生臨酉巳垣。

己酉

先兄西庵

楠

兩金制火制相連。

乙巳

制殺太過

曰

不宜見火重攻殺。

丁亥

去火存金是福田。

乙木生酉月。本根輕也。畏金制。夫何金少而火多。制殺太過。盡殺無民。早行丙午。制過殺星。屢屢尅子。且財名不遂。大運入辰。坐壬癸之水。去火存金。財源大振。貴產佳兒。福壽兩全。寅運見火尅金。災生回祿。入丑殺星入墓。八十三歲而死。

庚辰

丁火生申水氣微。

甲申

宜黃譚二華尙書

楠

殺輕身旺貴何疑。

丁未

貴命身強殺淺格

曰

水輕喜入汪洋運。

丙午

職掌兵權震外夷。

丁生申月。伏火尙有餘炎。蓋喜年月合成殺局。所謂身強殺淺。萬戶封侯。運行北方。補其水用。殺得權。名魁夷夏。豈

偶然哉。俗術妄以龍奔天河為譽。不根理之所有。何其謬哉。

乙酉

己土生臨身旺鄉。

辛巳

本府楊太爺貴楠。土金清秀大非常。

己酉

命身強殺淺格。曰財逢七殺輕為病。

乙亥

滋殺威權顯廟廊。

己生巳月。火土本旺。蓋辛金清透。己土好洩其精。而從金為用神。殺為權柄。蓋得時上殺星。宜行殺旺地。及生殺地。所以運轉東北。七殺本輕。今得生旺之地於東北。耿耿二運。豈不富且貴乎。止畏辛金制殺太過。則不及耳。

甲午

壬臨丑月殺星多。

丁丑

貧命殺重楠。印破難生受折磨。

壬辰

身輕之格。曰再看運行財殺地。

甲辰

一生勞碌受奔波。

壬水雖生丑月。蓋因財殺太多。雖丑中有一點辛金。蓋緣不會會局。且有丁火貼身。暗破辛金。則壞印。作不得殺化印生。只作殺重身輕。運行東方木神制殺。衣食頗給。再行南方殺旺運。身雖不死。亦住廩牽豬牯度活。入未殺重而死矣。

丁卯

戊土生辰木旺鄉。

此命見前三十二頁



甲辰 一丐者命 楠 貼身七殺太剛強 此造五行缺金原無傷食

戊午 殺重無制 曰 不堪頑殺原無制

癸亥 只作齊人覓四方

戊土生辰木之分野。再加亥卯結成木局。且甲木透出天干。又行北方財地。生其七殺。正謂財生七殺。趕身衰。運雖有庚辛。亦不能制者。何也。蓋緣四柱中原無一點金氣。雖逢金亦不能制。根在苗先也。一生為乞丐。亥運殺旺方死。

丙子 爭權官殺亦何多

甲午 女命貧淫 楠 疊見夫星尅制過

己亥 夫星犯重 曰 洛浦風塵真可鄙

乙亥 只因八字犯淫訛

己土得祿於身。身主有氣。又不能從殺也。而且見三甲作合。貪合忘夫。所合不得其正。再行東方官殺。多夫之地。豈不大肆淫風。而作桑間濮上之女乎。且身旺不旺。而弱不弱。還作殺重。貧可知矣。

壬辰 乙未那堪疊見金

己酉 尙書妻火 楠 金多火少病堪尋

乙未 少金多格 曰 去金宜入南方運

辛巳 宮闈方知有貴人

乙日生於酉月。巳酉合成金局。木不足而金有餘。此謂夫星太旺。宜傷官食神之運。以尅去其夫而得夫。所以貴而有子也。正謂金有餘。行火運以去其金也。一生富貴。夫子全美也。

丙申

己臨亥日坐夫宮。

癸巳

女貴命金有

楠

申巳刑冲作病神。

己亥

餘財不足格

曰

運入東方夫旺地。

乙亥

官

豈同閨閣等閑人。

己土生臨巳月。庚金得祿得生。兩重亥中夫星。尅去明矣。惟有時上一點殺星為夫也。夫星孤秀。所以行東方旺夫之地。夫為參政。五子俱非常人。子星得祿故也。

庚寅

金神尅木不存夫。

甲申

尅損七夫金有

楠

疊疊刑冲夫不如。

戊辰

餘財不足之格

曰

行運不宜金再見。

丁巳

不堪重觀鏡鸞孤。

戊土用年上寅中甲木為夫。申宮庚金破之。用日<sub>下乙</sub>寅木為夫。巳<sub>中</sub>庚金破之。用月上甲木為夫。年上庚金破之。徒見夫而無夫也。一入辛巳庚運三年而兩嫁有之。五年而三嫁者有之。損七夫矣。

辛巳

乙木生臨伏火炎。

乙未 逸叟妻命火 楠 金衰頗以火爲嫌。

乙酉 重而金頗輕 曰 丙丁運上多災病。

壬午 金水重逢樂自然。

乙木生臨六月中旬。火氣炎蒸。雖有多金。然金氣自消矣。但喜坐下夫星得祿。雖火旺而不能傷夫也。凡女命坐下見夫星者當美。初行丙丁二字。辛金被制。生子不育。而且多災。戊己庚金之運。助比夫星。生子而身頗安也。

乙卯 辛金坐未火炎陽。

癸未 旺興夫子命 楠 金水三陰入旺鄉。

辛未 火重水輕格 曰 最慨四柱多火氣。

甲午 喜行金水福榮昌。  
木土

辛金生未。三陰將進之時。夫子二星俱已受氣。但四柱木土金尤盛。但得火俱伏藏。天干動水制之有力。早行丙戌。助夫攻身。屢損子星。運入北方。火炎水制。助子興家。五福俱全。入寅七十五死。兄嫂長三孺人也。

庚午 戊土生申金氣多。

甲申 貧天命制 楠 夫星尅制太如何。

戊申 夫太過格 曰 不宜早入刑冲運。

戊午 壽夭應知受折磨。

金

戊生申月。金氣重重。不宜月上見有申。夫星無根。此乃極貧格。夫殘疾無子。蓋為夫星金制太過。庚運死。

丙戌

乙木逢金夫本榮。

丁酉

貧命制

楠

不堪太重制夫星。

乙巳

夫太過

曰

北方運美南方否。

戊寅

此理分明豈狗情。

乙木生臨酉月。坐下夫星得本為好也。不堪重重見火。傷損夫星。再行南方午未運中。夫逃子竄。身幾不振。蓋為火多制金也。癸巳壬辰兩運。衣食滿給。夫子如故。蓋喜壬癸水破火而存金也。

辛丑

乙木逢金火損傷。

辛丑

先貧後富

楠

時逢丙火制相當。

乙亥

金多火少

曰

直看老景南方運。

丙戌

夫子興隆大異常。

乙木生丑。木氣本枯。再加五殺攻之。身益衰矣。賴有丙火進氣。制殺福神。早行壬癸破丙。頗受艱辛。一入南方。丙午丁未尅殺之地。五福俱全。入申殺旺方死。

甲戌

乙木生臨未月提。

辛未

先貧後富

楠

木衰金旺理堪知。

乙丑 金多火少 曰 直須火運將金尅

乙酉 定主與夫並旺兒

乙木生未。雖有甲乙之木三重。夫何木氣退而金氣進。更且火氣輕而不能制金。所以見夫星多而身衰者。返為戕身之賊也。運行己巳戊辰。財又生殺。貧苦尅夫。一入丁卯。火制殺星。再醮助夫。丙寅旺殺得制。安享優游。子孫並秀。

戊申 乙木金多制太過

甲子 娼賤命殺 楠 再行金運失中和

乙丑 多無制格 曰 娼淫濁亂汚中垢 受制於人楚撻多

乙酉 受制於人楚撻多

乙木生子。木氣無根。水木漂泛。四柱重重金氣。所以金多無夫。豈不為娼妓乎。原金多再行金旺之地。七殺攻馬。受制於人。多遭捶楚。入庚破甲。死無根也。

丙子 夫星衰弱制重重

壬辰 賤婢夫 楠 火少那堪水氣冲

庚子 輕制過 曰 再入北方夫氣絕

庚辰 一生婢妾走西東

不合丙火無根。夫星透出。壬水重重尅之。不宜運入北方。水氣益盈。夫氣日益不足。雖金水輕清。只作伶俐賤婢。理

本然也。

丙子

壬水生臨九月秋。

戊戌

尙書夫人水進

楠

水神進氣湧寒流。

壬午

氣夫透天干格

曰

子午結局源深遠。

戊申

紫誥榮封兩國優。

壬水生臨五陰之候。水氣盈矣。兩重戊土殺星。各坐生庫之地。其殺各有位矣。更得下通水局。任殺爲夫。南方殺旺之地。相夫貴格。更兼旺子。子從夫出故也。

癸巳

巳生未月木爲夫。

己未

富天女命

楠

兩巳來冲木氣無。

己亥

制過夫星

曰

再入西方金旺地。

己巳

金多尅木壽應殞。

己生未月。本用甲乙木爲夫也。夫何六月木衰。再加兩巳中庚金克之。其夫蓋衰矣。但八字純粹。生於富家。不宜運入庚申。再加庚金得祿。夫星之氣絕無。未嫁而死宜矣。觀此八字雖好。而行運不及。正謂源清而流濁也。

辛亥

戊土臨乾木得生。

庚子

狀元妻衰夫

楠

喜逢水旺木芽萌。

戊戌

行夫旺運格

曰

夫衰最喜夫生運。

己未

定作人間女狀元。

戊戌土實自坐財鄉。更得年上甲木夫星得生。而喜木衰。有庚辛天干之金。暗奈損木。則爲有病。方爲貴命也。大運一入壬寅。衰夫得祿。相夫而登廷試第一。豈不宜乎。又且生子。而作方伯。蓋貴子亦從貴夫生也。入己。庚金損破夫星而死。

## 時上一位貴格

補曰。時上一位格。蓋取時上一點殺星。若日干生旺。時上有殺。則用之爲時上一位貴。若身旺殺衰。喜殺旺運。富貴多子。蓋殺乃子星也。身旺能任其子也。若日干弱。時上殺旺。怕行殺旺及財運。正謂財生七殺。趕身衰。則主貧賤無子。殺能尅身。不能生子。正謂時逢七殺。本無兒。若時上有殺。亦要先安置殺星。或制去之。或合去之。方可用月上用神。如不會尅制此殺。卽當把時上殺爲用神。月上雖有印星財星。亦不能用。故格格推詳。以殺爲重。前人立言。說不分明。

補曰。時上偏官。卽時上一位貴格也。如陽見陽干。陰見陰干。相尅是也。透出爲妙。只許一位。四柱不許再見。若年月日又有。則爲辛苦勞碌之命也。要本身自旺。如甲寅。自生如甲子之類。又要有制伏。有制則爲偏官。無制則爲七殺。又要制伏得中和。一位七殺。却有兩三位制伏。是爲太過。雖有學問。不榮仕路。乃是貧寒一老儒。故喜忌篇云。偏官時遇。制伏太過。乃是貧儒。四柱制伏多。要行七殺旺運。或三合得地可發。若原無制伏。要行制伏之運。可

發如遇殺旺。無以制之。則禍生矣。時偏官爲人性重。剛執不屈。傲物自高。膽氣雄豪。月偏官亦然。

又補曰。食神制殺。化鬼爲官。固宜權貴。所謂食居先。殺居後。功名兩全。是已。羊刃合殺。變凶爲吉。亦能權貴。所謂甲以乙妹妻庚。凶爲吉兆。是已。

又補曰。食神制殺。不宜逢梟。則禍。故曰。食神制殺逢梟。不貧則夭。羊刃合殺。不宜財多。財多必咎。故曰。財生殺黨。夭折童年。

又曰。食神固能制殺。而傷官亦能制殺。但傷官不如食神之力。夫羊刃固能合殺。而傷官亦能合殺。但傷官不如羊刃之勢顯。陽日傷官能制殺。而不能合殺。如甲日見丁爲傷官。能制庚金之殺。而不能合庚。是已。陰日傷官能合殺。而自克制殺。如乙日見丙爲傷官。能合辛金之殺。自能制辛。是已。

又曰。殺一也。而馴服爲用。有二。制與化是也。制殺者。食神也。所謂服之以力也。化殺者。印綬也。所謂服之以德也。與其制之以力。不若化之以德。故通明賦云。制殺不如化殺。高然制化不可並立。有制不必有化。有化不必有制。倘若化神弱。制神強。施恩有不足之怨。化神旺。制神衰。臨事無禁制之能。

古歌云。時上偏官一位強。本身健旺富非常。年月並無官財殺。獨於時位最相當。又曰。時上一位貴。藏在支中是。日主要剛強。利名方有氣。

補曰。此言時支偏官。如甲逢申時。乙逢酉時之類。乃藏在支中者也。日主強旺。名利必振。惟忌身弱。而力不能勝也。



又曰。時上偏官喜刃冲。身強制伏。祿豐隆。正官若也來相混。身弱財生主困窮。

補曰。時上偏官如甲日見庚干。乙日見辛干之類。不怕冲刑羊刃故也。繼善篇云。時上偏官喜刃喜冲。日主生旺。年月有食神制伏。所謂食居先。殺居後。功名兩全。爵祿豐厚。不喜正官來混。有兄不顯其弟。加以身勢衰弱。財生殺黨。必主貧寒困苦。所爲不遂。

又曰。時上偏官一位強。日辰自旺貴非常。有財有印多財祿。注定天生作棟樑。

補曰。時上偏官只喜一位。四柱中不要再見。日主自旺如甲寅乙卯。或生於寅卯日之類。則身殺兩強。富貴過人。有財則時殺有根。有印則化殺生身。財馬官祿自然興旺。

又曰。時逢七殺是偏官。有制身強好命看。制過喜逢殺旺運。三方得地發何難。

補曰。時逢七殺。乃是時上偏官格。身旺有制。如有一位殺。則有一位制。乃是貴人。文章振發。當作好命看。若有兩位制伏。則爲制伏太過。逢殺旺三合得地之運。其發達也。勃然不可遏。苟制伏太過。而又不能行殺旺之運。雖文過李杜。終不能顯。

又曰。元理制伏運須見。不怕刑冲多殺攢。若是身衰惟殺旺。定如此此命是貧寒。

補曰。偏官有制伏。不宜運再見。若當生原無制伏者。喜行制伏運。月上偏官。怕刑冲多殺之攢。時上偏官。不怕三刑六害羊刃冲破。多殺攢聚。惟喜身強殺淺。若是殺重身輕。終身有損。縱不夭壽。定是貧寒。

又曰。時逢七殺本無兒。此理人當仔細推。歲月時中知有制。定知有子貴而奇。

補曰。時上偏官建祿。主尅子。若歲月中有食神制伏。或刃合。不惟有子。而且貴。故曰。時上偏官有制。晚子英奇。四言獨步云。時殺無根。殺旺取貴。時殺多根。殺旺不利。

補曰。且如庚用丙爲殺。生於寅。旺於巳午。庫於戌。乃殺之根也。格解以財爲根。亦是。若時干虛露。既無根氣。又無財生。運行殺旺。富貴可得。如三合得地。既多根氣。又有財生。再行殺旺之鄉。反不利。而貧苦者多矣。

乙丑

辛金坐酉旺成行。

乙酉

東鄉徐少初貴命金

楠

火煉秋金大異常。

辛巳

火相停金重火輕格

曰

金旺火輕宜火運。

甲午

少年早折桂枝香。

辛生酉月。喜得巳酉丑全成金局。喜得時上一點火神得祿。時上一位貴也。明矣。大抵金氣全局。金氣還勝。所以行午運。甲午流年。中鄉試。聯登黃甲。有乙未年生人。少了一點金。午字運不好。所以金宜旺也。

丁亥

辛金子月水金清。

壬子

臨川舒尙書貴命金

楠

留殺冲官格局明。

辛巳

白水清水制火過格

曰

金冷水輕重畏水。

丁酉

宜行火運展經綸。

去留舒配。用格明矣。年上七殺。壬水去之。日上正官。亥中壬水去之。惟存時上丁火。作時上一位貴格。但十一月之

火風寒之候。火氣衰弱爲病。畏金水之鄉。宜丙丁戊己之運。眞貴人也。蓋丙丁能助起衰殺也。戊己能制壬癸水也。

附官殺去留雜格

喜忌篇云。類有去官留殺。亦有去殺留官。補曰。此乃五行遇月支偏官節中兩句。格解不明。摘附於此。全已論在偏官格下。三車一覽。論官殺去留之說。以附於此。爲後學龜鑑。則得矣。其論曰。蓋四柱中官殺混雜交差。有可去官留殺者。卽以偏官論。有可去殺留官者。卽以正官論。凡看去官留殺。去殺留官者。要看四柱中官殺孰重孰輕。天干透出者易去。月支所藏者難去。須得四柱去官殺之物衆而有力。方纔去得。去官殺之物。傷官食神是已。

喜忌篇云。神殺相絆。輕重較量。

繼善篇云。歲月時中。大怕官殺混雜。

易鑑云。天地人元分五音。陰陽妙訣。審其眞。去留舒配。須參透。禍福中間。理自明。

萬金賦云。官星怕行七殺運。七殺猶畏官星臨。官殺混雜當壽夭。去官留殺仔細尋。留官去殺莫逢殺。留殺去官莫逢官。官殺受傷人必夭。更宜財格定前程。

三車云。合官星不爲貴。合七殺不爲凶。何歟。曰。經言合官星。柱中閑神合去官星。所以不爲貴。合殺是柱中閑神。合去七殺。所以不爲凶。又曰。大抵凶神有物合去。則反凶爲吉。吉神有物合去。則反吉爲凶。凶神七殺。羊刃。劫財。敗財。偏印。梟神。傷官之神是也。吉凶神殺。又看格局。喜何神。忌何神。不可執一而論。

集說云。貪合忘殺。貪合忘官。如六癸日生人。干頭透露己字。乃是癸家七殺。如再透甲字。乃是己家合神。則合去己字。不爲殺矣。此謂貪合忘殺。陰日以傷官而合也。又如六壬日生人。干頭透出己字爲官星。如見甲字透出。乃是己家合神。合去己字。不爲官星。此謂貪合忘官。陽日以食神而合也。

又云。壬水相逢陽土時。心懷忿怒起爭。非忽然癸水來相救。合住凶頑不見威。蓋以羊刃而合殺。例也。

補曰。陽水時逢戊土之類。性情如虎。急躁如風。其心常懷不平之氣。偏爭好鬪。忽逢癸水之妹。合戊土之殺。則凶頑之氣自消。而威暴不施。如無癸妹來合以救之。則剛暴不已。不免爲屠兒獄削之徒。何嘗有惻隱之心也哉。

又曰。壬逢己土欲爲官。驀被青陽起訟端。引誘合將真貴去。致令受挫萬千般。此貪合忘官之例也。蓋亦以食神而合官。

補曰。青陽謂甲木也。真貴謂己土之官也。蓋言壬水以己土爲官貴。怕傷怕合。苟被甲木合官星而傷之。則貪合忘官。將見忠信變而爲忿爭。而訟獄之端起。真貴去而爲下賤。而萬般之辱受矣。所謂合官星不爲貴是已。

又曰。官殺相連。只論殺。官殺各分爲混雜。食神重犯作傷官。疊見官星只論殺。露殺藏官只殺論。露官藏殺只論官。身強遇此多清貴。身弱重重禍百端。

補曰。年干官星。月干有殺。或年干殺星。而月干有官。是謂相連。只以殺論。或年上爲官。時上爲殺。或年上爲殺。時上爲官。是謂各分。乃爲混雜。食神重犯。如甲見二丙。或三合爲傷官。疊見官星。如甲見二辛。或地支重見。只以殺論。殺在干。官在支。是謂露殺藏官。乃以殺言。官在干。殺在支。是謂露官藏殺。只以官論。身勢強健。則力能勝此官殺。多爲清貴之言。若身弱無氣。官殺重逢。則禍咎之來。不特一端已也。

# 神峰通考卷二

臨川西溪逸叟神峰張 楠著集

## 月支正財格 附棄命從財格

楠曰。正財者何也。財爲養吾性命之物。人見之未嘗不欲。若身主有氣。則能任之。若金寶。若田產。皆我之物也。身弱則不能任。如盜賊偷人財物。事發則爲害命之物也。書云。逢財喜殺而遇殺。十有九貴。理雖甚是。而不顯言。若用財之人。日干旺。比肩兄弟多。則此比劫。又分奪我之財也。則喜官殺以去其比劫。存起其財星。若身弱財多。再見官殺來尅身。則自己性命。且不可保。安得享其財乎。若財星衰。若身主旺。則喜食神傷官以生起其財神。若身主弱。財星多。則喜兄弟比劫以分之。父母印運以助之。凡用偏財者。多主富貴。用正財者。多不及。蓋陰尅陰。陽尅陽。財神有氣。用時日偏財尤美。此乃試驗之多。故知用偏財者爲上格。亦有財神親切。若有比肩間隔。不純和。亦不美。此係五行之正理。

棄命從財格。此則不論陰陽日主皆從也。財乃吾妻。身主無力。不能任其財也。只得舍命而從之。如人自己無主。只得入贅於妻家。就要生起財星。而亦畏身入旺鄉。及印生之地。卽同棄命從殺而論。理出於正。繼善篇云。一世安然。財命有氣。

補曰。此段亦有二說。或曰。財命有氣。是財星身命俱有氣。或曰。純言財月居生旺有氣之地。經文多是命字連財說。今人亦云。世人好財命是也。後說牽強。考之揅隲玄妙訣云。官乃扶身之本。財爲養命之源。則命爲身命也明矣。況舊註亦分財命爲二。但辭不明快。所以啟淺見者之疑。前說發經文之所未發。明順可從。如財旺有氣。而身弱者。決不能享安樂之福。況一世乎。故上篇云。財多身旺。則多稱意。又古歌云。財多身健方爲貴。若是身衰禍便臨。由此觀之。則財命當爲三也。益明矣。

古鷓鴣天云。正財有氣喜身強。陽取陰財陰取陽。身弱財旺番成禍。身強財旺利名長。只愁官鬼怕空亡。印綬相生榮貴昌。休囚少年不如意。老臨旺運好風光。

補曰。假令甲生午日。午中己土爲甲木之正財。而丁火生之。乙生巳月。巳中戊土爲乙木之正財。而丙火生之。是正財有氣也。甲寅乙卯日坐祿。甲子乙亥日坐印。而柱中生扶日主。是謂身強。正財有氣者最喜也。甲生午月。丙生酉月。戊生子月。庚生卯月。壬生午月。陰支爲陽干之正財也。乙生巳月。丁生申月。己生亥月。辛生寅月。癸生巳月。取陽支爲陰干之正財也。如身居休囚死敗。天元羸弱。柱中支干重重。三合財多。非徒無益。則反生殺生災。所謂只怕日干自弱。財多生殺。趕身衰是也。如身居臨官地旺。或註中生扶。而財三合太旺。則富貴利名。聲譽顯著。所謂財多身旺。則多稱意是也。愁官鬼。蓋官鬼乃盜財之氣。尅我之身。本爲可慮。正財多盜氣。本身自柔之謂也。怕空亡。乃六甲空亡。甲子旬中以戌亥爲空亡之類。財落空亡。必貧窘不聚財。爲可畏。空亡爲害最愁人。堆金積玉也。須貧之謂也。印綬相生榮富貴。蓋言財多身弱。或帶官鬼。有印綬相生。自然富貴榮昌。獨步云。先財後印。

反成其福。通明賦云。財逢印助。相如乘駟馬之車。此之謂也。休囚少年二句。蓋言四柱既財多身弱。而大運又行財官旺地。財官旺則身休囚而愈弱矣。雖強年經休囚之地。亦不如意。不惟不發福。亦且禍患百出。或末年復臨父母之鄉。或三合助扶我旺。則勃然而興。而富貴榮顯也。如身財兩停。或身旺財輕。則喜財官旺運。忌身旺比劫之鄉。宜輕重較量。亦有身弱全無根氣。滿局財殺。棄命從之者。復行財官旺鄉。大發者有之。不可遽以身弱財多斷之。

四言獨步云。陰火酉月。棄命就財。北行入格。南走爲災。舉此一段。以例十干從財者之斷。

楠曰。丁火長生於酉。偏財得位。柱中三合。財多略無根氣。則爲棄命就財格。運行壬癸亥子之方爲北行。多富貴。雙全。行丙丁巳午之氣爲南走。火有根氣。助扶身旺。與財爲敵。不能從財。反爲禍咎。所謂會逢根氣。命招不情是也。觀此北行入格一句。則從財忌殺。又不可泥。

辛巳

丙生酉月火神微。

丁酉

吾郡李志富公

楠

財旺如嫌火氣虧。

丙寅

富命身旺任財

曰

火少金多宜火地。

己酉

陶朱倚頓富堪期。

丙火雖死於酉。得火祿於巳。丙火得生於寅。又喜丁火陽刃透天干相扶也。但金氣還勝。火氣還輕。喜運行南方。以補其火。所以財發數千萬緡。有丙子日干者。只作財多身弱。雖行南方亦貧也。蓋原無寅宮火也。

戊寅

丙火生提向二陽。

乙丑

蓋雲南一省富

楠

喜臨財庫更身強。

丙申

命身旺用財格

曰

丙丁身旺逢財者。

庚寅

號曰真金火倍常。

雖不是丙火夏生金疊。富有千鍾。凡丙丁火旺見金者。但可以此理論之。獨有丙丁見金。為天地之真財。日干旺者。十有九富。此造喜年時丙火得生。又有乙木貼身。則為身旺。且二陽進氣。又喜庚金透出。財神明白。豈不富蓋一省乎。若丙生寅月。返多作弱。丑用火返旺也。凡寅巳午未月。火返嫌弱。喜火旺。子丑亥月。返怕火旺。此則正理之外見也。甲乙生寅卯辰。丙丁生巳午未。庚辛生申酉戌。壬癸生亥子丑。俱要身旺。略喜一二點尅神。尅多者多貧。天此亦理外之見。試之屢中。

丙寅

丁生五月火雖炎。

甲午

新坪吳楚四公富命

楠

火旺金多富自然。

丁酉

火長夏天金疊疊格

曰

金少火多斯有病。

乙巳

運行金水發轟天。

丁火祿旺於午。年月比肩火神太旺。所以祖財輕也。蓋得己酉結成金財局。身旺用財。丙丁火旺見庚辛。乃天地之真財。凡丙丁日旺。見有金財者。十有九富。但要丙丁極旺。若丙丁弱者。返否屢試屢效。但用庚辛金財。星見子運者。



多死。蓋因金死於子也。此造大運入酉財輕。喜行財旺之運。一發轟天。一入子運問死刑。富則依然也。

甲辰

日主干強七殺輕。

丙子

臨川傅忠所貴

楠

財來資殺養精神。

己未

命土重木輕格

曰

殺藏官露真為貴。

戊辰

年少高登虎榜人。

己未日干身坐木庫。再加年時。重重見土。然己土雖生弱月。比多亦能化弱為旺矣。身旺則能用財。喜財結局。且成財庫。然戊己土多來損財神為病。又得四柱有甲乙之木。暗來破戊己為藥也。但子月之木枯。喜運行東方。旺助衰木之氣。以破戊己土也。早年科第宜矣。若原木旺。則畏東方矣。此見原木輕。而喜旺運也。

丁卯

丙火身強財亦強。

乙巳

夫人貴命火長

楠

旺夫更喜入財鄉。

丙寅

夏天金疊疊格

曰

財神結局原豐厚。

丁酉

子秀夫榮大異常。

丙火身旺逢財者。非特男人富貴。女命逢之。亦主子貴夫榮。蓋得己酉真財結局。原財頗輕。西方補起財神。夫為太守。金珠滿屋。豈不宜乎。

壬辰

生申戊土透夫星。

戊申 參政妻財

楠 財旺生夫格本明。

癸卯 旺生官格

曰 運入南方夫旺地。

丙辰

相夫相子步雲程。

癸水合成火局。身主不柔。夫星氣輕。正謂有病方為貴也。行南方財運旺夫。夫子貴顯。豈偶然哉。

辛酉

戊臨子日坐財星。

庚子 富女命夫輕

楠 時上夫星格局明。

戊子 行夫旺運格

曰 最喜運行夫旺地。

癸亥

相與夫子有聲名。

戊子日主。財星太多也。若以旺弱看。則為財旺身弱。本為不美。不知女命只看夫星為主。亥中甲木。夫星極衰。再加庫辛金損甲。運入東方。助夫生子發達。但身主弱。雖一生發財。而身常有疾病也。故財官太旺。日主太弱。父母家極貧。夫家極興。入己庚金尅去夫星而死矣。

### 時上偏財格

### 附月偏財格

楠曰。時上偏財格。蓋以日干有氣。能任其財也。如甲寅日見戊辰時也。天干透出財神。斯格方真。若又歲月有財相雜。則格不純。蓋喜身旺任財。食神之運以生其財。嫌官殺運。尅倒日干。則不能任其財。蓋身太旺比肩多。又喜官殺運。制去其比肩。放起其財神。不可執泥。但用偏財日旺多富貴。蓋陰尅陰。陽尅陽。財神親切有氣也。用正財未見其

美。偏財乃橫財。身旺多有施捨豪氣。多得橫來財也。理出於正。

方歌云。偏財本是衆人財。最忌支干比劫來。身強財旺皆爲福。若帶官星更妙哉。此月支偏財。

補曰。偏財謂陽見陽財。陰見陰財。如甲見戊。乙見己之類。然偏財乃衆人之財。非義不當得之財也。惟忌干支比肩劫財分奪。則不全。所謂姊妹兄弟分奪去功名不遂禍隨生。是已。不有官星禍患百出。故曰。若帶官星更妙哉。但恐身勢無力。財弱無根。故曰。身強財旺皆爲福。何者。蓋身旺自能勝財。財旺自能生官矣。

又古歌云。時上偏財一位佳。不逢冲破享榮華。敗財劫刃還無遇。富貴雙全比石家。

補曰。時上偏財者。如庚日見甲干。或寅支。辛日見乙干。或卯支之類。只要一位貴。不要多。而三處不要再見財。卻怕年月日冲破。如寅冲申。酉冲卯。是已。如不逢。自享榮華富貴矣。柱中及運。若見敗財。如辛見庚。及申見劫財。羊刃。如庚見辛。及酉之類。必傷妻耗財。破家不足而已。苟干支無遇。則富而有財。貴而有權。可比石崇矣。補曰。正財偏財皆喜身旺。皆忌印綬倒食。身弱比肩劫財。但偏財喜見官星。而正財忌官星。故集說云。正財偏財二格。喜忌大同。惟有喜官星。不喜官星之小異耳。及偏財爲人有清高。而多主慷慨。不甚吝財。蓋能利己。亦能招誘。雖喜官星。亦當較量身之強弱。運之盛衰而言。如運行旺相。福祿俱臻。行官鄉便可發祿。若財盛而身弱。運至官鄉。既被財之盜氣。又見官之尅身。不惟不發祿。亦妨患咎。如四柱中先帶官星。便作好命看。若四柱兄弟背出。縱入官鄉。發祿必少。正財爲人誠信。作事儉約。處信聰明。惟是慳吝。雖正財不喜見官。恐盜財之氣。然四柱財多身旺。劫重。亦喜見官殺制伏比劫。故曰。逢財看殺。見官尤妙。藏財露官。當作貴推。亦不可泥於不喜見官之說也。

己酉

壬水生逢子月天。

丙子 希文自造時月

詩

偏財類聚喜遇全。

壬寅 偏財類聚之格

曰

壬申再轉南方運。

乙巳

火土重逢福祿堅。

予修淨土人也。亦不事此術。為繼家君之志。而編此書。予命正合書云。素食慈心。印綬遂逢於天德。信矣。凡壬水喜財官。生子月為建刃。建刃若行財官運。為人必白手興家。但二木傷官殺。有二金以當之。八字巳中土無多。故主不貴。喜時日偏財。類聚親切。凡用偏財者多慷慨。身旺肯施捨而不吝。故古歌云。偏財身旺是英豪。羊刃無侵祿位高。結識有情多慷慨。云云。然哉。是言也。所惡者刃。故不免重婚耳。所宜者官殺。官殺旺比劫方衰。行癸運羅父母災。遭妻子變。故曰身旺比劫重損財。又傷妻是也。酉運一入。火土俱敗。不遂宜矣。若壬運比癸不同。一旦運至南方。利壬而不利癸。申連水土得長生。或遂貽燕之謀。辛未庚午己巳。行官印之鄉。可望平安。辰連水土入墓。不免西歸矣。但無奈時逢七殺。更兼寅巳相刑。妻子遭喪。惟喜貼身甲木制之。故曰。時上偏官有制。晚子英奇。理或然也。但命至微渺。宣父難言之。予據先人成說。更稽先人遺訓。故浪揣摩。以為後鑑云。

庚寅 乙酉 甲子 戊辰

李廉使之命

癸亥 乙卯 乙未 壬午

張府尹之命

己未 壬申 丙申 庚寅

曾參政之命

戊子 辛酉 戊申 壬子 陳尙書之命

甲午 丁丑 己未 癸酉 曾知府之命

壬午 壬寅 庚子 戊子 邢司令之命

乙酉 乙卯 辛卯 辛卯 高侍郎之命

丁亥 戊申 壬申 丙午 侯知閣之命

庚午 戊子 癸卯 丁巳 劉中書之命

癸卯 戊午 丁丑 癸丑 王少師之命

### 傷官食神格

補曰。傷官食神。一陰一陽之謂。傷官陰見陰。陽見陽之謂。食神皆盜我血氣之物也。子平書論傷官食神之理。書雖甚多。但所言皆不親切。何以爲之傷官也。蓋人之身。以官星爲管我之官。如府縣官之類也。出入動作。皆要循守規矩。不敢妄爲。今則傷官者。則是傷殺其官。不服官管。如弑殺上官之類。則爲強賊化外之民。如此格者。就要不見官星。如再見官星。就如打傷府縣官者。又再去見府縣官。則官肯放汝乎。今書止云傷官見官。爲禍百端。而不直言其理。又曰傷官傷盡最爲奇。尤恐傷多反不宜。此雖正理。猶志通玄云。傷官之格。四柱並不見官星。本然入格。但太純而無病。事見下文病藥說。雖然日干有氣。若四柱重重傷官。盜盡我身之氣。如人屢屢服大黃朴硝。諸般通藥。則身由此而洩。傷其元氣。則將何藥以救之。如此之弱。則用附子之溫藥。方能救其性命。若八字重疊傷

官食神。日主原又衰弱。急須行印運以破其傷官。行財運以資其日主。此是有病之命。得藥救之。亦多富貴。又如日主生旺。比肩太多。財神衰弱。蓋傷官以財爲用神也。則又喜見官星以制其比劫。存起財星也。何又喜見官。前後進退之言也。緣我本身兄弟太多。官星但來制我兄弟。存起我財星。此官星爲我之福。不來禍我也。故書云。木火見官官要旺。金木傷官喜見官。前人虛立此言。反滋人惑。不徹底講明進退之說。豈不泥耶。何也。蓋木火傷官格。假如甲乙木生正月。見火爲假傷官。其火乃虛火。其焰未熾。且木氣朴堅。雖見火而木之真性不焚。再若木旺。則喜庚金旺相之官星。以尅制其木也。則金木有成名之用。則木火見官官要旺。其理然也。若甲乙木生臨巳午。月炎火盜甲乙木之氣。則謂之真傷官也。原又泄木精英太多。再加庚辛官殺制其日主。此則木火傷官。亦畏見官也。若日主旺。傷官多。見官殺反爲我之權殺。亦多富貴。金水傷官喜見官何也。若庚辛日主。生於子月。或亥丑月。重重水氣。泄弱庚辛金之氣。則謂金寒水冷。則喜丙丁火官星。以煖其金氣也。若水氣不多。金氣不旺。亦畏官星也。又云。土金官去反成官。宜去官星也。其說近理。惟有水木傷官格。財官兩見始爲歡。此則見財宜也。見官則不宜也。下此官字。反致惑人。然傷官之格。有真傷官。有假傷官。如真傷官者。甲乙日主。生於巳午未月。真火爲傷官。用事。蓋甲乙日被火焚其精英。若火多而木性失。則喜北方水運。以破其傷官。扶起其木氣。如止一二點火。亦畏印以破之。故曰破了傷官損壽元。如甲乙木生正二月。見火爲假傷官。其火氣尙未熾烈。則用此虛火爲用神。正謂木能生火。木榮昌。木火通明。佐廟廊。又曰。假傷官行傷官運發。若行南方火運。動其虛火。且木氣堅朴。又得火以泄其精英。多主富貴。若行北方水運。破其虛火。正謂假傷行印運必死。真傷官行傷官運必滅。如甲乙木見巳。

午未月傷官泄氣太重。再行寅午戌火運。泄木精英太甚。安得不死乎。書云。木作飛灰。男兒壽矣。然傷官格人多傲氣者。何也。子平之言。未言其理。蓋人用官爲管我之官。我則不畏其官而傷之。是肯放我爲非。豈不是好傲好僭者乎。又多聰明者。何也。蓋日主之氣破。泄其精英。是其英華發於外也。故多聰明。若日干旺。精英喜泄。則爲卿爲相。若日干弱。泄氣太多。著多爲迂謬寒儒。蓋其所泄精英。亦不爲好精英也。若男以官星爲子。見傷官以破之。多主尅子。其理易曉。若見財暗生子星。則又有子也。食神格亦多類此。若見二三點。則混爲傷官看。若單見一點。食神爲食神生財格。亦要日干旺。食神生其財星。最忌偏印爲梟神奪食。若食神多則不畏也。一則與真傷官同。不畏印運也。若止一點。再如食神氣弱。又柱中有官殺。原賴此食神制殺。今被此梟印破去食神。不能來制殺。則反來尅身。多主壽夭貧寒。傷官格多畏入墓運。故言其禍甚烈。亦不推明立說之意。蓋傷官格。乃傷殺官長之人。將如此等之人。提入牢獄。必多苦楚。此說亦不甚近理也。但原真傷官太多。泄氣太過者。行傷官墓地。又添一點。傷官愈泄精神多死。亦非入墓之害也。又或假傷官氣輕。日干旺。喜傷官泄其精神。再行傷官墓地。又添一點。以泄其精英。入墓運返多富貴。亦不可以入墓爲說也。但當以傷官輕重真假論之。其理甚是。

補曰。傷官者。我生彼之謂也。陽見陰。如甲生午月。戊生酉月之類。陰見陽。如乙生巳月。己生申月之類。亦名盜氣。喜身旺。喜印綬。喜財星。喜傷官。忌身弱。忌無財。忌官星。歲運同。如甲生午月。干頭又見丁火重重。柱中有官星顯露。歲運又見。是謂身弱逢官。傷之不盡。其禍不可勝言。故曰。傷官見官。爲禍百端。有財有印。乃解。若傷官傷盡。四柱不留一點官星。又行身旺及印運。卻爲貴也。故定真篇云。傷官若見印綬。貴不可言。如四柱雖傷官星。身雖

旺。若人無一點財氣。只爲貧薄之命。故元理賦云。傷官無財可恃。雖巧必貧。須見財爲妙。是財能生官也。傷官七殺。甚於傷身七殺。其驗如神。年帶傷官。父母不全。月帶傷官。兄弟不完。時帶傷官。子息凶頑。日帶傷官。妻妾不免。傷官原有官星。運行去官主發福。傷官用印。不忌官殺。去財方發。傷官用財。見比有禍。行傷官運方發。若四柱傷官無財。又遇比劫。乃行奸弄巧。尅妻傷子之命。元犯傷官多。不宜復行傷官。須要見官則發。故曰傷官無官。再見蹇滯。運入官鄉。局中反貴。若傷官輕。只一位者。宜行傷官運。宜輕重較量。不可執一而論。

又曰。傷官之格。主人人才高氣傲。常以爲天下之人不如己。多詞侮人。衆人多惡之。而貴人亦憚之。故古歌云。傷官其志傲王侯。好勝場中強出頭。

又曰。傷官固不喜官星相見。若金人水傷官。水人木傷官。木人火傷官。不大忌見官星。故古歌云。火土傷官宜傷盡。金水傷官喜見官。木火傷官官要旺。土金官去反成官。惟有木水傷官格。財官兩見反爲權。

又曰。男重傷官固尅嗣。然傷官有財亦多兒。亦曰傷官有財。死宮有子。傷官無財。子宮有死。女犯傷官固刑夫。然財印俱旺亦榮夫。故曰女命傷官。格中大忌。財旺印生。夫榮子貴。

金不換云。傷官四柱見官。到老無兒。

又曰。傷官傷盡。忽見官星則凶。傷官見官。妙入財印乃解。

纂要云。凡傷官行旺相吉。死墓皆凶。陽順陰逆。以用神而推。且如用屬甲。甲長生亥地。沐浴子。冠帶丑。臨官寅。帝旺卯。衰辰。病巳。死午。墓未。絕申。胎酉。養戌。是也。



補曰。凡傷官格。行旺相吉者。是言四柱傷官輕。而運行旺相臨官帝旺之地。則吉而福榮。死墓皆凶者。是言四柱傷官既重。而行墓死運。皆凶而禍敗。如甲生午月。乙生巳月。柱中有寅午戌字。又行戌運。寅午戌三合傷官。謂之入墓。必禍是也。陽順陰逆。以用神而推者。是言陽傷官爲用神。運順行。其禍死者多矣。陰傷官爲用神。運逆行。其禍小。未必死也。故醉醒子氣象篇云。入庫傷官。陰生陽死。夫傷官輕而行旺相固吉。如年上傷官。柱中重重三合太旺。又無財。雖再行旺相之地。泄氣愈甚。反凶。故古歌云。年上傷官最可嫌。重怕傷官不可蠲。又古歌云。傷官傷盡最爲奇。猶恐傷多反不宜。此格百中千變化。消息須要用心機。又古歌云。戊己生時氣不全。月時兩處是傷官。必當頭面有虧損。膿血之瘡。苦少年。觀三歌柱內。傷官既重。不可行旺相也。明矣。纂要是言輕者。常行旺相也。當輕重較量。不可執一。夫柱內傷官重。而行墓死固皆凶。然正氣傷官。雖柱中輕。亦不可入墓死之運。故古賦云。傷官食神並身旺。遇庫興災有禍殃。雖然當有陰陽辨。如前所言甚精詳。又格解以下二格。與此格合解。亦非盡傷官。以月令生我者言。正倒祿。非以日主暗沖者言。內有二字泛指。四柱非指傷官也。食神格補曰。食神者。我生彼之謂也。陽見陽干。陰見陰干。如甲日見丙。乙日見丁之例。丙祿在巳。甲人食丙。又見巳字。丁祿在午。乙人食丁。又見午字。是謂天廚食神。而食神有氣。要日干自旺。則貴而有祿。富而有壽。故曰。食神有氣勝才官。先要強他旺。本干最忌梟神奪食。比肩分食。又不喜見官星。並刑沖。喜才星相生。獨一位見之。則爲貴神。蓋重逢見之。則爲傷官。反爲不美。令人少子。有尅難存。若食神純粹。主人財厚食豐。度量寬洪。肌體肥大。優游自足。有子息。有壽考。又忌行食神死絕運。並偏印梟神運。主生災咎不利。惟偏財能解救。故洪範云。偏財能益壽延年。以其能制梟也。又曰。

食神明朗壽元長。繼母逢之不可當。若無寵妾來救助。恰如秋草遇秋霜。古歌云。食神生旺喜生財。日主剛強福祿來。身弱食多反爲害。或逢梟神主凶災。又曰。食神生旺無刑尅。全逢此格勝財官。更得運行生旺地。少年折桂拜金鑾。

### 附傷官十論

甲木傷官寅午全。火明木秀利名堅。運行最怕財官旺。見戌行來阻壽元。  
乙木傷官火最強。運逢官殺轉爲良。只怕水多傷不盡。終身名利有乖張。  
丙火傷官燥土重。運行財旺福興隆。如逢水運遭傷滅。世態紛紛總是空。  
丁火傷官火又柔。生人驕傲有機謀。運逢印綬連官殺。唾手成家孰與儔。  
戊日傷官最怕金。柱中格畏木來侵。金衰不喜行財運。土既消磨金又沈。  
己日傷官金最旺。弱金柔土喜財鄉。運逢官殺終身福。名利興衰不久長。  
庚日傷官喜見官。運逢官殺貴無端。正是頑金逢火煉。少年折桂上金鑾。  
辛日傷官申子辰。傷官傷盡喜財星。東南順運滔滔好。背祿行來仔細尋。  
壬水傷官怕木浮。見官見殺返爲仇。再行財旺生官地。財祿無虧得到頭。  
癸水傷官怕見官。最嫌戊己透天干。再行財旺生官地。世事勞形禍百端。

丁丑

乙生戌月木神輕。

庚戌 金雞陳秀二公富命 楠 用火傷官作用神。

乙巳 木火傷官庚金爲病 曰 金水兩般爲我病。

壬午 南方火運長精神。

乙木生臨戌月。本金剛而木柔也。若以旺弱而推。人命行南方。似泄氣矣。蓋旺弱論命。乃愚術不精妙理。大抵當以有病而論。十有九驗。故八字有病者。宜行去病之運。人多富貴。此造頂喜戌中有一點火星。透出天干。再喜戊午合。成火局。作木火假傷官看。喜月上有一點庚金爲官星。爲我之病神也。何以言之。蓋傷官以官星爲病。書云。有病方爲貴。早年己酉戊申。病神得祿。推其不美。一入南方丙午丁未。去庚金病神。所謂格中如去病。財祿兩相隨。興家創業。則富宜矣。乙甲運中。雖不及丙丁火。去庚金爲親切。蓋亦喜甲乙以生丙丁也。所以老益精神。只畏壬癸運來破火。放起庚字。恐生不得祿。但子星不足者。蓋因日主氣火中和也。若以雜氣財官論之。全非妙理也。

己巳

乙木生臨未月提。

辛未 營山吳靜三公庚辛金 楠 傷官木火是真機。

乙亥 爲病神丙丁火爲福神 曰 辛金透出爲真病。

丁丑 丁丙交來是福基。

乙木生於未月。透出丁火。作真傷官。見辛金己丑。七殺爲病。行丁卯丙寅。克去庚金。爲去病之神。多子生財。蓋日干有氣。能任子也。一入丑運。三合起殺星。官訟宜也。

己巳

戊臨酉月泄精英。

癸酉

臨川饒惠徽廿六公 楠

丙火生身用印明。

戊辰

富命土金傷官用印 曰

癸水劫來傷丙火。

丙辰

南方土運發非輕。

戊土死於丙。泄土精英。蓋得己宮丙火。透出天干。傷官身弱者。用印明矣。月上癸水。尅印爲病神。更得年上己土。尅去癸水。運行南方。己巳戊辰。尅去病神。富蓋臨邑。大運入卯。傷官復行官運而死矣。然其大富。因八字純粹。喜有官星病神。行運辛未庚午。俱去病之神也。又喜戊己。又去壬癸水之病。兩病俱去。其富宜矣。

甲戌

乙木生居火土旬。

庚午

逸叟自命真傷官

楠 時干透露火爲真。

乙亥

格庚金官星爲病

曰 庚金月上爲真病。

丁丑

壬癸傷丁便可曠。

乙木生午。透出丁。用火爲真傷官。奈何庚金貼身制我身。而不能用丙丁火也。所以青雲志弗克就。只爲此一點庚金羈絆。再行壬癸。傷損所透丁火。愈不能制去官星。故多蹇滯。後來頗遂者。行甲乙丙丁。蓋因能去庚畏也。然又只畏壬癸天干之水。蓋因丁火露出。火少故也。不畏地支之水。蓋爲地支火多。有土去水耳。

乙酉

庚生丑月氣寒凝。

己丑 逸叟弟眞

楠 氣弱能親劫有情

庚子 傷官用劫

曰 最畏丙丁能破劫

壬午

西方金旺頗精神

庚生丑月。透出壬水。作金水傷官。金本寒而喜丁火。為煖金之物。然被子水冲之。不用丁火亦明矣。喜年月酉金。類聚一處。庚金見此用劫為用神。早行丙戊丁運。破去劫神多疾。一入酉申。比劫得地。身旺遂矣。

戊午

戊土重重泄火精

己未 叔祖仲器公火

楠 身衰用印理分明

丙戌 土傷官用印格

曰 早年最畏財傷印

己亥

火運來資印有情

丙火生未月。火雖有氣。然四柱土多。泄火精英。變旺為弱。賴有甲乙木神結局。身弱用印明矣。早行西方。金能尅印。不利。入戌見土。損子。運入北方。水資印氣。興創可驗。入寅艮土。晦火。七十四歲死矣。

戊子

火氣重重產四陽

乙卯 閣老貴命

楠 再行木旺火難當

丁巳 假傷官格

曰 柱中透土成眞格

丁未

保土存財入廟廊

丁巳日生於四陽之月。火氣方熾。再加卯未結成木局以生之。則火氣愈炎。其精好泄。喜年干透己未之土。則火見土而泄其精焉。秀氣則在土矣。但戊己土到卯月極衰。而又有乙卯結局之木。以破其土。則土爲用神。畏木爲尅土之病也。所以土少木多。其病甚重。早行戊午己未。土衰亦宜行土運。一入庚申辛酉。上下皆金。尅木淨盡。去盡病根。位入台閣。入亥木氣得生。病神復作方死。世術或以殺印論。或以拱祿格論。俱無一毫應驗。

庚子

丑月初旬水有餘。

己丑 盱江夏良勝吏部

楠 日時類聚木神奇。

壬寅 郎中水木假傷官

曰 木衰最喜東方運。

辛亥

一到金鄉便不宜。

壬水日主。生於十二月初旬。水氣猶旺。再加年上庚子。俱是水鄉。時上金水氣旺。壬水旺甚。多好泄也。女人血氣旺盛。多好淫媒也。壬水望見寅亥進氣之木。壬則泄其精英。在寅亥木上矣。所貴者四柱有庚辛金。暗來損木。類牛山之木也。木神受病甚重。大運入卯。再逢丁卯流年。衰木得局。如枯苗之得雨。勃然而興。中江西解元。壬辰癸運。水滋枯木。擢北京吏部。又選司郎中。名顯天下。大運入己巳。有庚金刑尅寅亥衰木。王榮奏本。成遼東鏡鼎衛而死也。蓋因亥寅二字相聯。木神有氣。兩點食神。遂作假傷官格。正謂假傷官行傷官運發也。如甲木散亂。原非類聚。亦不作此格。術人妄取官印。俱斷丁卯年卯運尅損官星必死。殊無毫髮應驗。大凡看格不拘月令。只看動靜。歸秀氣在何處。十有八九驗也。

甲午

乙木生寅喜氣深。

丙寅

盱江張思布政貴

楠

通明木火耀光明。

乙丑

命木火通明之格

曰

日時癸水名爲病。

癸未

虛火南方出翰林。

乙丑日生寅月上旬。木不嫩而火亦不衰也。年月透火通明。時上木火神有氣。蓋得丑中微有癸水。透出時上。暗來尅火。作癸水爲病也。所以運行戊己。去病存火。再行南方。衰火輝耀。位擢方伯。若原無水。再行南方。亦恐泄木之氣。此則原水破火。所以火輕也。所以行南。補起火來。貴本宜也。運入壬申。破損用神。虛火死矣。此亦假傷官行傷官運。多榮顯。假傷官行印運必死。

壬子

乙生離位火雖炎。

丙午

盱江姚弘十公

楠

壬水重重制伏嫌。

乙亥

制過傷官之格

曰

水重火輕宜見土。

丁亥

北方水運實難痊。

乙木生臨午月。雖丙丁火分野之所。本來火土真傷官。本然不深畏水。何期壬癸水太多了。水多則能滅火之光矣。早行戊運。去水存火。生財大運入申壬。水得生之地。破火患足。破形幾死。幸而有戊蓋頭。己酉庚戌。帶疾處富。一入亥運。壬水得源而死。正謂破了傷官損壽元。

丁酉

丁火炎炎日主強。

丙午

福建斐應章尙

楠

最宜財庫坐下藏。

丁丑

書取建祿之格

曰

酉丑金局多坐殺。

辛亥

西方運裏姓名揚。

丁丑日主。年月干會火局。支會金局。財能生官。乃貴藏在支中有氣。丙辛合貴氣。合日干財能生殺。利名顯達。喜行西方財路。而萬里飛騰。姓自香。功名顯。壽元彊。位重權高。振皇邦。雙親先逝。鴛鴦分飛。孔懷四位。晚生三鳳。子女團圓。福壽雙全之造也。

丙寅

壬水重重氣有餘。

庚子

書林楊環五公

楠

歲時有木吐南枝。

壬子

富貴假傷官格

曰

木衰貴有庚辛病。

辛亥

運到東方大有餘。

壬子日干。生臨亥十一月。天干又有庚辛。貼助身強。壬水貴精。秀氣從何而泄。蓋喜寅亥兩木。望一陽而生。兩木類聚有情。壬水見木。而泄其真精。秀氣分明在木矣。木衰為病。又有庚辛浮金。遙欲尅木。但庚辛動金。亦不能尅地支之靜木也。一入東方寅卯辰乙之運。衰木得此。殆猶枯木之逢春也。則富貴不豐且厚乎。運入巳中有庚金損木。推其不利。入午未辰之地。午中巳土。又且損刃。則死之理。亦可知矣。



乙巳

戊臨未月土尤強。

癸未

盱江棍溪胡錫三

楠

最喜金成巳丑方。

戊子

公富命假傷官格

曰

土厚見金多秀氣。

癸丑

日嫌戕運火來戕。

戊土生未。極爲土旺也。然辰戌丑未四土之神。然辰土帶木氣尅之。戌丑之土帶金氣泄之。此戊土雖旺而不旺。故戊臨此三位。全多作稼穡格。不失中和。若未月土帶火氣也。見火以生之。所以土爲極旺也。若土臨此未月。見四柱土重。多作火炎土燥。不可作稼穡看。但臨此月之土。見金結局者。不貴卽富也。書云。土逢季位見金多。終爲貴論。若此造早年行午運尙否。火傷金也。一行辛巳庚辰二運。衰金得此。財發數千萬緡。一入寅運。甲辰年。蝦蟆瘟死。家無噍類。蓋爲火尅衰金也。

乙巳

壬臨亥月水難當。

丁亥

盱江羽士黃羽

楠

財殺重重返受殃。

壬午

翔旺變爲弱格

曰

水旺亦宜微見土。

庚戌

若教土重禍難當。

壬水雖生亥月。本爲水旺也。但四柱火土重重。年上巳冲亥祿。早年出家。丙戌運極貧。火土厚也。乙酉甲申癸運。金水有氣。原作傷官好傲。頗作威福。衣體僅能安身。一入未運。火土大旺損金。丁酉年五月。火旺月死矣。凡甲乙生寅。

卯辰月多金。丙丁生巳午未月多水。庚辛生申酉戌月多火。壬癸生亥子丑月多土者。非貧即夭。但喜二點尅神。尅多者。俱不美。至驗也。此子平之外見。屢試屢中也。

己酉

甲木生寅木尙微。

丙寅

盱江劉慶二道

楠

初旬木嫩畏金欺。

甲子

人木衰金旺格

曰

雖然有火怕金去。

乙丑

水運那堪火又危。

甲木生於寅月初旬木火初生之際。術士推其木向春生。木火通明有貴。夫何木嫩不勝金制。且酉丑合成金局。初行北方水資木氣。衣食頗佳。一入西方金旺之運。守茅菴度口。且手足瘋癱。酉運而死。若只一點金尙可也。吾都何標四公。是乙亥時也。享餘蔭行西方酉運亦死。

己巳

甲生寅月木猶輕。

丙寅

盱江劉翰十一

楠

木嫩金輕得兩停。

甲寅

公金木相停格

曰

運入西方金便勝。

乙亥

中和氣失少安寧。

甲木生寅。四柱木金。俗看則似木多金少也。殊不知正月氣寒。木神柔脆。木不勝金。甲子癸亥壬戌運。滋木。財發千緡。西方申酉戌。蹇滯申死矣。

辛卯

丁生丑月土神微。

辛丑 吁江夏岱二公

楠 卯木三重尅過之。

丁卯 印制食神太過

曰 喜有三金來尅木。

癸卯

一番病過一番醫。

丁生丑月。此命極難尋用神。蓋丑中有一己土也。得有三點乙木貼身尅之。此則用己土為用神。乙木為病也。明矣。蓋得三點辛金。又來尅木也。一病一醫。得考壽康寧者此也。一生只得酉運五年。極美之運。蓋酉字冲去卯中乙木之病也。運入東方木旺。八十有餘方死。

乙卯

丁生丑月土神明。

己丑 撫城李元六公

楠 火土傷官格自成。

丁亥 土輕木重之格

曰 只畏木多來尅土。

壬寅

再行木運禍非輕。

丁生丑月。己土透出。乃作傷官。用土明矣。初行丙戌。火來生土。財意頗遂。大運入乙木。來尅土。破了傷官而死。蓋因原有乙卯之木貼身。又有寅亥二木為助。所以再見乙運。正謂運會原有所害之神。安得不死乎。

壬辰

甲木雖衰亦有根。

辛亥 臨川吳開六公

楠 丙寅時透火神妍。

甲戌 富命假傷官格

曰 火虛有焰成真格。

丙寅

金水因知作病源。

甲木得生於亥辰年。木氣托根。甲木寅時得祿。四柱木俱得氣。又有壬水滋之。甲木則變弱成強。望見時上丙火。精光透出貼身。則甲木情思向丙火為用神也。則以壬火為破丙之病。辛金為破格之病。早行壬子癸丑。甚是平常。破壞丙火用神也。望見東南有木生火。有土尅水。有火尅金。病神淨盡。一發轟天。至庚申金水破格而死也。

丁丑

壬臨亥月水汪洋。

辛亥 休杭葉暢二貧

楠 木透天干作假傷。

壬子 命假傷官嫌印

曰 不合丑中金氣在。

癸卯

西方金運極難當。

壬水生亥。雖有月上虛財。被時上癸水劫之。雖有木為傷官。十月之木。根枯葉落。原有丑中辛金損木。一入西方酉運。會起金來損木。病患瘋癱。手足並行為丐。而又聰明者。傷官泄氣故也。

丙子

金水清清兩字奇。

丁酉 陳都爺貴命時上假

楠 時歸日祿理相隨。

壬申 食神水清金白之格

曰 分明水火為真秀。

辛亥

黃閣魁名間世稀。

壬生酉月。金水兩字雙清。金水之氣有餘。木火兩字不足。金雖有餘也。而喜天干丙丁。遙來損金也。喜無地支午火。實去破印。所以印得全美也。壬癸水氣雖有餘。喜亥中甲木。泄其精英也。其貴如此。蓋喜丙丁火。暗銷庚金。而存起亥上食神也。所以八月木氣凋零。其病甚重。所以病重者。多大貴也。運入東方。補起水火二字。位登黃閣也。宜矣。此乃天地至清之命。所以爲天下至貴人也。

甲戌

己臨未月土炎蒸。

辛未

吾都何廿八公假傷

楠

見火生身益壯神。

己酉

官富命金輕火重格

曰

土旺喜金宜泄氣。

己巳

養金喜水定超羣。

己土生臨未月。火土炎蒸。其己土之氣旺盛。更且有火氣生之。其土望見己酉兩全類聚。透出酉金。己土則泄秀氣。在金上去了。以丙丁火爲損金之神。壬申癸酉運美。入戌訟災。一入北方用水去火。財富。一入寅運。會成火局。破金而死。

戊申

戊臨未月土重重。

己未

撫城周懷魯科道

楠

燥土尤嫌火氣烘。

戊午

貴命土重見金格

曰

時歲喜看金吐秀。

辛酉

運行西北志凌雲。

戊日未月。爲火炎土燥之格。蓋得辛酉時。金神透出。歲支申宮有水破火。此以火爲病。水爲福也。大運入壬。蓋得壬來尅火。放出辛金。折桂蟾宮。理自然也。後行北方水運尤美。凡戊己土旺。見金多者。極聰明秀氣。至清至貴之命也。

癸卯

丙火生寅火局全。

甲寅 臨川袁應龍春元貴 楠 火生戊土泄精元。

丙午 命假傷官土輕木重 曰 不堪衰土重逢木。

戊戌 早步蟾宮損少年。

丙午日主。結成火局。其火旺矣。原寅中有戊土。午中有己土。又時上透出己土。其丙火身旺。見此土而好泄其精也。作火土假傷官格。然喜有甲乙木。貼身爲破傷官之病。正謂有病方爲貴格。脫辛逢癸酉流年。尅去甲木病神。所以早擢秋闈。甲戌年入亥運。原有甲木得生於亥。正謂破了傷官損壽元而死矣。蓋正月戊己帶木之土也。而土神極衰。最畏旺木尅之。入亥運甲木得生。其死也明矣。若天假之以年。若行庚戌運。庚金尅去甲木。貴不可言也。凡日干旺者。見有食神傷官。雖在日時。亦只作傷官看。何也。凡日干旺。精氣滿蓄。見有通泄血氣之處。則秀氣從之。不可泥執子平。只以月令上用神。如日主衰弱見印星。及陽刃。身弱則親印。綬陽刃也。身旺則自親食神傷官也。如用食神傷官。只要食傷類聚一處有情。不宜間隔。如前夏良勝。命用木之類是也。如此造。多不曉作用土。只以官印。若用官印。如卯亥運不死也。此則用衰土見木尅。明矣。

丙寅

甲木重重旺氣深。

壬辰 吾都傅後菴公木火假 楠 木來用火透春林。

甲辰 傷官木全寅卯辰互看 曰 柱中最喜壬爲病。

丁卯 火土重逢異等倫。

甲木生辰。稟全寅卯辰東方之秀氣。喜年時丙丁虛火透出。作木火假傷官。透出壬水。爲破火之病神。運行南方。火得地爲美。雖申酉生水破火。亦喜有丙丁蓋頭。戊己運。土能破水。放起用神。老益精神。福壽兩全。只畏北方水破用神也。

丙申 辛金生巳水重重。

癸巳 吾父啟完公 楠 刑破官星水有功。

辛卯 假傷官用劫 曰 申巳兩庚來作用。

壬辰 運行申酉樂雍容。

辛生巳月。本用丙火。夫何貼身有申。破丙明矣。年干丙火。本爲虛官可用。時有壬水破之。由是舍丙而從水也。以水爲假傷官。年月兩庚。類聚有情。正作金水傷官用劫也。行申酉比劫得生。安享其樂。入戊己破去假傷官。動多悔吝。入亥生財。大運六十九。庚金劫神死地而死矣。

丁未 陰木生寅進氣時。

壬寅 予兄希禹木火 詩 又兼三印疊資之。

乙丑 傷官官不足格 曰 財官之運重重喜。

丁亥 水火逢來實可悲。

乙生寅月進氣之木更通三印資身。無奈比劫重重爭財而財不足也。四火制殺太過。早行北方不佳。喜庚辛金蓋頭。破比劫存財星。己運財旺生官。有威震比劫之意。行亥運壬水資比劫。爭財不已。又合丙子年。火制金而水資木。書云木火傷官官要旺。用神受困。患癡症而死矣。

戊寅 火逢稼穡泄精神。

己未 貴女命作真 楠 更喜柱中印綬親。

丙戌 傷官用印格 曰 衰印最宜重見印。

乙未 衰封兩國豈常人。

丙火生未。四柱土氣重重。泄弱丙火之氣。正作火土傷官。身弱則自親印綬也。原印星衰弱。運行印旺之鄉。受夫子兩朝封贈。大運入丑。辛金破乙死矣。

辛丑 己土生申金氣重。

丙申 逸叟母命 楠 金多用火返成功。

己丑 金多用火 曰 北方見水身多疾。

庚午 日祿歸時壽福崇。



己土生申。金氣重重。傷官盜氣多者。用印而不用財也。運入庚子辛丑。壬字泄氣破印。患目而災病連連。運入東方寅卯。木生火旺。而病稍痊。然柱中真火。而又生吾兄弟三人者。何也。蓋得丙丁二火。尅去傷官。存土精英。而能旺夫旺子也。八十七歲辰運。合水破印。親壽方終矣。用印深驗。論財非深知命理也。吾母一生。夫子衣祿。賴有此丙丁二火。苟無此二火。則孤矣。

丙寅

甲生午月火炎炎。

甲午

極貧淫賤夫星

楠

尅制夫星本太嫌。

甲戌

輕而制夫旺星

曰

運再東方生火氣。

辛卯

孤貧淫妒不堪言。

甲生午月。傷辛金官星。夫星俱臨敗絕之地。火氣益炎。辛金夫星之氣益弱。且行東方。木生火熾。夫既受傷。而子胚胎損矣。一生孤貧。桑間濮上之恥。可聞乎。正謂無子也。壬辰癸巳運。衣食頗饒。蓋得壬癸水破火存夫。入寅夫絕。木作灰飛絕矣。

己丑

丁逢己土食神多。

己巳

孤貧女命土有

楠

泄損精神定奈何。

丁丑

餘木火不足格

曰

信是孤貧應有數。

己酉

子多無子豈差訛。

丁火生巳。本爲火之分野。殊不知四柱食神傷官太多。泄弱丁火精英。則是母胎虛耗。子無托生之所。正謂子多無子。若得東方甲乙運。有木尅去子星。存養丁火精神。庶幾尙可生子。此造何期運入西方。全無木氣。財神太重。財多身弱。一生孤苦貧寒無子。入戌再加一土。愈泄精神。死矣。

丙子

坐下夫星木氣微。

辛丑

孤寡木少

楠

不堪金旺木無依。

己卯

金多之格

曰

西方運入金多見。

庚午

獨守孤燈只自知。

己土生丑。透出庚辛不宜。乃夫受制太過。己亥運。夫星得生。頗遂室家之願。一入西方尅夫。孀居到老。一子不肖。宜矣。

### 印綬格

楠曰。正印偏印格者。如父母生身之義也。蓋日主得其資助。書云。印綬生月利官運。畏入財鄉。蓋財乃破印之氣也。此亦書之死格。非通變之道也。然四柱印星太旺。日主有氣。印疊生身。如人元氣本旺。再服補藥。生可存乎。此則必用見財。以破印也。四柱財少。必須運上財神爲吉。又若日主根輕。印星又弱。最畏財星。謂之貪財損印。宜也。又有真印假印。如丙日生人。生臨亥月。或用亥月甲木作假印也。十月木氣根枯葉落。則此衰木。宜行東方木旺之地。以輔助其根氣。則如枯苗得雨。勃然而興。畏己酉丑運。冲尅其木。尤畏行西方庚申辛酉。天干地支俱全。損傷

尤甚。若天干得壬癸甲乙丙丁蓋頭。雖禍亦淺。又若丙丁日主。臨寅卯多根之地。謂之真印也。若印多不畏財星。若日主輕。如只有一二點印。亦畏財也。大抵木不能勝金。謂之印綬被傷。倘若榮華不久。真假印辯。不可不究。財官印殺食神傷官。此六格。乃日干月令所出。正格外有陽刃格。此係日月相通。出此之外。或虛邀財官。或刑合財官。或暗拱財官。或冲搖財官。亦幾近理。說見下文。

繼善篇云。官刑不犯。印綬天德同官。

補曰。一說謂不犯官府刑憲。蓋因印綬天德。年月日時支同一宮分。固通格解。謂但四柱中俱有。乃同一命宮分。不必同一支。如甲寅丙寅丙寅丁酉。是天德在丁。月德在丙。印綬在寅。如庚申庚辰庚子壬午。是天德月德俱在壬。印綬在辰。謂天德與印綬同一命宮。是已尤通。嚴陵命書謂天月二德星。在日上爲的當。他處見不當作德論。古歌云。月逢印綬喜官星。運入官鄉福必清。死絕運臨身不利。後行財運百無成。

補曰。甲乙在亥子月生。丙丁在寅卯月生。戊己在巳午月生。壬癸在申酉月生。庚辛在辰戌丑未月生。或在巳午月生。皆是月逢印綬也。若四柱中元有官星。乃是官印相生。方爲貴人。誠印綬格所最喜者也。若行官鄉運。則發福必清厚。行死絕運。輕則災疾損傷。重則死亡孝服。若行財鄉。貪財壞印。其禍百端。

又曰。重重生氣若無官。常作清高技藝看。官殺不來無爵祿。總爲技藝也。孤寒。

補曰。月生日干。年時俱有印綬。是謂重重生氣也。有官方作貴推。若無官殺。非技藝之流。則庸常之輩。總爲清高之藝。亦不免孤苦寒微而已。所謂印綬旺而子息稀是已。

又曰。印綬千頭重見比。如行運動必傷身。莫言此格無奇妙。運入財鄉福祿真。

補曰。印綬生月千頭重重。一見印綬之比肩。又行印旺之運。必傷身。所謂木賴水生。水盛則木漂。木逢壬癸水漂流。日主無根。枉度秋是己。印旺遇財乃發。須入財鄉運。乃能發福發祿。如水盛木漂。必須行財運。以土制木。則木植其根。爲福。所謂歲運若行財旺地。反凶爲吉。遇王侯是也。格解所謂印綬畏入財鄉之句。不可拘泥是也。

又曰。印綬官星旺氣純。傷官多遇轉精神。如行死絕并財地。無救反爲泉下人。

補曰。印逢官星。如值所喜。則爲旺氣純也。傷官多遇。值如所忌。則不免轉而不精神也。舊文原是如此。而或者改旺氣爲運氣。改傷官爲偏官。以轉精神爲有精神。則非也。

又曰。印星偏者是梟神。柱內最喜見財星。身旺遇之方是福。身衰梟旺更無情。

補曰。印星偏者。如甲生亥月。乙生子月之類。無食則爲偏印。有食則爲梟神。柱中見偏財並正財則吉。故曰偏印遇財乃發。又曰。偏財能益算延年。身旺遇之吉。若身弱逢梟旺。則爲禍矣。所謂梟神興而早年夭折是也。

絡繹賦云。印臨子位。受子之榮。梟居祖位。破祖之基。

補曰。或曰。梟居祖位。破祖之基。甚應驗。觀六親論云。日時殺刃逢梟。半道妻兒離散可見。格解謂梟居祖位破祖之基。再詳。

玉匣賦云。華蓋與文星共會。尉遲爲五伯良臣。

補曰。文星謂印綬也。故通明篇云。印綬文華也。非文昌之文。

寸金鑑云。印綬不喜見臨官。帝旺逢之亦不懼。八字逢財無所用。行財不利卻無端。

補曰。臨官是日干行臨官之地。印逢則病。故曰不喜見臨官。帝旺是日干行帝旺之地。印逢則死。故曰逢之亦不懼。八字中最忌見財星。喜見官星。如運行財旺之鄉。則貪財壞印。爲禍百端。所謂如行死絕財旺地。無救番爲泉下人。

萬金賦云。第一限逢印綬鄉。運行生旺必榮昌。官鄉會合遷官職。死絕當頭是禍殃。淵源歌云。有印無財是福媒。喜逢官位怕臨財。主人囊括文章秀。一舉丹墀面帶來。元理賦云。水泛木浮者活木。

補曰。此言水泛木浮格也。蓋甲木生於亥。則無咎。乙木死於亥。水泛木浮。恐無聚作。又曰。水盛則漂木無定。若行土運方榮。

補曰。上文論陰木。此論陽木。蓋言甲木歸於子。水敗之鄉。柱中水印太盛。失土止者。人命得之。主漂蕩無定。風花好酒。無成之造。遇土運止水。發福爲榮。

又曰。貪食乖疑。命用梟神因有病。

補曰。如日坐梟神。或干支梟印重者。運逢食神。必主貧乏生病。更帶刑沖。作災不測。故奧旨賦云。歲月時中有偏印。吉凶未萌。大運歲君遇壽星。災殃立至。

又曰。命用梟神。富家營辦。

四言獨步云。六甲坐申。三重見子。運至北方。須防橫死。

又曰。天干二丙。地支全寅。更加生印。死見凶臨。

又曰。壬癸多金。生氣酉申。土旺則貴。水旺則貧。

又曰。癸日申提。卯寅歲時。年殺月劫。林下孤悽。

己亥 水氣重重在地支。

乙亥 臨川黃良三公 楠 木漂水泛欲何依。

丁丑 富命水重土輕 曰 最宜土運來尅水。

丁亥 財帛金珠樂有餘。

乙木生亥。重重水氣以漂之。早行癸酉壬申。木多見水不利。一入辛未庚午己巳戊辰四運。土止水流。財發萬緡。正謂印綬若多。財要見也。

丁亥 乙生亥月水重重。

辛亥 盱江劉三三公 楠 殺印分明祖業豐。

乙亥 水多漂木之格 曰 戊己運中雖發福。

丁亥 再行水運壽年終。

乙木生亥。水氣重重。但喜純粹。水原未蓋頭。蓋得財財豐富。己酉戊運。財名頗振。酉運殺輕得祿也。原殺星見水多。

泄去精神。殺弱入酉。殺星得祿。生子甚多。一入申運。壬水太旺。水來泛木死矣。

壬寅

丁火生臨亥月乾。

辛亥

盱江劉瑛千九公

楠

木神類聚喜相連。

丁巳

富命衰印畏財格

曰

柱中最怕金爲病。

辛亥

運入東方福祿全。

丁火生於亥月。火神衰弱。喜年干透出壬水。丁壬化木於亥。更得寅亥木神類聚。用神無疑矣。蓋得巳宮有庚來損木。則金爲病明矣。運行甲寅乙卯丙辰丁運。枯木逢春。又喜火破庚金存木。富享優游。入巳強寇毀廬。喪子奇禍。蓋嫌巳中金來尅木也。午未木死阻壽。

乙丑

己土雖然坐旺鄉。

辛巳

豐城孫世佑布政貴

楠

重重金氣損精陽。

己巳

命旺變爲弱用印格

曰

旺中變弱來親印。

庚午

殺運應知佐廟廊。

己土雖生巳月。本爲火生之域。夫何金氣重重。己土見金泄其精氣。賴有三重火氣。大抵土好煖而畏寒。則己土自親火爲印綬。運行己卯戊寅。殺星太旺。故曰印輕者賴官殺以生之。所以位至方伯。丁丙運火輕。猶宜補起火來。大運入子。見財而破印。財乃妻也。因妻而致禍也。蓋原無水止有火土。則東方運美。北方水運不美。此則土虛而好火。

畏水傷火子運死也明矣。

壬戌

丁火生寅木氣柔。

壬寅 崇仁方武十凌

楠 財來冲印便成憂。

丁卯 遲死貪財壞印

曰 再行財運災難免。

戊申

直待凌遲死便休。

丁火日干。生於立春後二三日。其火極寒矣。其木極嫩矣。正為木嫩火衰。不合年月兩點壬水。再來濕火濕木。時上申宮庚金冲出嫩木。且有戌字透出。年支戊土透出。月上真土。作正火土傷官用印。不合衰印受傷。一入巳運。庚金得生於巳。壞了衰印。因殺死樂安東坑陳人云千餘命。武十為首。問凌遲高罪而死。蓋透出傷官。身衰用印。印星受傷。故犯此極刑。

乙亥

丁生未月火揚威。

癸未

撫城過桓九公

楠

見木重生火不知。

丁卯

木旺無金之格

曰

大喜庚辛來損木。

甲辰

再行木運本非宜。

丁火生臨未月。火神猶旺。再見木多。返助其炎威也。初行辛巳庚運。木多見金而尅之。生財頗遂。但四柱原無一點金氣。財神無根。生財而不克大通。行寅卯。原木旺再行木旺地。殺為子星。行寅卯泄子之氣。財為妻。行寅卯助起比



劫以傷劫妻到此辟妻離子呻吟不利。豈非命該如是乎。

辛卯

去官留殺理分明。

辛卯

與夫子命去

楠

主弱分明用印星。

戊寅

官留殺同印

曰

運入南方夫子旺。

壬子

逢申破印禍來併。

年上兩重乙木夫星。天干兩辛去之。獨用寅中甲丙兩字。早行壬癸運。疊疊損兒。蓋為壬癸傷印也。入巳丙火得祿。生子旺夫。南方火旺。安享財富。脫甲患疾而死。壬水破印也。伯母瑛四孺人命。

乙卯

丙火生寅土透天。

戊寅

富女命無

楠

無夫入格福連綿。

丙戌

夫星入格

曰

身衰宜入南方運。

乙未

用印分明豈偶然。

丙火生寅。蓋寅中艮土。戌未又有土。月上戊土透出。寅月火虛。土泄精英太過。正作火土傷官用印。蓋傷官衰者用印。原喜柱中不見夫星。原若有夫行南方運。必主孤貧。此則原無夫星。則不論夫也。所以南方運。助夫生子而富。又作火虛有焰。一入申運見金。破木死矣。

### 陽刃格

### 附比劫建祿格

楠曰。陽刃格。六陽日。干謂之陽刃。理也。六陰日。干不謂之刃。但用刃之說。未究其理。則冥然不知也。書云。陽刃無沖。可極品。蓋甲日生。臨卯月。甲見卯中乙木。如兄見弟。則能分我之祖財。奪我之祖業。再加歲日時中木。又有氣。何用乙木之再來助我乎。如是。則不用刃也。而以刃爲病也。則用庚金七殺。若去其刃。雖酉中官星。沖去其刃。亦不畏也。又或甲生卯月。歲日時中。疊疊財官七殺。則日干雖旺。則變爲弱。此則甲刃爲用神。若行酉運。沖去刃星。猶如人衰弱無力。全賴弟來扶持。今被酉金殺死我弟也。則我何靠乎。則主有極凶殺傷蛇虎之禍矣。若如此等。必須。要印綬之運。生起我刃星。比肩運。以助起其刃星。又曰。煞無刃不顯。刃無殺不威。蓋日主旺。得七殺。以合去其刃星。然殺乃威武之人。刃乃威武之器。刃煞停均。多作兵刑顯宦。若日主弱。賴刃爲助。見官煞。多制去其刃。多主盜賊小人矣。然陽刃格。與建祿格頗同。但見祿不言刃者。蓋日下月令俱同一體。純和也。又若陽刃倒戈。必作無頭之鬼。理甚有驗。如丙日干。四柱太旺。又露出丁火貼身。其刃鋒愈熾。則身首安得不異處乎。如夏柱州之命。甚驗。說見人命見驗類。

建祿格者。日主得主祿之地。非官祿之祿也。書云。月令建祿。多無祖屋。而不顯言其理。人用財爲馬。官爲祿。假如甲日生寅月。甲以辛爲官。己土爲財。財官到寅。爲死絕地。人則以財爲祖業。靠官爲福神。祖業福神都無了。此格多無祖業者。甚驗矣。原甲日生寅。然寅上乃甲木之廬舍。財官空倒。又安有祖屋乎。年上若見此祿。亦主祖業飄零。帶此建格。多主刑妻。與陽刃格同。如甲日見寅。寅中有甲木來尅妻也。若四柱有根氣太旺。則不用建祿格。要官殺尅制其祿。要財星以爲身旺之倚托。若或歲日時中。財殺太多。卽旺變爲弱也。宜印運以生其祿神。宜劫運。

以助起其祿也。又曰：一見財官，自然發福。蓋身旺，廬舍內無財官，則無祖業。若運行財官，則身旺能任其財，豈不白手成家乎？

補曰：夫陽刃者，在天爲紫暗星，專行誅戮。在地爲陽刃殺，祿前一位是也。喜偏官七殺制伏，則陽刃起於邊戍，發富發貴，爲將爲相者多矣。故千里馬曰：羊刃偏官有制，應職掌於兵權。又曰：羊刃入官殺，威鎮邊疆。喜印綬生身，故三車一覽云：羊刃重逢正印，廉頗有百計之謀。又要訣云：陽刃倘同生氣，閩內推權。忌反伏吟，經云：伏吟反吟，涕泣零零。何謂伏吟？如甲以卯爲刃，庚以酉爲刃，歲運與元命相對，卯見卯，酉見酉是也。遇之必凶，卽所謂歲運併臨，災殃立至也。何謂反吟？蓋冲擊之謂也。如酉冲卯刃，卯冲酉刃是已。遇之卽咎，卽羊刃冲合歲君，勃然禍至之謂也。忌三合歲君，如流年見亥未而卯刃三合，流年見己丑而酉刃三合，如流年見戌而卯六合，流年見辰而酉六合。其人當年禍必速至，卽羊刃合歲君，勃然禍至之謂也。忌魁罡刑害，全無官印，福神相助，則爲福。化爲權貴，何謂羊刃？甲戌庚壬丙五陽干有刃，乙丁己辛癸五陰干無刃，故名羊刃。如命中有刃，不可便言凶。大率與七煞相似，凡有刃者，多有富貴人，最喜身旺坐祿，合殺有制，殺刃兩全，非常之命。

三車一覽云：羊刃有三，有劫財羊刃，甲見乙是也。不利於財官格，有護祿羊刃，甲見卯是也。大利於歸祿格，斯言誠爲確論。

若乙見丙，謂倒祿羊刃，則非也。蓋已見丙，名爲背祿傷官，誠大利於去官留殺格，名爲背祿羊刃，甚牽強解，亦謂乙見丙之說，恐不通誠是。

又曰。劫財諸格。大忌財官尤甚。雖然亦有用時。

喜忌篇云。日干無氣。時逢羊刃不爲凶。繼善篇云。君子格中也犯七殺羊刃。又曰。甲以乙妹妻庚。凶爲吉兆。觀此又不可執一而論也。

洪範云。羊刃善奪資財化鬼。又曰。身弱財豐。喜羊刃兄弟爲助。

撮要云。羊刃怕冲宜合。易鑒云。羊刃重重必尅妻。寸金法。劫財傷父亦傷妻。

萬金賦云。劫若重逢人夭壽。

元理賦云。殺刃雙顯均停。位至王侯。殺刃重而無制。身爲胥吏。又曰。男多羊刃必重婚。又曰。羊刃不喜刑冲。

萬尙書賦云。官星帶刃。掌萬將之威權。又曰。傷官有刃。將相公侯。又曰。印刃相隨。官高極品。又曰。殺刃休囚。祿薄之

士。又云。煞制刃興。主掌滿營之兵卒。若是用神輕淺。決爲吏卒卑官。又云。刃輔傷官。際一旦風雲之會。

占歌云。羊刃七殺怕逢官。刑冲破害禍非常。大怕財旺居三合。截髮斷指主殘傷。

又曰。春木夏火逢時旺。秋金冬水一般同。不宜羊刃天干透。運至重逢定有凶。

又曰。劫財羊刃不堪侵。不帶官星一世貧。甲乙互逢皆做此。縱多財帛化爲塵。

又曰。傷官不忌劫相逢。七殺偏官理亦同。若是無官不忌劫。身強遇比卻嫌重。

又曰。劫財羊刃兩頭居。外面光華內本虛。官殺兩頭俱不出。少年夭折謾嗟吁。

又曰。甲子丁卯非爲刃。乙酉庚申理亦同。合起人元財馬旺。中年顯達富豪翁。

又曰。日刃歸時。身要旺。正財忌運忌遭沖。且如戊日午爲刃。壬丑財鄉立見凶。財運無沖遠不忌。官星制刃得尊榮。月中有印印斯通。運到官鄉貴亦同。柱若財多嫌殺連。無財殺連喜興隆。

醉醒子氣象篇云。權刃復行權刃。刃藥亡身。

本註云。權殺也。刃兵也。身旺用此二端。乃兵刑首出之人也。殺旺喜行制鄉。刃旺喜行殺地。若原殺旺復行殺旺之鄉。立業建功處。不免死於刀劍之下。刃多再行羊刃之地。進祿得財處。必然終於藥石之間。數使然也。又曰。帮身羊刃喜合嫌沖。

本註曰。刃乃帮身之物。大怕身旺逢之。得一重殺與刃相合。化爲權星。若見官與刃沖戰。乃成惡殺。用者當審其輕重。好惡何如。

又曰。羊刃臨於五鬼。定須重犯徒流。

本註。如壬申生人。五鬼在子。癸酉生人。五鬼在丑。丙寅生人。五鬼在午。丁卯生人。五鬼在未。或者三合之次。一行禪師命書云。羊刃重重。又見祿。富貴饒金玉。斯可謂吉論。

理愚歌云。倒懸刃又同行。形體不免填溝壑。

本註曰。倒乃倒戈殺。懸乃懸針殺。凡倒戈殺。只犯戊字。與戊字。皆曰倒戈。懸針者。干以甲字與辛字。支以卯字。午字與申字。如此者。謂之懸針殺也。

其截歌云。羊刃更兼倒戈。必作刎頸之鬼。

經云。運逢羊刃。財物耗散。

論日刃舊註云。日刃有戊午。丙午。壬子。三日。與陽刃同法。忌刑冲破害會合。愛七殺。要行官鄉。便是貴命。若四柱中一來會合。必主奇禍。其人主眼大鬚強。性剛果毅。無惻隱惠慈之心。有刻剝不恤之意。三刑魁罡全。發跡於疆場。如或無情。或臨財旺。則主其禍。或有救神。如刑害俱全。類皆得地。貴不可勝言。獨羊刃以時言之。四柱中不要入財鄉。怕冲陽刃。如戊日刃在午。忌行子正財運。壬刃在子。忌行午正財運。庚刃在酉。忌行卯正財運。甲刃在卯。行巳午並辰戌丑未財運不妨。忌酉運。丙日刃在午。行申酉庚辛財運不妨。忌子運。

論比劫。夫比劫者。陽見陽。陰見陰爲比。如甲見甲。乙見乙之類。五陽見五陰。如甲見乙。是兄見弟。爲劫財。主尅妻害子。陰見五陽。如乙見甲。是弟見兄。主破耗防小人。不尅妻。蓋財者心之所欲。方今兄弟見之。多有爭競。如夷齊能幾人。

六親捷要論云。分祿須傷主饋人。比肩重疊損嚴親。

補曰。財多身弱。喜比劫助扶。則爲福。故曰男逢羊刃。身弱遇之爲奇。財輕身強。忌比劫奪。則爲禍也。故曰羊刃多而妻宮有損。

歌曰。甲乙相見必妨妻。敗財尅父定無疑。

金不換云。身旺比劫重。損財又傷妻。比劫遇梟食。妻遭產裏危。

六親論云。月中歸祿無財官。父喪他鄉。又曰。日逢刃。時逢劫。妻妾產亡。又曰。日時背馬分財无救助。妻兒離散。

撮要云比肩要逢七殺制。

建祿格喜忌篇云月令雖逢建祿切急會煞爲凶。

格解述前二說以俟知者察之此誠宜以傳疑不犯一智之病但不悟十干建祿一說又附註正官格亦非。

舊註以會殺爲暗會七殺爲凶兆如甲日用酉月爲官星正氣若年時子辰則會起申中庚金爲七殺乃甲之寇賊故爲凶固是然官祿之祿用令字與雖逢字建字牽強況子辰暗會合申殺尤牽強不可從。

或曰會煞謂會見七煞年時天干顯露地支隱藏無制伏者是也似勝舊註亦與令字雖逢字建字未妥亦不可從故或者又作月令建祿格此誠是但無註解愚補之曰建祿者月令十干祿是也非官祿之祿如甲乙祿在寅卯丙戊祿在巳丁己祿在午庚祿申辛祿酉壬祿癸亥祿子是也會殺者天干既見殺地支會合殺旺之謂也如甲祿在寅忌庚殺乙祿在卯忌辛殺並會殺旺無制伏者是也凡月令建祿祿隨旺行爲祿亦不宜過旺喜見財官並天干透露故曰建祿生提月財官喜透天不宜身再旺惟喜茂財源又曰月令建祿多無祖屋一見官財自然成福最忌天干帶七殺返傷福並支內會七殺太過無制伏則祿衰弱反爲凶禍故曰乙木生居卯庚辛干上逢火旺人發福殺地壽元終又曰春木無金不是奇金多尤恐返遭危柱中取得中和氣福壽康寧百事宜又曰月令建祿會殺爲凶可也又加之以雖逢切忌之辭何也蓋建祿則身旺有比肩扶助宜乎不怕殺然殺如猛虎有伏制則貴若無制會殺旺不問身強弱必凶況建祿格只喜財官最不喜干帶殺而支會旺故曰月令雖逢建祿切忌會殺爲凶則雖逢字切忌字方有着落令字建字愈明白不牽強故愚取此說又爲之解以破前二說又

觀洞玄經云。甲以寅祿。庚壬本非駕。又曰祿可以興騰。有時乎無用。則雖逢切忌之辭。有輕重斟酌益明矣。

### 喜見財官例

庚子 戊子 癸丑 庚申 古韓侍郎造

壬申 丙午 己亥 庚午 趙丞相之造

### 古見殺有制例

辛丑 庚寅 甲辰 乙亥 賀丞相之造

木旺春令。日干生旺。干頭官殺相連。只論殺。運行丙戌丁亥。制殺鄉。宜為大貴也。況甲乙與庚辛金各成配偶。所以  
不忌殺也。

### 古會殺為凶例

辛丑 辛卯 乙丑 庚辰 施洪富命之格

乙祿在卯。干頭俱透露庚辛。喜行戊亥二運。木火旺位。制伏之鄉。發福入酉運。丑酉會殺旺。死於非命。

壬寅 丙火炎光熾若炊。

丁未 夏閣老貴命火 楠 宜行殺運。薊江湖。

丙寅 有餘水不足格 曰 庚辛壬癸登黃閣。

壬辰 印比重重壽必殂。



丙寅日主歲月日上。火氣炎甚。得年時壬水透出。正謂水火有既濟之功。但四柱中火土之氣還勝。金水之氣還輕也。所以運到壬子癸丑。干支皆水。蓋爲水氣不足。以補其水也。所以連登黃閣。爲天下之首相也。其貴蓋在月干丁火。透出陽刃。合去壬殺。正謂刃殺相幫。威權萬里。一入甲寅運。助起火氣。則又火有餘而水又不足也。蓋因丁火陽刃透出。正謂陽刃倒戈。必作無頭之鬼。甲運死宜矣。

壬寅

丙丁未月火雖炎。

丁未

吾都吳高一水有

楠

水氣重侵又不然。

丙申

餘貧命不足之格

曰

火氣若衰宜木運。

壬辰

再行水運禍連綿。

丙火雖旺。不合夏至後二陰之際。水氣進氣。更加丙臨申位。三合火局。水有餘而火不足也。且在丙火下句。金水進氣。火氣將衰。若夏閣老生在丙火上句。火神正旺。此命再行壬子癸丑。豈不殺重身輕乎。初行西方。尙作蹇滯寒儒。再行北方。作乞丐宜矣。此命本不當編入。此例。但與夏推州之造。只差一字。故同編。以便比例。故也。視者詳之。

庚午

丙申雖生得祿鄉。

辛巳

吾都何泳一

楠

不堪財殺重茫茫。

丙申

火少金水多

曰

變強成弱多貧夭。

壬辰

再入財鄉壽豈長。

丙火雖得祿於巳。不合四柱金水之氣勝。早行午未運。火旺助身。衣食頗給。一入申運。財殺太多。帶疾而死。有乙未時生人。火氣頗旺。入西方頗可。此是吾都詹獎五命也。

### 專祿格

纂要云。此格甲寅乙卯庚申辛酉是也。柱中忌官殺。不宜刑沖破害。藏運亦同。

元理賦云。八專日支同類。殺運殺年多凶。正此之謂也。

壬辰

辛酉分明專祿格。

庚戌

金谿徐龍岡貴命專

楠

戌中有火喜神沖。

辛酉

祿格以官殺為病格

曰

殺星原是柱中病。

辛卯

去殺方知祿位榮。

辛酉專祿。見戌有丁。為損祿之病神。辰字去之。所以有病者貴。癸丑運癸丑年。丑刑戌火去病盡矣。聯登黃甲。其貴宜矣。只畏丙丁兩字損祿。

### 雜氣財官印綬格

### 附時墓格

楠曰。雜氣財官者。蓋辰戌丑未四字。乃天地不正之氣。為天地四箇牢獄之所。又為天地四箇收藏之庫。如丙丁日。生辰月。若天干透出戊己多。則作雜氣火土傷官格。如透出乙木多。則作雜氣印綬格。如透出癸水多。方作雜氣財官格。如戊日生戌月。身弱透了火多。作雜氣印綬格。透辛金作雜氣傷官格。又曰。雜氣財官喜見沖。惟日干旺。

用雜氣財官者。喜見之。原財藏天地之庫中。牢密堅固。如戊日生辰。月癸乙爲財官。錢在庫中。十分牢固。若無戊時鎖匙。豈能開之。沖開財庫。福興隆然也。若不用財官。則不可把沖開作論。當以中和偏枯看。或嫌其沖爲害神。再沖出來。其害愈甚。如丙日生辰。月露出乙木印星。再看又有乙木體貼作印綰格。柱中原略有金氣。原印星衰也。若再行戊運。戊中辛金。沖破我辰中乙木。此則是貪財壞印看。豈可雜氣財官喜見沖論乎。又如丙丁日生成。月透出戊土多。作雜氣傷官格看。原日干丙丁屬火。到九月授衣之月。火氣寒涼。見土多泄弱火之精。喜東方木運。尅去其傷官。不來泄我。喜木運。又來資我。則吉。若到辰運。再沖出戊中戊土來。愈泄弱我精神。安得不死。此亦不可作雜氣財官喜見沖也。惟身旺有財官。方喜沖開。早年發達。此格與傷官甚難看。此格要露庫中何物出來。方可定用神。書之中概以沖開爲美。豈不謬也。

古歌云。雜氣財官印月宮。天干透露始爲豐。財多官旺宜沖破。切忌干支壓伏重。

補曰。財者養命之源。官者扶身之本。印綰者資身之基也。此三者藏蓄於辰戌丑未之月。乃四隅之氣。非天地東西南北之正氣。故曰雜氣財官印綰格。此格喜透露。喜刑沖破害。或用財官。而財官透。或用印綰。而印綰透。透財則富。透官則貴。透印則吉。享萬物之見成。故曰始爲豐。若財官印閉錮於庫中。不沖不刑。則少年不發。庫中人以宜沖破也。若支干則遇比劫之壓伏。官遇食傷之壓伏。印綰遇財星之壓伏。而且太多。則欲其富貴。而享見成之福也難矣。故曰切忌干支壓伏重。

又曰。辰戌丑未爲四季。印綰財官居雜氣。干頭透出格爲真。只論財多爲尊貴。

補曰。辰有乙戊癸。乃水土之墓庫爲春季。戌中有辛戊丁。乃火之墓庫爲秋季。丑中有癸己辛。乃金之墓庫爲冬季。未中有丁己乙。乃爲木之墓庫。爲夏季。此四季中所藏印綬財官。皆天地不正之氣。故曰居雜氣。須看格中透出何字爲福。大概雜氣格。透出貴氣固爲妙。亦以財多爲尊貴。所謂無官見財。亦能生官。多爲及第之命是已。

又曰。雜氣從來自不純。天干透出始爲真。身強財旺生官祿。運見冲刑聚寶珍。

補曰。辰戌丑未。居於四隅。雖非東西南北純然之正氣。然天元透露。方爲真格。身強如庚申辛酉之類。財旺如未木行東方。戌火行南方。辰水行北方。丑金行西方。生旺之地。則自有青紫之貴。而發官發祿矣。四柱無有冲刑而運逢之。則珍寶自聚。所謂倉庫盈金滿屋是已。

又曰。五行四季月支逢。印綬干頭再顯榮。四柱相生喜官殺。更饒財產有崢嶸。

補曰。甲乙生於丑月。丙丁生於辰月。戊己生於戌未月。庚金生於辰戌月。壬癸生於戌月。皆月支逢季月也。各有印綬藏庫。喜干頭顯露。又要柱中官殺相生。財星有氣。則財生官。官生印。印生身。身尅財。則榮貴。所謂印賴殺生。官因財旺是已。或曰。此以雜氣印綬言。有官祿。不惟貴顯。更資財產業饒。不要見財亦通。

又曰。月令提綱不可冲。十冲九命返爲凶。惟有財官逢墓庫。運行到此返成功。

補曰。財官遇於提月。最不可冲。冲則十有九凶。惟財官居庫。不冲不發。須行冲運方能發福。

又曰。生旺須逢墓庫絕。墓庫必來生旺發。生加生旺過非宜。墓庫逢休終不發。

補曰。生加生旺過非宜。此申上文生財須逢墓庫絕而言也。非有別意。墓庫逢休終不發。曰上文墓庫必來生旺。

發而言也。亦非有別意。如柱中財官印生旺。不宜入財官印墓地。故曰旺官旺印與旺財。入墓有禍。如日干生旺。不宜入日干庫地。故曰身旺入庫必興災。墓必來生旺發。如財官居墓庫。必來財官生旺之地發財發官。如身主墓庫。必來身主生財之地可以發身。又主加生旺過非宜。如財官生旺。加以財官生旺之運。則太過有咎。所謂財多無財。運逢化殺生災。官多無官。太旺傾危是已。如身居生旺。加以身主生旺之運。則太過必禍。所謂遇生地之相逢。宜退身而避位。生地相逢。壯年不祿。是已。墓庫逢休終不發。如財官居墓庫之地。又逢財官休敗之運。何以發財發官。如身主居墓庫之地。又逢身主休敗之運。何以發身。

三車云。財官雜氣格。透出財者富。透出官者貴。透出印綬者享。父母田產宅舍財帛之富。有文書宣勅蔭庇之貴。如無透出。沖刑少許。則發身旺爲妙。不宜身弱。沖刑太過。景鑑云。雜氣財官身旺。有沖而發。若太過反受孤貧。孤貧者。身弱閉庫財浩蕩。兩處刑沖是也。

集說云。庫財者蓄藏之謂。辰戌丑未是也。如月令透出者。或歲時透出者。亦不要一點官星。可用此格。由見辰土庫在辰爲財庫。須四柱天元透出戊己爲妙。大抵四柱中有財氣多者。無不入貴格。無官見財亦能生官。多入及第之命。但不要閉藏於庫中。須要刑沖破害。以開其局。方能發福。

又曰。夫庫官者。蓄藏之謂也。以辰戌丑未四季月令得之是也。但不知庫中所透何物。用月干透出者妙。或歲時透出亦得。卻要刑沖破害身旺。方可透出七殺。不怕刑沖破害。尤喜制伏之地。又要有合。方可爲貴。如無制伏。又無合。本身又弱。必爲害也。如丙子日見辰時爲庫官。必難發於少年。多屬水庫。但不要天干傷官。如傷官主幸號。

晚成行運亦不要行傷官之地。喜官星之鄉。喜身旺官旺。喜沖喜露。天干財印忌閉。

又曰。如丙丁生人。以辰庫官。水土庫於辰故也。須年月日時中有木。或亥卯未並寅爲清。如無木。則土奪丙丁之官。則濁卑而不清。亦不榮顯。洪範云。時逢乙木與南墓。雖富而不仁。丙遇金陰而北墓。縱貧而有德。

補曰。南墓謂未庫也。北墓謂丑庫也。陰金謂辛金丙火之正財也。

又曰。辰戌丑未全備乃財庫。富貴之尊。

又曰。財星入墓。正主刑沖必定刑妻。

又曰。冠帶互逢。定是風聲之醜。

補曰。辰戌丑未互換。犯之故曰互逢。定主風聲不美。此以女命言。男命遇之。大富貴。終主尅父母。

又曰。四柱有鬼之墓。乃夫已入黃泉。歲運夫星絕之鄉。定主鴛配分飛異路。

集說曰。八字之中。甲以辛爲夫。遇丑是金鬼之庫。若重見辛。必主夫已死入黃泉也。流年大運入官鬼絕敗之地。定主夫婦死別之兆。

又曰。財星入墓。少許刑沖必發。

四言獨步云。月生四季。日坐庚金。何愁主弱。旺地成名。

又曰。壬日戌提。癸干未月。運喜東方。逢尅則絕。前或改爲逢沖則絕。

又曰。戊己丑月。比肩不忌。疊金入格。忌逢午戌。

又曰。曲直丑月。比肩帶印多金。壬癸丑日。土厚多金。

補曰。曲直謂甲乙木生丑月。多金則貴。印能化殺故也。壬癸生丑月。土厚則貴。以其金庫生申故也。

古歌云。財官遇在庫中藏。不露光芒福不昌。若得庫門開透露。定教官貴不尋常。

繼善篇云。納粟奏名。財庫居正旺之地。此段格解附正財下悞矣今正定。

補曰。此段有二說。一說財庫居生旺如金人。生於未月。是謂財庫。要日干居於自生自旺之鄉。方能長財發福。此

說可從。格解謂但解本文未順。非也。蓋取用憑於生月。取四季之月。為雜氣財庫。或雜氣時。本有以日坐庫。如辛

未日。而取格者也。況雜氣喜身旺。謂日干取於生地。如甲子日。居子自旺。如甲寅之類。生於辰月。為財庫。

舊註謂須要一物開之。如戊冲開辰庫是也。又要戊己土透露。於年月時干。不可見比劫壓於干上。經曰。少年難

發庫中人。只怕有物壓之。故曰納粟奏名。此說誠順而有理。何謂不順。

一說此言世之人。納粟奏名者。乃是身臨財庫。居於月令生旺之地。假令金以木為財。庫於未。辛未日生人。是身臨

財庫。若生於冬月。謂之財庫居生地。若生於春月。謂之財庫居旺地。故曰財庫居生旺之地。此說亦似牽強。蓋雜

氣喜身旺。如身居休囚之地。天元羸弱。何以勝此生旺之財。所謂財多身弱。正為富室貧人。豈能納粟奏名乎。財

庫固要生旺。須要身居生旺。可以當之。此說不如前說。亦當參者。如身居生旺。財庫亦生旺。更妙。可外身而專言

財庫生旺乎。

鷓鴣天云。雜氣財官仔細推。乾坤四季吐光輝。身強財旺生官位。運至中年挂紫衣。官星顯達利名齊。輕裘肥馬鳳

鳳池英雄若得開財庫。五花官話拜丹墀。

又曰。印綬生身稟氣清。辰戌丑未月中生。四柱無財當顯達。遇印升加福壽增。官旺之運定亨通。龍樓鳳閣也馳名。無滯早年登甲第一聲。霹靂振家聲。

玄機賦云。旺官旺印與旺財。入墓有禍。傷官食神並身旺。遇庫與災。

補曰。官輕印輕財輕。入墓無妨。如四柱財官三合太旺。則天元羸弱。又入墓連三合。則官旺尅身。財旺生殺。則羸弱太過。必禍。如四柱印綬太旺。重重三合。又入墓連三合。則生氣太過。必禍。空謂木盛水漂。土多金埋是已。柱內

傷官食神輕。遇庫無災。若傷官食神三合太旺。又遇墓合。則絕氣愈甚。必災。此以身弱之極而言。已註論傷官格內身弱

遇庫無災。惟四柱比劫三合。則身旺已無倚劫。又遇庫則身愈旺。無制必災。此以身旺之極而言。故曰生旺雖逢墓庫絕。生加生旺過非宜。又曰中和爲福。偏黨爲災。

### 金神格

楠曰。甲日金神格。取癸酉乙丑己巳三箇時。書曰甲日金神。偏宜火制。又曰金神遇火貴無疑。金火災殃定有之。此格多生大貴。但論之未明顯。但甲日四柱氣旺。金神又或有一二點者。遇火制之極貴。此卽同時上偏官格一樣。看若金神氣輕。柱中有火制之太過。大畏火鄉太制。共金神。又喜金水以助其金神也。

乙日金神。乙丑己巳癸酉三時也。主多貴。己日見巳酉丑金。己見金而泄其氣也。卽時上假傷官也。何以言之。書云。己日金神。偏嫌火制。若己日干精英涵蓄太過。望見此三時。金清而且秀。己土貪生而泄其秀氣也。若原帶火。



金神氣衰。最畏火而傷之。喜金運以助金神。喜水運破火。存起金神。多主富貴。若己日干原衰。金神犯重。己土見金而太泄也。則又宜火運。以破金而存己土也。

舊賦云。夫金神者。只有三時。乙丑己巳癸酉是也。是乃破敗之神。要柱有火局制伏。運入火鄉爲勝。如柱中帶羊刃七殺。眞貴人也。若四柱中有火局。及運行火鄉。便爲貴命。若無制伏。則寬猛不濟。柱中怕見木及水鄉。運則爲禍矣。亦要月令通金局。或有金氣方論。

古歌云。金神己酉丑之時。殺刃中來眞貴人。運氣宜逢火局。水鄉相見禍臨身。又曰。性多狠暴才明敏。遇木相生立困窮。制伏運行運火局。招遷貴顯富無窮。

丁亥

日干己未坐金神。

癸丑

金谿高谷南少卿己

楠

土厚金輕理自眞。

己未

日金神土金假傷官


曰

運轉西方金旺地。

癸酉

金輕豈作等閑人。

己未日主。生於丑月。兩土氣厚。凡身旺多好泄也。見酉丑結成金局。用金爲假傷官。又爲己日金神。蓋喜有甲乙木之官殺。爲傷官格之病。所以運行西方金運破木。其貴宜矣。



# 神峰通考卷三

臨川西溪逸叟神峰張楠著

## 飛天祿馬格 附倒冲祿馬格

楠曰。飛天祿馬格。蓋取祿爲官。財爲馬。蓋只有庚子日。見子字多。冲出午中丁火爲官星。冲出己土爲印星。則庚日得官印矣。蓋欲子多。則能冲出。亦畏有丑字。則欄路道不能冲出。畏午字丁字己字。則破格。壬日干喜子多。暗冲出午中丁火爲財星。己土爲官星。則壬日有財官矣。亦喜子多。則能冲出財官。畏見丑欄之。午破之。又癸亥日。又見亥時。柱中本無官星也。用亥字倒冲出巳中丙火爲正財。戊土爲正官。畏子字欄住路不能冲。及巳運破其格。蓋亦喜亥多方能冲出。又丁巳日干本無官星。喜巳多。暗冲出亥中壬水爲官。要巳多方能冲。畏午字欄之。亥字破格。此數格俱以日干月時無官。俱要巳多。暗冲其官星出來。此數格自非造化自然之理。故作聰明。以取其理。但庚子壬子癸亥三個日子。亥多者多見富貴。但庚子日主。若見子多似水金泄氣。似要有火暖之。若金水氣太寒。失中和之道。亦不可以飛天論之。丙午日午字多。暗冲子中癸水爲官。理亦同前。此格俱係本然無官星。但以類聚我。又多冲之。以取其官。此理似無而又有。似非而僅是也。

喜忌篇云。內有正倒祿飛忌官星亦嫌羈絆。

楠曰。內有者。蓋言四柱中有庚子壬子辛亥癸亥四日。爲正飛天祿馬格。固忌官星填露。亦忌合神羈絆。有丙午丁巳二日。爲倒飛天祿馬。固忌官星填露。亦忌合神羈絆。如庚子日。要柱中有子字多。虛冲午中丁字出。爲庚日之官星。柱中有寅字戌字。或未字。但得二字合午爲妙。不要四柱中有丑字絆字。則子字貪合不能冲午中之祿。若柱中有子字午字填實。或丑字絆住。則不貴也。丙己字爲七煞偏官。則減分數。歲運亦須忌之。如古蔡妃造。

己未 丙子 庚子 丙子 以三子暗冲午而未合也。如壬子日。要柱中有子字多。虛冲午中己字出。壬日得官星。柱中有壬戌未。得一字可合爲妙。亦不要四柱中有丑字絆住。則子字不能去冲午中之祿。若四柱中有巳字午字填實。或丑字絆住。則不貴也。戊己字爲七煞偏官。則減分數。歲運亦須忌之。如古橫行正使浩造。

壬子 壬子 壬子 壬寅

亦三子暗冲午財官也。則以三子冲午填實爲禍。

壬子 壬子 壬子 丙午

鷓鴣天云。祿馬飛天識者希。庚壬二日報君知。暗逢丁字爲官祿。寅戌來合換紫衣。擎象簡。佩金魚。凌烟閣上姓名題。虛合官星財祿厚。金榜標名到鳳池。

古歌云。庚寅二日重逢子。虛冲祿馬號飛天。如行金水多清貴。運轉南方數有邇。如辛癸二日生亥。柱中亥字多。冲出巳中丙火戊土爲官星。柱中要有申酉丑字。但得一字合起爲貴。若柱中有戊己丙三字。則壞。此格有戊字。則亥不能去冲。歲運亦忌。運重太歲輕。再見巳字填實。則爲禍矣。

楠曰。舊經傳甚明。但辛癸日。多逢亥字冲巳。若四柱中有戌字。則亥不能去冲。何也。蓋亥見戌爲天羅。主一生蹇。

滯凶害。所以不能去冲。與他羈絆不同。或者疑舊文戌字。謂恐作寅字。非也。如相丞造。丁未。癸卯。癸亥。癸丑。亥冲丑合

古曹郎中造。壬申。辛亥。癸亥。壬子亥冲申合

鷓鴣天云。飛天祿馬貴非常。辛癸都來二日強。無庚丙戌生官祿。逢合冲官近聖王。利祿俱顯姓名揚。酉丑一位最高強。運逢巳午凶災起。歲歲年年受禍殃。

庚子 庚申日主子申重。

甲申 高功韶尙書 楠 午內財官暗喜冲。

庚子 飛天祿馬格 曰 金水兩干無剋雜。

甲申 邦家萬世有奇功。

也。庚生申月。下通申子之氣。水盛則能動午中丁己作財官。再行北方。重重水氣冲之。又喜身主有氣。飛天祿馬格真也。

倒冲祿馬格。舊賦云。丙午日。柱中用午字多。冲出子宮癸水爲官星。不論帶合。若柱中有未字絆住。則午不能去冲。柱中大忌見子字則禍也。如丁巳日。柱中用巳字多。冲出亥中壬水爲官星。柱中忌見壬亥字不美也。不論合。若四柱中有辰字。則巳不能去冲。歲君大運亦同。運重歲君輕。

楠曰。舊經文明白。但丁日巳字多冲亥。若四柱中有辰字。則巳不能去冲。何也。蓋巳見辰爲地網。主多生蹇滯凶。

害。所以不能去冲。與他羈絆不同。而或有疑舊文辰字。當作申字。亦非也。

易散云。丙丁離巽動江湖。歲運無官入仕途。厚利榮名還有利。定教榮貴感皇都。

又曰。丙午丁巳名倒刑。若無辰未絆相宜。不逢壬癸來填實。富貴雙全大出奇。

繼善篇云。得佐聖君。貴在冲官逢合。此正倒祿飛之謂也。

### 子遙巳格

楠曰。子遙巳。取甲子日甲子時。蓋取子中癸水。遙動巳中戊土。戊土動丙火。丙火合辛金。甲木得辛金爲官星也。忌四柱天干有庚金七煞絆住甲字。辛字官星破格。及有午字冲子。不能動也。當以搖動之搖字。但此遙遠作合理亦通也。月令有正格可用爲是。無正格以此取用。此理近是而非。屢試亦有驗。畏西方申酉戌巳酉丑運。實了官星也。

喜忌篇云。甲子日再遇子時。畏庚辛申酉丑午。

或曰。此格舊傳以甲子日見甲子時。其子遙合巳宮戊土。來動丙。又去合酉中辛金爲官星。要行身旺鄉。如月令通木。方論歲運。及四柱中忌有庚辛申酉字爲官殺填實。又忌丑字絆住。午字冲子。不能去遙。併未有喜官運之說。而格解喜官運何也。余曰。此格固不可見正官星。若生春月。又坐印重重。並生冬月。印愈旺矣。無官則身旺無極。歲運遇見官星。多有資財昌盛功名顯達。大富貴者。余嘗驗之矣。故曰木旺得金。方成棟梁。官印兩全。乃是貴人。此等格局。亦當通變。不可執一。以爲不可見官星格解。此說極是。經曰。通變以爲神是也。觀古歌云。甲子靈逢

甲子時。休言生旺不相宜。月生日主根元壯。運入官鄉反得奇。則格解非無稽也。可見矣。或者不悟此歌。改月生日主根元壯。而爲無根壯。又改運入官鄉反得奇。而爲反不奇。俱非。只以生春月冬月。干支水木太多者論。要輕重較量。如生傷官食神印綬財官之月。只以六格斷之。不可作子遙。不然則差之毫釐。謬之千里。

己亥 乙亥 甲子 甲子 古錢丞相造

自十六七後。就行金鄉酉申運。並運干庚辛金四十年不斷。官至宰相。則生月多印綬。當行官運也明矣。

丙寅 壬辰 甲子 甲子 古趙知府造

三十旬內。行申酉官鄉運。功名顯達。官至知府。則生春身旺之月。喜行官旺也明矣。豈可以遙已爲皆不可見官星。填實哉。

鷓鴣天云。甲臨子位日時全。遙作蟾宮折桂僊。癸水子中遙已動。丙戌相合用祿權。財滾滾。福綿綿。白衣脫去紫羅穿。庚辛申酉丑午絕。富貴榮華四十年。

### 丑遙已格

補曰。丑遙已格。取癸丑日。丑字多遙合巳中戌土爲官星。要丑字多。又辛丑日。亦遙合巳中丙火爲官星。畏有巳字填實。畏有寅字絆了丑。不能遙。理亦同前。

辛癸日多逢丑地。不喜官星。歲時逢子巳二宮。虛名虛利。

或曰。此格舊傳以辛丑癸丑二日用丑多爲主。以丑辛動巳中丙火戌土爲官星。喜申酉二字。但得一字合起爲

妙。若四柱中原有子字絆住。巳字填實。不能去遙。歲運亦同。原無官星。方用此格。未有喜官運之說。而格解謂喜官運何也。余曰。此格固不可見官星。然四柱身極旺。亦喜官鄉。運與子遙同斷。故古歌云。辛日癸日多逢丑。名為遙巳合官星。莫言不喜官星旺。誰信官來返有成。又觀古歌云。諸般貴氣雖合格。六格大綱難去得。更看向背運辰行。不可一途而取格。子遙丑遙二格身大旺。喜向官運益明矣。

鷓鴣天云。癸辛二日丑宮中。遙合巳上得官星。申酉合巳功名顯。富貴榮華萬事通。丙丁破。戊己冲。重裊列鼎反恩。榮年時有子終爲絆。如無此字位三公。

補曰。丙丁破。是言辛日大運遇丙丁官殺也。戊己冲。是言癸日大運遇戊己官殺也。重裊列鼎反恩榮。正格解所謂喜官運也。

### 壬騎龍背格

格曰。壬騎龍背格。取壬辰日辰字多。則能冲出戌中丁火爲財星。要辰字寅字多。寅多則能合戌。然以騎龍爲言。非根正理。但美名以取動人聽信。取辰字多冲戌。理亦頗有。不可專以此論禍福。八字中無別正格。方以此參看。喜忌篇云。陽水疊逢辰位。是壬騎龍背之鄉。

古賦云。此格以壬辰日爲主。四柱見辰字多者貴。寅字多者富。壬日坐辰土。以丁爲財。以己爲官。以辰冲戌中丁戊。壬辰日得財官。而寅午戌三合。或壬日坐寅。却要年月時上多聚辰字。方可爲貴。若壬辰日有年月時上皆有寅字。只爲富命。以寅午戌爲財得地。若年月時皆辰字。則冲出財官。所以名揚四海。威振八方。而大貴也。



古歌云。壬騎龍背怕官居。重疊逢辰貴有餘。設若寅多辰字少。須應豪富比陶朱。  
鷓鴣天云。壬騎龍背喜非常。寅字多兮福命祥。辰字若多官印重。韜畧英雄佐聖王。榮封紫誥綬金章。澄清四海鐘  
邊疆。先賢立就窮天理。肅整威儀壓四方。

### 井欄义格

補曰。井欄义格。蓋取庚子庚申庚辰三日。要申子辰全。冲動午戌財官。爲庚日之財官也。畏有寅午戌字。則破壞  
此格矣。

庚日時逢潤下。忌壬癸巳午之方。時遇子申。其福減半。舊註曰。此論井欄义格。蓋言六庚日生人。地支得申子辰  
全。乃謂全逢潤下。蓋庚用丁爲官。而子冲午。庚用未爲財。而申冲寅。戌中戊土爲庚之印。而辰冲之。以申子辰三  
又來冲寅午戌。爲財官印綬。四柱中須用申子辰全爲貴。不必三個庚字。若有三庚尤妙。只要庚日生庚年日時。  
或戊子戌辰不妨。但得支申子辰全也。喜行東方財地。北方傷官。南方火地不爲貴。此乃壬癸巳午之方。而此格  
最忌者也。若是時遇丙子。則是時上偏官。若時是申時。則是歸祿格。其福減半。則福氣不全。虛名薄利而已。  
補曰。忌壬癸巳午之方。謂忌北方傷官。南方官運也。舊註甚明。或改忌壬癸巳午之方。爲忌壬癸之方何也。傳云。  
中和爲福。偏黨爲災。格中申子辰。曾傷官之旺。若再遇北方壬癸運。則傷官洩氣太過。必禍。正所謂四柱若三合  
傷官之殺。及運行傷官。其禍不可言也。

鷓鴣天云。庚日全逢申子辰。井欄义格合官星。相逢三格多官印。巳午未臨受苦辛。壬癸破。丙丁冲。柱運無逢得顯

名不作蓬萊三鳥客也。須金榜玉塔行。觀壬癸破之句。則考經文所謂忌壬癸者可見。又觀吾邑

王封君造 癸卯 庚申 庚子 庚辰

合此并欄又格。宦成名立。勅封御史。至壬子運。癸亥歲。干支俱傷官太過不祿。則經文所謂忌壬癸者益信。

### 六乙鼠貴格

楠曰。六乙鼠貴。只取乙亥乙未日見丙子時。蓋子來動巳。然巳與申合起庚金。為乙木之官星。見庚辛則破乙。不能取用。若乙丑乙酉乙巳日。坐下官星破格不取。乙卯日則刑破子。亦不取。見午字則冲破子。不取。有正格只論正格。無正格方論此格。近理之所無也。

喜忌篇云。陰木獨遇子時。為六乙鼠貴之格。

三車一覽云。此言六乙鼠貴格。陰木者。乙木也。獨遇子時者。用鼠不用猴也。貴即天乙貴人也。乙生人以子申為貴人。蓋言六乙日。獨遇丙子時。值天乙貴人。為六乙鼠貴之格。申時則官星顯露。所以不取也。

舊註曰。此論大怕午字冲之。丙子時子字多為妙。鼠之聚貴也。或四柱中有庚字辛字申字酉字丑字。內則庚辛金則減分數。歲君大運亦然。如月內有官星不用此格。若四柱元無官星。方用此格。

古歌。乙巳鼠貴格。陰木天干丙子時。乙巳連貴實為奇。無冲官殺方為美。少年準擬拜丹墀。

又曰。乙木天然時。丙子無官冲害方。為此管教一舉占鰲頭。播名四海振今古。

又云。六乙鼠貴格。乙日須逢丙子時。如無午破貴尤奇。四柱忌逢申酉丑。若無官殺拜丹墀。

又曰陰木逢陽要子多。名爲鼠貴貴嵯峨。柱中只怕南離位。困苦傷殘怎奈何。  
鷓鴣天云。六乙時逢丙子中。官高位顯福興隆。午字顯露非爲貴。尅破用神定主凶。防酉丑。忌庚辛。傷官四柱合豐。  
亭柱無官殺榮華顯。玉殿金塔有路通。

補曰。此格忌官殺冲刑破害。丑爲官庫。所以並忌。夫有丑絆子之說。而或以爲忌丑絆子非也。此子字爲六乙天乙貴人。喜合不喜冲。非若遙巳祿飛之子字。而丑爲羈絆也。

### 六陰朝陽格

補曰。六陰朝陽格。蓋取六辛日。四柱無官殺。方取辛以丙火爲官。蓋取辛日戊子時。子能動巳。巳能動丙火。作辛日官星。只取辛亥辛丑辛酉三日。若辛巳日。有丙火爲破格。辛卯日則卯破子。則不能合巳。辛未日則見未中丁火爲七殺破辛金。亦畏巳字破格。午字冲子。不能動巳。只喜財運。畏官殺運。破格也。有別格則用別格。理不出於自然也。

古歌云。辛逢戊子號朝陽。運喜西方祿位昌。丑午丙丁無出現。腰金衣紫入朝堂。

補曰。丑午丙丁無出現一句。蓋言丙丁不可填寫。午字不可冲子。以照經文誠是。外經文併傳不可見丑字絆子則非也。蓋丑爲金庫。乃身旺地。亦朝陽格所喜者也。觀古造。西王大尉命。辛丑日戊子時。富貴之極。則丑不能絆子也。明矣。如子遙巳格。用子巳遙合。怕丑絆住。不能遙。飛天祿馬格。用子字暗冲。怕丑絆住不能冲。此朝陽格子。字乃實字不用合。不用冲。何畏於丑哉。

繼善篇云。陰若朝陽。切忌丙丁離位。

補曰。此離位謂南方巳午之位。與丙丁相照也。格解離位。謂巳午未。加以未字非也。未乃財神本庫。又印綬旺地。故舉繼善篇。朝陽生於季月。可稱印綬。觀古造王郡主命。

己未 辛未 辛未 戊子 有三未字。貴爲干侯。則未字不忌也。明矣。

秘訣云。辛日子時。忌行火地。西北行來則吉。東南一去憂凶。

補曰。格解云。西北行來。北字恐誤。非也。蓋西北謂水運。行辛亥。辛謂西。亥謂北。故曰西北。況納音屬金。朝陽喜金旺之地。大運行庚子辛丑。庚辛爲西。子丑爲北。故曰西北。況納音屬土。朝陽喜印旺之鄉。此所以曰西北行來則吉也。格解疑北字恐誤。是泥於北方水鄉大忌之說。不知秘訣西北。以納音言也。東南一去憂凶。謂大運行乙巳。乙謂東。巳謂南。故曰東南。況納音屬火。朝陽最忌火鄉。此所以曰東南一去憂凶也。不然。東方財氣火鄉。何以曰憂凶也。

古歌曰。辛日單單逢戊子。六陰貴格喜朝陽。丙丁巳午休填實。歲運輸逢一例詳。

補曰。星士多以辛日單單爲日宜單。不可再見辛字。非也。蓋言單單見戊子。不可再見子字也。子乃一陽初生。再見子字。非單單也。故曰六陰盡處一陽生。格解未及。故附補之。

戊辰 辛酉 辛酉 戊子 古張知院造

戊辰 辛酉 辛丑 戊子 古西王大尉造

觀此二貴造。可見單言辛者非也。

鷓鴣天云。戊子時逢六日辛。朝陽動丙合官星。庚辛若遇堪爲喜。紫綬金章拜聖君。寅卯貴。丙丁貧。北方運至定傷身。中和純粹爲官貴。定作三台八位臣。

## 刑合格

補曰。刑合格者。取癸亥癸卯癸酉日。見甲寅時。原四柱無官殺。方可用。蓋取寅時。則寅能刑巳。則刑出巳中戊土作官星。則戊與癸相合也。故曰刑合格。若癸巳日。則有戊土破格。癸未癸丑日。坐下有七殺破格。又畏有巳字。亦破格。有申字。則申來冲破了寅。則寅不能刑出巳也。理出人爲。

喜忌篇云。六癸日時。若逢寅位。歲月怕戊己二方。

舊註曰。此論刑合格。以六癸日爲主星。用戊土爲正氣官星。喜逢甲寅時。用刑巳中戊土。癸日得官星。如庚寅刑不成。惟甲寅時。是行運與飛天祿馬同。若四柱有戊字己字。又怕庚寅傷甲字。刑壞了。忌申字。則減分數。歲君大運亦忌。

古歌云。癸日生人時甲寅。最忌四柱帶官星。若無戊己庚申日。壯歲榮華達帝京。

補曰。癸日生人。卽六癸日。時甲寅。卽時若逢寅位也。惟此爲刑合格。最嫌四柱帶官星。蓋言用寅暗刑巳中戊土。爲癸日之官星。怕四柱中帶戊並己填實。言官星。則殺亦在其中。故下文云。若無戊土之官。己土之殺。並己字填實。及庚金尅甲。申字冲寅。可謂此格之純。則早年發達。登庸朝宁矣。

又曰。陰水寅時格正清。又愁庚尅不能刑。運行若不填蛇地。方得清高有利名。  
又曰。癸日生人得甲寅。此名刑合格爲眞。若無戊己庚申字。便是腰金帶玉人。  
又曰。癸日寅時刑合格。入此格時須顯赫。官星七殺莫相逢。庚申巳字爲災厄。  
鷓鴣天云。但求癸日甲寅時。刑出官星貴可知。寅申冲出多災禍。若見庚金便主悲。逢戊己遇刑冲。一生名利必然無。年時日月無刑害。須還馬上錦衣榮。

補曰。舊註謂寅暗刑巳中戊土爲癸日之官星。怕見庚尅寅中甲木。申字冲寅。刑不起官星。未有怕見亥字午戌字爲羈絆。而或者乃創爲亥字午戌字爲羈絆。則非也。觀古潘節使造。

乙未 癸未 癸亥 甲寅 則亥不絆寅也明矣。

甲戌 甲戌 癸酉 甲寅 古陳侍郎之造。則午戌不能絆寅也明矣。非若遙巳祿馬之忌絆神也。

### 合祿格

補曰。合祿格者。蓋取六戊日。逢庚申時。原四柱無官印。方取此格。蓋取時上庚。合起乙木爲戊土官星也。只畏甲木尅戊。制了本身。又畏丙字破了庚字。不能合乙。又畏寅字冲破了申字。又畏卯字見了官星。書云。庚申時逢戊日。食神干旺之鄉。歲月犯甲丙卯寅。此乃遇而不遇。緣此格只作時上食神格。若歲月無官殺。此格亦出正理。只要不傷破庚申兩字。多亦有驗。一拱貴格。蓋只取甲寅一個日子。見甲子時。何爲貴。蓋取甲日取辛金官爲貴。蓋拱丑中辛金官貴也。蓋取子寅兩字爲佳。丑字在中間走不得耳。又取日時兩甲夾住丑中辛金。只畏庚字來破甲。

則不能拱。又畏申字破寅字。則亦不能拱。丑亦畏午字。冲破子字。亦不能拱。丑又畏庚辛申酉。己丑破格。此格頗驗。但不要得中和。太旺太弱。爾不取。原此格蓋丑申辛金爲貴。又取甲日見丑。爲天乙貴人之義也。

格解云。秋冬生者爲妙。

喜忌篇云。庚申時逢戊日。名食神干旺之方。歲月犯甲丙卯寅。此乃遇而不遇。補曰。此段舊註。謂專旺食神格。而或者又謂合神格。亦通。蓋合祿格。原係戊日庚申時。癸日庚申時。二日食神合祿。喜忌本同。

舊賦云。此格六戊日生者。以庚申時。虛合卯中乙木爲官星貴氣。若四柱中丙甲爲殺。卯爲官。丙爲梟。庚寅冲申。及巳字刑申。則壞了貴氣。此乃遇而不遇。若生秋冬之月。身財兩旺。又不犯官殺刑冲破害及梟。則富貴非輕。故曰純粹。主大貴。填實減大半。

古歌云。申時戊日食神奇。最喜秋冬福有餘。丙甲卯寅來尅破。遇而不遇主孤貧。六癸日爲主。喜逢庚申時。合巳中戊土。癸日得官星。若四柱中有戊字。並巳字。刑壞子申時。或丙字。及傷庚申時。則減分數。歲君大運亦然。又曰四柱中原無官星。方用此格。

壬午 己酉 戊午 庚申 史春坊之命

壬申 辛亥 戊寅 庚申 鄭知府之命

丙申 庚子 戊申 庚申 吳知縣之命

癸酉 乙丑 癸丑 庚申 和同知之命

### 曲直仁壽格

楠曰。曲直仁壽格者。如甲日干。地支寅卯辰俱全。便得東方仁壽之氣。故又曰仁壽。此格屢驗。大畏庚申辛酉字。冲破東方秀氣。雖天亦貴。八字清純。吾見此格。亦不畏其寅卯辰字太多。及不畏壬癸生木之類。只怕申酉庚辛破格也。只要寅卯辰三字全。方作此格。若有申酉一字破之不吉。

格解云。此格日干甲乙木。地支要寅卯辰。或亥卯未全。無半分庚辛之氣。行運喜東北方。用此怕西方運。更怕刑冲。

李總兵造 甲寅 丁卯 乙未 丙子

詩曰。甲乙生人寅卯辰。又名仁壽兩堪評。亥卯未全嫌白帝。若逢坎位必身榮。  
碧淵賦云。亥卯未逢於甲乙。富貴無疑。又曰。木全寅卯辰之方。功名自有。

壬寅 甲木生臨寅卯辰

癸卯 臨川机橋丘普 楠 木全類相喜全仁

甲子 一公木全類相 曰 時逢財庫爲休倚

戊辰 南逢生財大異人

甲木生卯。木神純粹。地支稟全東方。一片秀氣。又喜有財透出。身旺。用時上偏財。極好施捨恤孤。其格明矣。有一甲



申日干者反貧。蓋爲有申金。能破東方秀氣。不知者反以此爲美。蓋不知有此格也。入申運死。破木明矣。

### 稼穡格

楠曰。稼穡格者。蓋取戊己日干。見辰戌丑未。及巳午未字多。若四柱無官殺。則用此格。但丑辰戌月。四柱純土無木。尅者多。從此格。運喜南方火土之地。及行西方金制木之運。多富貴。見木運尅破稼穡。必死。其妙載在見驗稼穡類。戊己日生未月太旺。則不入此格。但辰戌丑月土弱。方作此格。

格解云。此格日干戊己。地支要辰戌丑未全。無木尅制。有水爲用。方成此格。運喜西南。忌東北。

張真人造 戊戌 己未 戊辰 癸丑

詩曰。戊己生居四季中。戊辰丑未要全逢。喜逢財地嫌官殺。運到東方定有凶。

一說東方官運。北方財運。俱忌。故曰嫌之。東北更怕刑冲。

碧淵賦云。戊己局全四季榮冠諸曹。

壬午

己臨丑月土重。

癸丑

撫城張華二公

楠

寒土堪全稼穡功。

己丑

富命土全稼穡

曰

有木微微夾作病。

戊辰

運行金地主財豐。

己土生臨十二月。日坐土垣。四柱純土。且土氣寒。堪作土全稼穡。賴辰時微有水氣。暗來損土。豈不爲病乎。早行東

方甲寅乙卯二運。提出辰中乙木來尅稼穡之土。深爲不利。運到丙辰丁巳戊午己未。衰土喜見生扶。財發數十萬。緡。再行庚申辛酉壬戌。尅盡辰中乙木病神。富蓋一郡。行亥會木局方死。老壽五福。本自然也。有一命壬午癸丑己丑己巳。蓋緣己丑合成金局。只作傷官。不作稼穡。且貧而患耳聾疾。只作庸醫。蓋爲傷官行財衰運也。

### 炎上格

楠曰。炎上格。丙丁生寅卯月。得寅午戌全。則爲火虛有焰。畏水破格。亦畏火氣太炎。則火不虛矣。畏金水破火破木。此格略驗。

格解云。且如丙丁二日見寅午戌全。或巳午未全亦是。忌水鄉金地。喜行東方運。怕冲。要身旺。歲運同。

張太保造 乙未 辛巳 丙午 甲午

詩曰。夏火炎天焰焰高。無水方知是顯豪。運行木地方成器。一舉崢嶸奪錦袍。

碧淵賦云。寅午戌遇於丙丁。榮華有日。又曰。火臨巳午未之域。顯達之人。

### 潤下格

格解云。且如壬癸日。要申子辰全。或亥子丑全是也。忌辰戌丑未官鄉。喜西方運。不宜東南。怕冲尅。歲運同。詩曰。天干壬癸喜冬臨。更值申辰會局成。或是全歸亥子丑。等閑平步上青雲。

萬宗仁造 庚子 庚辰 壬申 辛亥

碧淵賦云。壬癸格得申子辰。福優財足。又曰。水歸亥子丑之源。榮華之客。

## 從革格

格解云。且如庚辛日。見巳酉丑全。或申酉戌全者是也。忌南方運。若庚辛旺運則吉也。

詩曰。金居從革。貴人欽。造化清高。福祿深。四柱火來相混雜。空門藝術漫經綸。

碧淵賦云。庚辛局全巳酉丑。位重權高。又曰。金備申酉戌之地。富貴無虧。

楠曰。從革格。謂庚辛日。見申酉戌全。或巳酉丑全。此多剝雜。原非純粹可觀。與壬癸潤下格理同。此二格吾見多矣。未嘗有富貴者。但當以別理推之。止有曲直稼穡二格。多富貴。火全巳午未格。亦未見其美。由是尊其所正。而闕其所謬也。

## 年時上官星格

楠曰。年時上官星格者。蓋虛官用之多貴。喜財以生之。或年上日支下亦用。但月上正官。世無可用之理。其理載下文。人命見驗時上官星類。原官星虛。尤畏傷官尅之。時上財庫格。如壬癸日見戌時。如癸日或又作時上財官格。蓋喜虛財。旺鄉富貴。

纂要歌曰。年上官星爲歲德。喜逢財印旺身宮。不逢七殺居官位。富貴榮華比石崇。

辛酉

癸臨酉月本無爲。

丁酉

臨川曾元山御史貴

楠

秀氣財官喜在時。

癸卯

命時上財庫官星格

曰

時上虛官真可用。

壬戌

必能平步上雲梯。

癸水生酉。偏印本非用神。蓋得戌時財官之庫。然酉月火土極衰。喜財官輕而為病也。又得卯中乙木。暗來損土。其病重而其明也。病重名大貴。喜年上有酉金。能破去卯木也。書云。格中如去病。財祿兩相隨。所以運行癸巳。會起金來。破去卯中乙木病神。聯登科甲。御史權尊。宜矣。運入寅卯。木來乘盛。尅我虛官。隱而不仕。其知幾乎。凡月上正官。無可用之理。時上虛官。則有可用之理矣。

乙巳

庚金身旺透官星。

乙酉

大源楊洪六公富命金

楠

金氣微輕木火盈。

庚午

火相停時上官星之格

曰

辛巳庚辰金運補。

丁亥

當年財富顯馳名。

庚金酉月。雖日極旺。然金亦喜旺。不宜火太過。制其精銳也。只喜巳中有金合局。所以金得乘旺也。然有三火三木。似木火氣過盈。金氣頗不足。行辛巳庚辰戊己運。興財富。有乙亥年人。只多了一亥字。則為金不足。木火過多。一生貧苦。吾都王豕一命也。

丁丑

金頑遇火貴無疑。

己酉

金鷄黃希憲貴

楠

火少金多理最宜。

庚申

命年上虛官格

曰

官弱最宜官旺地。

辛巳

少年平步上雲梯。

庚生酉月。金水旺矣。巳中雖有丙火七殺。申宮壬水去之。止留年上一點虛官。有可用之理。然官弱最宜官旺運所以貴也。若金衰行南方亦不貴。說在前。

### 從化格

楠曰。從化格者。書云。得化得從。顯達功名之客。但六陰日主。身弱多作從化。多主富貴。如乙日干見庚辰時。地支或全巳酉丑。或見辰戌丑未四字多。亦作乙庚化金看。行西方富貴無疑。一見丙丁運。破金即死。說見下文見驗。從化格類。六陽日干不能從化也。

格解云。十干化合論。淵海十段錦當參考。

賦云。古人論造。先論從化。從化不成。方論財官。財官無取。方論格局。若從化成局。則富貴備矣。

甲己化土從木。乙庚化金從火。戊癸化火從水。丁壬化木從火。丙辛化水從火。論化之格。化之真者。名公巨卿。化之假者。孤兒異姓。逢龍即化。飛龍在天。利見大人。

宋蕭丞相造 癸巳 丁巳 癸酉 戊午

此乃戊癸化火之格。又戊癸化火。生於十月不得令。又一命癸亥癸亥癸亥戊午。貧乏貨藥。

古富貴造 甲戌 丁卯 壬寅 甲辰

此乃丁壬化木之象。得令。又寅卯辰全。

方狀元造 辛亥 辛丑 丙子 己亥

此乃丙辛化水之相。

宋章丞相造 丙戌 庚寅 辛巳 甲午

此乃丙辛從火。妻從夫化。

張主事造 己未 丙寅 丁巳 壬寅

此乃丁壬化木之相。

李知府造 丁酉 丙午 丁巳 壬寅

此乃丁壬從火。夫從妻化。

又一賤命 甲子 丁卯 壬申 乙巳

丁壬化木。二月得令。惜乎巳申類金。化木不成。支元刑壞。

四言獨步云。十干化神。有影無形。無中生有。禍福難憑。

此言化合不可專憑也。

元理賦云。不化不從。淹留仕路之人。得化得從。顯達功名之士。化成祿旺者生。化成祿絕者死。此言化合當參考也。補曰。蓋化成造化。要行木局。祿旺則發。如丁壬化木。月令喜寅。或行東南方運則發。餘倣此例。化成造化。最怕行祿馬衰絕之鄉。如戊癸化火。行水鄉。丁壬化木。行金鄉。輕則罷職。重則喪生。

辛亥

戊逢癸化火神高。

癸巳

臨川陸江副使

楠

巳午根通火局牢。

戊午

貴命化火畏水

曰

亥巳本來爲我病。

丙辰

東方木火顯英豪。

戊午生巳月。干通火局。喜癸水貼身。戊從癸化。用火有情。又喜丙辰時。有火透出。用火無疑。更得亥中有壬。微來破火。病在此矣。此爲火不足之象也。運行東方。聯登黃甲至副使。蓋得殺旺。暗生丙火也。原雖有殺。被庚尅之。殺印病衰爲病。所以東方殺印。兩顯其貴。此乃大運入子。冲破午中丁火而死。破格破印明矣。若柱中無水火多。則北方不畏。因原帶水也。

丁巳

乙木生逢金局全。

癸丑

盱江傅弼王公富

楠

乙逢庚化透天元。

乙酉

命乙庚化金之格

曰

西方金運誇豪富。

庚辰

見火傷金壽不堅。

乙木無根。生丑月合成金局。且時上庚金透出。乙木捨命從庚。大運喜入西方。純金之地。財富甲鄉。一入甲木暗損金氣。退悔退財。一入丙運。丙火尅庚。傷損金神。死矣。雖無金局。若有辰戌丑多生金。亦入此格。

### 夾丘拱財格

楠曰。夾丘拱財格。但癸酉日癸亥時甲寅日甲子時。作此格。癸酉日夾戌中丁火。戌土為財官。地支有酉亥二字。夾住戌。不能走出也。如甲寅夾丑中財官。有子寅二字。夾住丑字。不能走出。若冲刑日時。則不能夾也。亦要地支字多。方夾得牢固。餘日干作不得此格。

格解引詩曰。己卯相逢己巳時。黑雞得遇水猪奇。金馬木猴相見後。夾丘財庫福相隨。

舊註云。己卯日己巳時。夾辰字水庫為財。癸酉日癸亥時。夾戌中火庫為財。庚午日甲申時。夾未中木庫為財。拱祿相似。不要填實虛位。怕冲月時。或冲日干七殺。

楠曰。財怕空亡。戊亥為甲子旬中空亡。癸酉係甲子旬中日辰。難拱空亡之財庫。前既論其不可以拱貴。此豈能拱財乎。或曰。拱祿為拱天乙貴人。然辰戌名為邊鄙惡弱之地。天乙不臨。謂之拱貴人。愈見其妄矣。庚午日甲申時。此拱財支拱而干相尅。亦牽強。故淵源詩歌。原無此拱。拱日墓丙午申未中乙壬子壬寅丑中辛此載淵源末。

丙辰 辛卯 癸酉 癸亥 張尙書之命

庚戌 戊子 癸酉 癸亥 金丞相之命

甲子 癸酉 癸酉 癸亥 柳總管之命

### 歲德扶殺格

楠曰。歲德扶殺格者。如四柱日主旺健。見年歲上殺星透出。或多假此殺。以作威權。四柱八個字。以年上官殺為一年之令。其殺比日時不同。若年上天干地支。俱有殺。再加時日有殺。多作殺重身輕。宜行制殺運。如年上殺輕。亦



宜殺旺之地。輕重不同。斟酌在人也。

補曰。先以歲德扶殺言之。淵海註曰。且如甲日見庚年是也。正如年爲君位。日爲臣位。臣得君權。又如年爲祖。日爲己身。年殺有制。則上祖曾爲要職也。

纂要歌曰。年上偏官爲歲殺。食神印綬福興隆。不會官星財旺地。雁塔顯名有路通。

古歌曰。歲德壬來見戊年。財旺身強祿自然。更得運來財旺地。文章聰慧更忠賢。

問扶殺格。格解所收詩歌。喜柱連財旺生殺。纂要所載喜食神印綬制殺。化殺格同。而辭意不同何也。蓋身強殺無根。喜財旺生殺。不宜言制。故曰元犯鬼輕。制却爲非。身弱殺有根。喜食印制化。不宜財生。故曰殺旺有制。却爲貴本。二者各有攸宜。論者當輕重較量。說詩者貴以意逆志。

### 又補歲德扶財格

淵海註曰。且如甲人見戊己年是也。若財命有氣。則主其人得上祖物業。身弱者不近祖也。故曰。年上財官生於富貴之家。須要身旺。可以當之。

### 專財格

纂要云。如甲日見己巳時。乃專財格。最喜見財官旺鄉。發福發貴。不宜見比劫分奪。故歌曰。日時秀氣最難尋。甲日己時福衆臨。惟怕比肩分奪去。資財成敗是非侵。此即時馬格。名異而理同。如庚辛日生寅卯時。壬癸日生巳午時。丙丁日生申酉時。戊己日生亥子時。皆專財格。格解所收古歌。與纂要辭異而旨同。但所收舊註解牽強不可從。

## 日德格

舊賦曰。日德有五。日甲寅丙辰戊辰庚辰壬戌是也。其福要多。而忌刑冲破害。惡官星。憎財旺。加臨會合。懼空亡。而見魁罡。此數者乃格之大忌也。喜行身旺運發福。大抵日德。主人性格慈善。日德若多。福祿豐厚。運行身旺。大是奇絕。若有財官加臨。別尋他格。正能免非橫之災。若旺氣已衰。來尅魁罡。其死必矣。或未發福。運至魁罡。亦生禍患。一脫於此。必能再發。

古歌云。丙辰切忌見壬辰。壬戌提防戊戌臨。日坐庚辰畏庚戌。甲寅還且慮庚辰。

補曰。此言四柱及行運。不要見魁罡惡宿也。丙辰日主。忌見庚辰魁罡也。

又曰。日德有殺喜身強。不喜財星官旺鄉。爲性溫柔更慈善。一生福壽喜非常。

註曰。此格忌刑冲破害。亦不要見官會合空亡之地。喜行身旺發福矣。如甲午壬申壬戌壬寅。若四柱中有財官。當以別格論之。若行魁罡運大忌。

補曰。日德格有五。甲寅戊辰丙辰庚辰壬戌日也。何以見其爲德也。不考原委。不詢來歷。誤以日德名之。此不是子平中之謬說乎。

## 日貴格

古歌曰。金遇豬雞癸兔蛇。刑冲破害漫咨嗟。纔臨會合方爲貴。晝夜分之始乃佳。

舊註曰。天乙貴人。甲戌兼牛羊之類。止有四日。丁酉丁亥癸巳癸卯日。最怕刑冲破害。及空亡魁罡。運若行三合連。

可發如歲運刑冲破害。則貴人生怒。反成其禍。經云。崇爲寶也。日生宜日貴。癸卯癸巳。夜生宜夜貴。丁酉丁亥。方始爲貴。

鷓鴣天云。丁亥無冲癸卯星。丁酉癸巳定豐盈。貴人會合官星顯。馬列門排富壽增。財滿庫。廩盈庭。清名標寫得升騰。爲人正直無私曲。稟性忠良如秤平。

楠斷曰。日貴格。如甲戌兼牛羊。乙巳鼠猴鄉之類也。焉有斯理。雖曰天乙貴人。日主臨此貴人之上。或作日貴。命其休咎。然貴人之說。名有數端。原取名之不據理出。卽與丑日生小兒。諸多關殺。妄謬之說同。雖曰日主臨之。不論財官印星。獨以貴人爲主。甚爲虛誕。且原立諸多貴人之說。只是飄空而立。不根理出。豈可信乎。六乙鼠貴格。亦同此例。鑿說無疑也。

### 魁罡格

古歌云。壬辰庚戌庚辰日。戊戌魁罡四坐神。日上加臨重柱內。運行身旺作文臣。聰明果斷慈祥少。刑殺財官大可曠。一位魁罡居日上。冲多定是小人身。刑則頻頻窮徹骨。財官旺運禍來侵。魁罡四日最爲賢。疊疊重逢掌大權。身旺運行乘旺運。財官旺處禍連綿。

舊註曰。此四柱中。疊疊逢之。如甲寅年戊辰月庚辰日庚辰時。當掌大權之命也。若四柱只有一位。疊疊冲之。則多值刑害。困窮而已。運行日主旺。發福百端。行財官之運。其禍立至矣。

楠斷曰。魁罡格。取壬辰庚戌庚辰戊戌。臨四墓之地。取其爲魁罡。能掌大權。並不以取論。何以臨此四墓之上。就能

掌握威權。此亦子平書之大謬也。

### 六壬趨艮格

纂要云。此格以六壬生寅時。並寅字多者。又謂之合祿格。壬祿在亥。寅與亥合。柱中不宜見刑冲破害。乃可掌大權也。運行申則壞寅字。則降官失職。亦能生災害竊盜之事。亦不要見亥字。故曰六壬趨艮。逢亥月者貧。

古造如 壬寅 壬寅 壬寅 壬寅 方爲大貴

古歌云。壬喜逢寅庚喜辰。雲龍風虎越精神。支干重疊無冲破。知是清朝食祿人。

又曰。壬日寅時爲貴格。此爲趨艮福非常。大怕刑冲併尅破。歲運相逢有禍殃。

楠斷曰。六壬趨艮。謂用寅中甲木能合己土。爲壬之官。謂用寅中丙火能合辛金。爲壬之印。俱是無中生有之說。吾

恐謬也。大抵與前拱祿飛天祿馬之說。相爲表裏。此說尤非。故以謬名之也。

### 六甲趨乾格

星命統宗云。且如六甲日主。柱中要亥字多。乃爲天門之位。爲北極之垣。甲木賴之長生。人以甲日生亥字多者。自然富貴矣。亦忌巳字冲之。又忌寅字。亦可作合祿。

新安伯造 戊辰 己亥 甲子 乙亥

補曰。觀此造有戊己。則此格不忌財也。可見古歌有歲運若逢財旺處。官災患難起來尋之說。何也。蓋天干甲字多。忌見財。天干透印綬。會印局不忌財。故曰六甲趨乾。透印綬爲佳。財星疊見。位列名卿。又曰歲運逢官財旺處。

官星申子共來齊。要看忌喜何如。故曰忌喜能分禍福自見。

補斷曰。六甲趨乾。謂亥上乃天之門戶。謂甲日生人臨此。謂之趨乾。假如別日干生臨亥上。何以不謂之趨乾也。然天門亦只好此六甲日主來趨也。然天體至圓。本無門戶可入。然乾乃西北之界。類天門之戶。豈可論人之禍福乎。此說是子平之大謬也。

### 勾陳得位格

統宗云。且如戊己日生。值亥卯未木局爲官。申子辰水局爲財是也。正是戊寅戊子戊申己卯己未己亥日主是也。忌刑冲殺旺。則反生災矣。歲運同。

丁都督造 丁亥 丁未 己卯 戊辰

古歌云。勾陳得位會財官。無冲破命必然端。申子北方東卯木。管教一舉拜金鑾。

### 玄武當權格

統宗云。且如壬癸二日生。值寅午戌火局爲財。辰戌丑未爲官。壬寅壬午壬戌癸巳癸丑癸未日是也。忌冲破身弱。歲運同。

李都司造 丙戌 壬午 壬寅 辛亥

古歌云。玄武當權妙入神。日干壬癸坐財星。官星若也居門戶。無破當爲大用人。

補斷曰。勾陳得位。以戊己爲勾陳。其一理也。得位謂其臨財官之地。若戊己身主不柔。則能任財官也。則謂之勾陳。

得位也。宜矣。若戊己氣弱。臨其財官大旺之地。或爲財多身弱。或爲殺重身輕。若以勾陳得位爲美。豈不謬乎。玄武當權。與此相同。故予並闢之。

### 財官雙美格

千金鑑沙條妙經云。六壬生居午位中。先要根源見水通。亥命未宮休帶殺。生平何處不春風。

補曰。此本爲六壬生臨午位。號曰祿馬同鄉。而格解輯入正官類。非也。又改經文休帶殺。爲休見尅。是以亥卯未。爲尅官之煞。則鑿矣。此煞乃干頭戊土之七殺。怕帶之反傷祿雜官也。又云六壬生午。以午中己土爲正官。若柱中無亥卯未木局。傷官之神。方爲貴推。不知四季喜忌不同。蓋壬午日生春生夏者。最忌亥卯未木局。春逆行比肩運。猶稍解。生秋者。雖爲印綬。能尅木遠害。不如不見之爲妙。在輕重斟酌。生冬亥月。純喜亥卯未。生子月者。次子刑卯。子亥水故也。何者。蓋古賦云。壬午癸巳二日。同一財官雙全美也。喜生秋冬。通金水月氣。忌生春夏。通木火月氣。值所喜則大貴。值所忌則反禍。由此觀之。如此二日生亥子月。正通水月氣。根源見水通之謂也。身臨祿旺。喜見財官。主富貴。故曰冬生則玄武當權。貴爲王侯。且祿頭上宜帶財官。天月二德。故壺中子曰。帶天月二德。則霞帔金冠。忌帶七殺梟食。故司馬季主云。祿要簡而不要煩。且要祿干不帶七殺。反傷不帶梟食。又洞玄經云。壬以亥祿。戊寅本非駕。又珞珠歌云。祿馬更有多般說。自衰自死兼敗絕。是壬午癸巳日生者。以亥爲值所喜者也。壬癸以卯爲貴人。宜帶合忌帶空亡。頭上宜帶財官。不宜帶殺刃梟。故醉醒子子平云。貴人頭上帶財官。門充驕馬。且貴人以未宮井鬼之合。爲家居出入之門三合。況未與午六合有情。喜忌篇云。四柱干支。喜三合六合之。

地。醉醒子云。六合有功。權尊六部。又喜亥爲合祿。故天乙妙旨云。君不見祿馬貴人無準托。考究五行之善惡。天元羸弱未爲災。地氣堅牢是歡樂。又珞璣子云。每見貴人食祿。無非祿馬同鄉。又理愚歌云。貴人落在空亡裏。祿馬背違如不值。是亥卯未乃壬午癸巳二日所深喜。而不可忌。正所謂惟有水木傷官格。財官兩見反爲懼者也。正所謂有病方爲貴。無傷不是奇者也。

吾邑王耕山命 己卯 乙亥 壬午 庚子

萬泉董正郎命 甲午 乙亥 癸巳 丁巳

皆生亥月。帶天德貴人。頭上戴財一戴官。皆不戴殺刃。但有傷官之神。現今通顯。正所謂通水月氣。值所喜則大貴也。

如此二日生春寅卯月。取傷官格。則文秀而不明。生夏干月。官星太旺。天元羸弱。又作亥卯未合局。則泄氣愈甚。如病人重負。何以當此財官。又頭上戴殺刃凶神會聚。雖曰水木傷官。喜見財官。何益也。雖有貴人。失祿失時失勢。何益也。觀古造。

己酉 丙寅 癸巳 庚申

此癸水身弱。又在春月。傷官泄氣。年干頭帶殺。常有腸毒之病。

古謝五郎造 乙酉 壬午 壬午 癸卯

年頭上帶傷官。居祿於卯。貴人頭上帶刃箭。天元羸弱。死於圈圍。

又一古造 癸卯 乙卯 癸巳 癸丑

行辛亥連。梟透。併亥合傷官木局。不祿。

戊申 丙辰 壬午 乙巳 吾邑有此造

年頭上帶殺。十四歲行戊午運。年頭又帶殺官混雜。遂死。

又一造 庚申 戊寅 癸巳 丙辰

生春寅月。正水木傷官泄氣。二歲行己卯運。運干頭帶殺。而又傷官旺地。遂死。此五造正所謂通木火月氣。值所忌。則反禍之謂也。

如生秋申酉月。則爲印綬格。金旺水生。木死不能尅土。固然亦忌傷官。併干頭帶殺。

吾邑有一造 壬申 己酉 癸巳 癸丑

月干頭帶殺。四十九歲行甲寅東方傷官運。雙目失明。雖秋亦忌傷官也。

又一造 甲申 癸酉 癸巳 甲寅

不帶殺。雖巨富。因年時干帶傷官。福祿無功名。又壬午癸巳二日。於亥卯未傷官木局。四季有忌有不忘。有喜有不喜。豈可以四季均爲見亥卯未非貴推哉。作沙條經者。誠遽於理學。欲以發淵源之所未發。以破後人之疑。而後人反疑之。誤矣。

又如帶殺有制伏去留。則不在此限。宜輕重較量。棄命從殺。身弱無根。而殺不帶透於干者。不在此限。



古丞相命 丙戌 壬辰 壬午 庚戌

地支純土七殺太旺壬水無歸得從其殺且運行南方火土鄉位至宰相至丁酉運辛巳年類成金局扶得身旺與殺爲敵遂薨。

附補天乙妙旨註解曰凡人命有祿馬貴人固有富貴而吉亦有貧賤而凶是皆無準托也何者蓋考究祿馬貴人頭上帶財官三合六合生旺進氣是謂五行之善善則富貴而吉頭上帶殺梟刑冲破害衰絕無氣是謂五行之惡惡則貧賤而凶若壬午癸巳癸未坐財坐官柱中隱顯太旺是謂天元羸弱故曰官星太旺天元羸弱之名財爲養命之源官乃扶身之本宜享福榮是未爲災也夫五行善則地氣堅牢卽身旺之謂也身旺財官爲我用富貴權樂而有餘也五行惡則地氣不堅牢不堅牢卽身弱之謂也身弱則不能勝財官貧賤憂戚而不足也。

### 拱祿拱貴二格

喜忌篇云拱祿拱貴填實則凶。

補曰祿謂臨官之祿貴爲官星之貴非天乙貴人之貴也格解謂又一說拱祿是拱財星也拱貴是拱天乙貴人也非也拱祿有五五祿中皆無財何以爲之拱財拱貴有五雖四日之拱內亦合看天乙貴人而甲申日與甲戌時則拱酉貴酉乃丙丁貴人而非甲之貴人也官星與貴人拱拱在內更妙但不可以拱貴牽強爲拱天乙貴人也如癸亥日與癸丑時癸丑時與癸亥時皆拱子中癸水爲祿丁巳日與丁未時則拱午中丁火爲祿己未日與己巳時則拱午中己土爲祿戊辰日與戊午時則拱巳中戊土爲祿此五日五時而拱祿格如甲申日與甲

戊時則拱酉中辛金爲官貴。甲寅日與甲子時。則拱丑中辛金爲官貴。戊申日與戊午時。則拱未中乙木爲官貴。乙未日與乙酉時。則拱申中庚金爲官貴。辛丑日與辛卯時。則拱寅中丙火爲官貴。此五日五時。爲拱貴格。此二格純粹者。大貴。喜身旺印綬傷官食神。忌刑沖了日時拱位。又怕四柱中有傷日干七殺。皆拱不住祿貴。又怕四柱中見祿見貴。謂之填實則凶。蓋此二格者。只宜虛拱。如器皿空則能盛物。實則不能容物。所以填實則凶。亦忌祿貴落空。

鷓鴣天云。甲寅甲子丑貴鄉。戊辰戊午祿中藏。刑沖填實空亡遇。禍患官災不可當。無官透。始榮昌。青霄在路把名揚。定持權柄三公位。衣紫腰金拜聖王。

問三車既云喜傷官食神。而古歌又曰。怕傷官在月支。何也。格解雖收此二說。而未言其喜忌不同之故。蓋有財印。則有傷官食神。景鑑云。無財印而不喜傷官。正此謂也。

格解云。癸酉日癸亥時。亦拱戌中戊土之貴。註不言及何也。

補曰。斯言失之矣。蓋癸酉日。係甲子旬中。甲子旬以戊亥爲空亡。既爲拱亡。則拱不住貴人。所以不取此日時爲拱貴也。蓋子平所謂拱祿拱貴。最忌天中殺。天中殺即空亡。有走貴人之說。則此日時。不可爲拱貴也。又何疑。

### 日祿歸時格

喜忌篇云。日祿歸時沒官星。號曰青雲得路。

舊註曰。此論歸祿格。要四柱中無一點官星。方用此格。號曰青雲得路。最要日干生旺。兼行食神傷官之鄉。可發福。

但歸祿有六忌。一則刑冲。二則作合。三則倒食。四則官星。五則日月天元同。六則歲日天元同。犯此六者。不可一例以爲貴矣。若時支有祿。年月支亦有祿。謂之聚福歸祿。主大貴。如甲子丙子癸丑壬子。此是張都統命。乃子多爲聚福歸祿矣。

四言獨步云。日祿居時。青雲得路。月令財官。遇之吉助。

補曰。日祿居時者。蓋言甲乙祿在寅卯時。丙丁日祿在巳午時。戊己日亦祿在巳午時。庚辛日祿在申酉時。壬癸日祿在亥子時是也。柱中無一點官星。則發科甲第仕路亨通。故曰青雲得路。如月令有財有官。只以財官論。謂財官雙美格可也。遇祿在時。則祿助身旺。可以勝此財官。故曰吉助。是言助財官。非言財官助祿也。既曰忌見官星。何以曰官助祿。觀三車一覽云。歸祿只有七日。如乙日見己卯時。是偏財格。丙日見癸巳時。是官星顯露。辛日見丁酉時。是時上偏官格。此三日係歸祿格。可見月令有財有官。只當以財官格論也。則吉助謂祿助財官也。明矣。或者不悟。改月令財官而爲月令財神以求通。非也。格解照舊書財官誠是。

纂要云。有祿最怕官星到。

元理賦云。日祿歸時。見財則清高富貴。

四言獨步云。庚日申時。透財歸祿。名利高強。比肩奪福。

補曰。如庚日甲申時。乃干祿居申。時干透出甲木爲財星。非泛言年月二干也。如此則登科第顯功名。如拾芥。故曰名利高強。如年月干遇庚字爲比肩。則犯歲月同日同之忌。必分財減祿。而奪福也。

古歌云。福祿逢財名利全。千頭不忌透財源。身強無破平生好。大怕行來遇比肩。

又曰。青雲得路祿歸時。元命逢之貴且奇。四柱無冲官不至。少年平步上雲梯。

又曰。日祿居時格最良。怕官嫌殺喜身強。若見比肩分劫祿。刑冲破害最難當。

又曰。甲坐寅宮見虎鄉。祿星遙合主榮昌。運中若見庚辛酉。露出官星起禍殃。

又曰。時歸日祿祿興隆。切忌官星混在中。千頭帶合支帶破。少年獨步賽龍鍾。

鷓鴣天云。甲乙相逢寅卯時。日干歸祿福相隨。財多旺處聲名顯。死絕休囚信有期。安社稷。定華夷。青雲有路上天

梯。登金步玉承恩寵。雁塔題名到鳳池。

古賦云。日祿歸時。貴重爲人所敬。此言女命。須見財方可。

捷馳千里馬云。女遇傷官歸祿。遇之極吉。

### 四位純全格

補曰。子午卯酉四位全。雖主男女酒色昏迷。然而男有者尙吉。女終凶。故曰男犯興衰。女犯孤獨。寅申巳亥全。爲

四孟格。男命得之。主大富貴。故曰寅申巳亥。位至三公。女命得之。主心不定。故曰寅申互見以狂蕩。巳亥相朝心

不主。辰戌丑未全。爲四庫。男命得之。爲九五之尊。故曰辰戌丑未全。順行帝王無疑。女命得之多不美。故曰冠帶

互逢。定是風聲之醜。冠帶互逢。辰戌丑未全也。

洪範云。寅申巳亥。疊見。有聰明生發之心。子午卯酉重逢。懷酒色荒淫之志。辰戌丑未全備。乃財庫富貴之尊。此言

男命也。

淵源云。寅申巳亥全。孤淫腹便便。子午逢卯酉。定是隨人走。辰戌與丑未。婦道之大忌。此言女命也。

## 天元一氣格

四言獨步云。天元一氣。地物相同。人命得此。位列三公。

舊註解云。且如周益公命。庚辰庚辰庚辰。乃合此。又有四個己巳。四個戊午。四個乙酉。四個丙申。四個丁未。四個壬寅。四個癸亥。惟有四個辛卯。則貧天之命。其餘皆貴。又有四個甲戌。亦主破家。主人伶俐聰明。若行火鄉。稍可終不成大器。

天干順食格 地支拱夾格 兩干不雜格 一氣生成格

古歌云。富貴天干順食奇。地支拱夾少人知。兩干不雜須還貴。一氣生成世上稀。

舊纂要註解曰。如脫脫丞相命。壬辰甲辰丙戌戊戌。丙食戊而辰中戌中戊土皆爲食神。況壬食甲甲食丙丙食戊。此爲天干順食格也。如帖木遠太師命。甲寅戊辰丙午丙寅。寅辰夾卯字。辰午夾巳字。午申夾未字。此爲地支夾拱格也。如葉丞相命。庚寅戊寅庚寅戊寅。此謂兩干不雜也。如火午赤國公。癸亥癸亥癸丑癸丑。此謂一氣生成格也。

補曰。纂要日時原係俱癸丑。而格解改爲俱癸亥。非也。蓋年月同癸亥。日時同癸丑。干支皆北方水鄉。秀氣不雜。故曰一氣生成。若支干同癸亥。則是天元一氣矣。二格大同而小異。不然。上文既言天元一氣。而此豈有復言者。

哉。

又補曰。考諸五星指南。兩間不雜格。卽連珠格。故又謂兩間連珠格。觀甲子年乙亥月甲子日乙丑時。乃王侍郎造。庚辰辛巳庚辰辛巳可見矣。獨步云。八字連珠。二神有用。此之謂也。或改二神有用。爲支神有用。非也。

### 五合聚集格

指南舊註曰。或干辰帶三位。支神帶三位。納音帶三位。皆云三合聚集。假如乙丑年乙酉月丁巳日乙巳時。三個乙。謂之干三合。又如丙寅年庚寅月戊寅日戊午時。三個寅。謂之支三合。又如辛卯年木庚寅月木。丙戌月土。己亥時木。三個木。謂之納音三合。蓋以一生二。二生三。三生萬物。盈數之義也。按此二格。當看四柱用神喜忌。何如。值所喜則爲福。值所忌則爲禍。更看制化何如。

### 福德格

統宗云。陰土有三。己巳己丑己酉是也。四柱中不見丙丁寅午戌者爲貴。歲運皆同。若得己酉丑三合金局。全者尤貴。若運行見寅午戌。則降官失財矣。是非不免。忌刑冲破害。

詩曰。陰土逢蛇雞與牛。名爲福德號貔貅。秀氣火來侵尅破。須教名利一時休。

陰火止有三日。丁巳丁酉丁丑是也。四柱見財官旺位爲貴。不要見冲。如運行卯位。別無與酉合支干者。當減財降官矣。如辰與酉合。申與巳合是也。

詩曰。陰火相臨巳酉丑。生居酉月壽難長。更兼名利多成敗。破耗荒淫祿不昌。

陰水有三日。癸巳癸酉癸丑是也。卽與飛天祿馬同。其月生在巳。名爲月臨風。丑遙巳中戊土爲官星。如有巳字填實。故成敗多矣。譬如盛物之器。空則容物。實則不能也。

詩曰。癸巳癸酉月臨風。名物遲延作事空。名利生成難有望。始知成敗苦匆匆。

陰金。辛巳辛酉辛丑是也。四柱有丁火旺位。及寅午戌者。平生衣祿貧薄。若巳酉丑三合者妙。若遇丙丁則爲官星。歲運亦然。值寅者却爲吉。乃天乙貴人也。

詩曰。辛巳雞牛三位連。合作金局祿貴全。若遇丁火寅午戌。平生衣祿也熬煎。

陰木有三日。乙巳乙酉乙丑是也。不宜六月生。在他月皆以另格斷之。蓋六月建未。乃是木庫。乙干屬木。下帶金旺之地。金能尅木故也。以下尅上不吉。

詩曰。陰木加臨丑酉蛇。生居六月暗咨嗟。爲官得祿難長久。縱有文章不足誇。

淵源云。八月生人人短壽。後改爲六月俱通。參考可也。

## 神趣八法

### 類象

丁卯

春木支全寅卯辰。

甲辰

詩 格符類象貴非輕。

甲寅

曰 喜行坎地根深固。

甲子

身強敵殺在庚辛。

夫類象者。乃天地之一類也。如春生或甲乙天干。值地支寅卯辰全。無間斷破壞。謂之奪東方一片秀氣。至怕引至時上。爲死絕之鄉。謂之破了秀氣。運至死絕。卽不吉兆。或得時上。或得年引至生旺。謂之秀氣加臨。十分吉兆。更妙甲祿在寅。年透丁火。喜身強泄秀氣。精英於火矣。故曰。火明木秀。日主強。定作狀元郎。早行東方木運。實病其太強。而未遇涼劑。不遂宜矣。今遊坎地。根深蒂固。定作富貴之造。喜庚辛金涼劑。蓋頭。必符我先人蓋頭之說。身強而殺敵。衣紫及穿緋。木得金裁。廟廊宰輔。姑附此知命者鑒之。以俟後驗云。

### 屬象

夫屬象者。乃天干甲乙生。值地支亥卯未全者是也。

### 從象

夫從象者。如甲乙日主。無根。遇地支純金。謂之從金。若四柱純土。謂之從土。四柱純水。謂之從水。四柱純木。謂之從木。只有秀氣者吉。無秀氣者不吉。或天干再有甲乙字。或有根者不吉。其從木者。須得木旺乃吉。死絕地凶。

### 化象

夫化象者。如甲乙生人。在辰戌丑未月。天干有一己字。合甲字。謂之甲己化土。喜行火旺運。如見甲乙木生旺。運化不成。反爲不吉。八字中有二甲字。謂之爭合。有一乙字。謂之妬合。皆爲破格。

### 照象



照象者。如丙日巳午未年月日。遇時上一位卯木。謂之木火相照甚吉。如壬癸日申子辰全。遇時上有一位金。謂之金水相照。大言若年干有照者亦吉也。

### 返象

返象者。所謂值月令用神。引至時上一位爲之絕鄉。謂之用而不用。皆爲返運。返之太甚。則大不吉。

### 鬼象

鬼象者。乃秋生甲乙日。地支純金。謂之鬼象。要行鬼生旺之運則吉。怕見至死絕之鄉。又得身旺則不吉。

### 伏象

伏象者。乃寅午戌三合全。又值五月生。逢壬日而天干無丁字。壬水又無根。乃取午中之丁火。合壬水而伏之。所謂伏象。運至水火之地皆吉。只愁水旺之鄉不利也。

### 論大運

夫大運者。就月上起。譬之樹苗。樹之見苗則名。月之用神。則知其格。故謂交運如同接木然。論命有根苗花實者。正合此意。豈不宜哉。或甲乙得寅卯運。名曰劫財敗財。主尅父及尅妻破財爭鬪之事。行丙丁巳午運。名曰傷官。主尅子女。訟事囚繫。庚辛申酉七殺官鄉。主得名發越。太過則災病惡疾。行壬癸亥子。乃生氣印綬運。主吉慶增產。辰戌丑未戊己財運。主名皆通。此乃死法譬喻。須隨格局喜忌推之。其驗如神。不宜與太歲相尅。若歲冲運不吉。運冲歲則甚不利。歲運相生者吉。宜細推無不應驗。

## 論太歲

太歲乃年中天子。甚不可犯之。若犯之則凶。云日犯歲君。災殃必重。五行有救。其年反必爲財。如甲日見戊土太歲。是也。尅重者死。甲乙生寅卯亥未日時。犯尅歲君。決死無疑。有救則吉。大抵太歲不可傷之。犯歲者其年必主凶。要。是下犯上之意。加以勾絞元亡咸池宅墓病符死符白虎羊刃諸殺推之。干不尅歲。尤防運尅歲。亦如此不利。倘有貴人祿馬化之則吉也。

## 論格局生死總歌

夫格局。皆自有定論。今略具而述之。印綬見財行財運。又見死絕入黃泉。如柱比肩。庶幾有解。正官見殺及傷官刑。冲破害。歲運相併必死。正財偏財見比肩分奪。又見歲運冲合必死。傷官之格。財旺身弱。官殺重見。混雜冲刃。歲運又見必死。拱祿拱貴。刑冲填實。及日祿歸時。見七煞官星者必死。其餘諸格。並忌煞及填實。歲運併臨。此亦具其大概而言。一不可拘。二須敢斷。

## 五星論

### 金星論

夫金者。西方白帝之神。金天氏執矩司事。張晏曰。金爲義。義者成。成者方。方矩行。收斂之令。主肅殺之權。執性堅剛。春月見之。性柔體弱。常用日時坐命處。以生旺助其柔性。見木多則反成剋志。謂春乃青帝行權。木神用事。更加木盛。則金治之無力。所謂執力小而不能負重也。五行大論曰。水近木遠。尅其無門。火多則溫其性。煨其形。謂在

春月尙有餘寒之氣。而其本性正居柔之中。當貴乎火之煖氣也。水多則其性愈寒。其力愈熾。謂在春月性柔體弱。加以水增其寒勢。不能施鋒銳。然則惡乎水盛也。金見乃助其形。若無火徒加金鐵。反爲無用失類之狀。然則金能助形。又見火以煖之。土厚養其性。助其形。治其水。得其體白形剛。設使土盛亦不利焉。謂春月乃木旺時。土散塵飛。厚而不寒。當喜水去矣。夏月之金。性尙在柔。未執方。猶嫌死絕。貴乎旺相。見木助火。傷形尅體。謂夏月乃赤帝行權。火神用事。當是木槁無刑。併遇其火。則火性愈猛。故爲傷形尅體。若以見火多。却爲不厭。性溫體潤。肌膚土盛火暴。執方不能自化。展轉無剛革之威。時當夏月。土多則成滯金。助體剛形。飭自立。時有當權火氣。出乎自然變化也。秋日秋金當權乘勝。經曰金氣肅而彫萬物。木多則反傷斧斤。謂秋乃白帝行權。金神用事。時雖木死。琢之不難。謂有取而轉進退。則反費精神。五行大論云。猶石懸之畏貪。若靈龜之曳尾。金多愈剛。剛而必折。謂乃本性擅權。更加本形相助。失乎旺。旺則極。極則反於造物不耐扶。若琉璃火盛。可以成形。謂時當暴亂。須用物以制其暴性。性肅則形成。形成則可施鋒銳。有鋒銳可施。收斂之功。水潤體光。水白金清。精神銳秀。執性不剛。物無反惡。土盛生金。其性愈隆。物能稼穡。形有所執。物有所成。冬月之金。形寒性冷。水秀金柔。木多不能琢削之功。反成無用。水盛則金氣愈寒。謂冬月乃黑帝行權。水神用事。加之以水。則金寒水冷。不能執化。火多性溫體健。物當成器。鋒銳可施。時隆財相。金見聚氣。則形微氣盛也。土多制水生金。生不寒。體不懦。加之火助土厚。則子母俱有成物之功。可以成剛。可以成銳。吉無不利也。

## 木星論

夫木者。東方青帝之神。庖羲氏執規司事。張晏曰。木爲仁。仁者生。生曰員。故曰規。行生泰之權。持華秀之令。春月得之。漸有生長之象。孟春之令。猶有微寒。當用火以溫煖。則木無盤屈之拘。當有舒泰之美。纔當春木陽壯物渴。藉水資扶。益加秀茂。夏月之木。根燥葉乾。盤而且直。屈而已伸。水滋其形。而無槁朽。水病水死。救之無功。水生水旺。滋之有力。蓋謂衰不能救旺中之鬼也。又云。勺水不能生木。然用生旺。金多木能成器。時當赤帝行權。土養無水。潤成其木也。木助木以成林。徒逞鬱鬱之觀。終無結果之成。若居季夏。見金相成。時乃金相。得之以成形。謂金相能施功。可成琢削之象。秋月木氣漸寒。冷木漸彫。敗初秋之時。火勢未衰。猶喜東木以相資。仲秋謂木之到秋中。果已成實。葉已彫零。當用金以琢之。乃成物狀。秋深近冬。漸漸嚴氣。畏之以水。見水愈寒。喜之以火。見火溫煖。木並成林。則上乘而下滅。謂秋木成林。上乘者而禽歸之棲也。下滅者百草不能生也。冬月物藏伏時。氣已歸根。用多土以掩之。則根深蒂固。水多氣冷。根損形亡。謂時當黑帝行權。水神用事。正冰霜欲結。更加之以水。則根不能存。形必亡也。火見交加。却謂濟物。謂冬氣已寒。得火成溫煖之氣。則木之根。莖。吾知其無冷損之害。可以濟物。喻如寒木向陽也。

### 水星論

夫水者。北方黑帝之神。高陽氏執權司事。張晏曰。水爲智。智者謀。謀者重。故曰權。行嚴凝之令。主殺物之權。執性不定。決諸東則東流。決諸西則西流。春月之水。性濫滔淫。加之以水。更逢生旺。必有崩隄潰岸之勢。經曰。滔滔不止。必有自溺之憂。喜逢土止。而無泛濫之患。夏月之水。執性歸源。時當涸際。而無泛濫之患。謂夏乃赤帝主權。日炎

物燥。當用水潤。到此之時。若施一滴之功。可澤十里之潤。貴乎水助也。秋月之水。母旺子相。表光裏瑩。遇金助則子母俱和。而金白水清。謂秋金旺。金能生水。則水更遇相會。則曰子母和會。而金白水清也。冬月之水。其形得地。其勢得時。火氣滅而寒氣增。大寒凜凜。水結冰凝。水本不死。水結冰凝。而曰死也。遇火則增煖減寒。而性狀不凝。不結。謂冬水勢寒。更加水則愈冷。惟喜在於火木也。

### 火星論

夫火者。南方赤帝之神。神農氏執衡司事。張晏曰。火爲禮。禮者齊。齊者平。故曰衡。行炎陽之令。主成齊之權。生當春月。母旺子相。勢力並行。加以生旺。損物傷身。得以死絕。明晦繼傳。見木則愈加輝煌。抱薪救火。則火勢增炎。夏月之火。執力行權。輝輝則失之易滅。掩藏則可以無殃。見休囚乃曰成功不退。逢生旺謂之不息。炎炎火滅其勢。終無自焚之咎。木助其災。必主夭折。逢金無水。難成造物之功。有水有金。必作良工之巧。秋月之火。性息休休。終歸晦地。見生旺又似東行。逢死絕愈增晦昧。木助其體。晦而復明。土閉其形。內明外暗。土木或加光而且暉。晦而且明。謂秋火本晦。若見生旺。又加太陽東出之光。且死絕失之本暗。喜木生。惡土掩。若有土更有水。又爲喜。冬月之火。鬼旺身衰。韜光晦迹。暑氣絕而寒氣增。惡死絕而好生旺。遇木生則照燭而無晦。逢水愈滅其光。謂冬月寒氣增。則火死得木生。因之以成形。金多返慮旺成爲昌。謂火死難以施力。不利見金也。

### 土星論

夫土星者。中央黃帝之神。軒轅氏執繩司事。張晏曰。土爲信。信者誠。誠者直。故曰繩。居五行之中。行負戴之令。主養

育之權。三才五行。皆不可失。得高下而得位。居四季而有功。金得之鋒銳愈剛。火得之光明照燭。木得之英華越秀。水得之濫波不泛。土得之稼穡豐隆。旺之不息。必能爲山。散之不聚。必能爲地。用之無窮。生之罔極。土之謂也。

### 金不換看命繩尺

財官旺而日主弱。運行身旺最爲奇。日主旺而財官弱。運行財鄉名利馳。身旺比劫重。損財又傷妻。比劫逢梟食。妻遭產裏危。逢官官入墓。父死他鄉土。支干官鬼衆。兄弟最難爲。傷官四柱見。伯道老無兒。地支純財局。大富大貴不須疑。若行官旺運。納粟奏名賢。去官留殺者。威顯在邊夷。財旺暗生官。用賄求名利。棄印就財者。子立整根基。偏印反傷官。女人最須忌。刑夫併害子。且自守孤幃。傷官見官者。運喜入財地。名標龍虎榜。身到鳳凰池。比劫偏印格。傷官尅受制。姪男爲親嗣。義女爲偏妻。偏官制伏過。僧道守閑居。財多身弱者。溺水及漂屍。身旺而敵殺。衣紫及穿緋。虛邀併暗拱。早歲步雲梯。夾貴併六合。陶朱堪足擬。得一分三格。前賢皆掩蔽。此術莫輕傳。泄漏天之機。

### 不換金骨髓歌斷

甲日子提爲印綬。順行不似逆行高。官多殺盛東爲美。午未相逢總不勞。  
陽木天元值丑提。分明大運喜東西。發財發福多榮達。午未之中亦不宜。  
甲木生東值孟春。財多殺重定超羣。順行火地多難顯。逆走終爲富貴人。  
陽木春生值卯提。柱中有殺最爲奇。不拘逆順東南地。申酉相逢反不宜。  
甲木辰提喜有官。逆行東地弗爲權。順行南地多顛倒。除是根深富貴看。

陽木根深在巳月。柱中財殺喜相逢。逆行早歲聲名顯。順運須防夭壽終。  
甲木日干居午月。傷官木火喜生財。順行怕入西方運。東北行來更妙哉。  
陽木有根生六月。財官有氣福非常。逆行最喜東方運。惟恐初生壽不長。  
甲木無根值孟秋。財多殺旺恨身柔。運行順地遲方好。逆運須防夭更休。  
甲木酉提用正官。順行坎地必成權。逆轉南離官被制。須知祿盡見閻王。  
甲木戌提用財官。順運東南福更寬。若得柱中逢亥未。逆行名姓達金鑾。  
甲木生元值亥提。柱中有殺更爲奇。中年最喜東方運。午未之中數不齊。  
乙木生居子月中。更無官煞喜匆匆。逆行大運非常美。無殺無官逆運通。  
乙木提綱值丑宮。南方第一次西東。縱然名不登金榜。豪富終須比石崇。  
乙生寅月木傷官。財殺相逢更有權。順運連行多福祿。無財無殺亦貧寒。  
乙木提綱值仲春。財官有氣亦超羣。火金大運皆爲美。白手興家邁等倫。  
乙木辰提爲雜氣。西方大運亦爲高。若行戊運多顛倒。刑併人財壽不牢。  
乙木相逢孟夏時。運行東北始爲奇。柱中更值無根裔。順運終防壽不齊。  
乙木如逢午月天。食神有氣怕身輕。柱中若是根基薄。大運隄防喜逆行。  
未月生逢乙日干。柱中官殺亦爲權。順行西北傷元壽。逆走東南福更寬。

乙木生來值孟秋。財官印綬忌身柔。中年不許行西北。順運無如逆運通。  
乙木酉月殺多強。大運功名佐廟廊。若是有根尤更妙。南行火運又非常。  
乙生戌月多財殺。惟恐初年疾病生。若到中年多發達。不拘順逆總宜行。  
乙木居亥印生身。逆走西南富貴真。有殺有官猶喜順。到頭大限怕逢辰。  
丙火冬生值子綱。有印生身大吉昌。運入東南多發達。逆行難保壽年長。  
丙火如逢丑月看。土多格局作傷官。印多運入西方美。根淺東南福不全。  
丙多官殺值寅提。運入南方分外奇。若是官輕尤喜北。總然大運要行西。  
丙火日干卯提綱。干弱如逢喜火鄉。若是無官尤不利。却行身旺亦平常。  
丙火辰提戊己多。傷官火土更如何。逢財逢印多通達。南北相逢總不宜。  
丙火建祿日干強。官殺相逢大吉昌。順逆運行多發達。若行戌運有災殃。  
丙火午月作傷官。有殺當爲貴命看。金水運行多吉利。如行水地不爲權。  
丙逢未月傷官顯。官殺相逢未足奇。如得獨官爲貴氣。運行西北利名馳。  
丙火申提日主柔。得從得化始爲優。若從水位傷元壽。逆去東南福祿週。  
丙逢酉月火衰微。比劫扶身壽不奇。逆去東南爲背祿。順行水地始爲奇。  
丙逢戌月土重重。有殺無官迥不同。大運順行多富貴。若逢官殺亦中。



丙火亥提爲殺印。分明大運喜東南。中年富貴非常美。運若西方壽不齊。  
丁火如逢子月提。柱中有殺更無虧。平生最喜東方運。若到西方福不齊。  
丁火丑月事如何。四柱分明怕土多。運入東方俱發達。南方火地不相宜。  
丁火逢寅印綬明。柱中有水喜南行。運行北地尤通達。西方財鄉禍患生。  
丁逢卯月有印星。南北應多遂利名。獨殺若無官混雜。金章紫綬至公卿。  
丁逢辰月本傷官。順入南方福更寬。逆運初年多蹇剝。更逢戌亥壽相干。  
丁逢巳月本剛強。大運何愁入水鄉。運入順行初不利。中年最喜入西方。  
丁逢建祿本身堅。無水須防壽不全。若得運中逢七殺。姓名遠達九重天。  
未月逢丁要見財。無財到底命多乖。若逢財殺方爲美。西方大運更奇哉。  
丁逢申月日干強。大運南方喜逆行。若是根深尤喜順。中年發達更崢嶸。  
丁逢酉月用偏財。官殺相逢更妙哉。大運逆行多遂意。功名兩字稱心懷。  
丁逢戌月傷官旺。官殺雖多却不防。南與東方多順遂。榮華富貴福無疆。  
丁生亥月用官星。順逆東南福不輕。若是煞星多混雜。壽年尤恐半凋零。  
戊土日干生子月。坐支辰戌最爲奇。支虛更值財神位。運怕東兮又怕西。  
戊土丑月日干堅。更有財官福壽全。逆順運行俱得地。若無財殺亦徒然。

戊土寅月日干輕。殺印相生格局明。運入火鄉尤發達。逆行水地總平平。  
戊土卯月用官星。有印相生格局清。南運發財強北運。如逢酉地壽元傾。  
戊土辰月日干強。更有財星福祿昌。順運西南應發達。財官輕處亦非良。  
戊土巳提爲建祿。柱中財殺更爲奇。逆行大運宜東北。順走西南事不齊。  
戊土五月印當權。大運分明喜殺官。官殺重時宜順運。官輕逆運妙無端。  
戊土生來季夏天。若無財煞未週全。逆行更喜東方運。順逆財多亦不然。  
戊土生申用食神。有財有殺貴堪倫。逆行火地必通達。水地行來反受連。  
戊土生來值酉提。怕行坎水喜炎離。除非四柱元辰旺。卯運相逢最不宜。  
戊土戌月日干強。財殺重逢更吉祥。運氣不拘行順逆。若無財殺亦平常。  
戊土亥提財殺真。身強有火更超羣。逆行早歲須防酉。順運中年忌卯辰。  
己土子月用財星。有殺無官格局清。大怕柱中身太弱。順行寅卯早凋零。  
己土丑月日干堅。四柱分明忌比肩。若有財官併有殺。逆行大運福無邊。  
己土寅月值身柔。若是身柔命不週。身旺更行南運美。逆行運氣壽休囚。  
己土卯月殺當權。逆運須知壽不堅。順逆火鄉無極妙。官星相會不週全。  
己土辰提雜氣真。財官有氣定超羣。順行運氣尤當妙。逆運行時不十分。

己土巳月身尤旺。印綬傷官。格局清。身旺最宜財運。遇無財逆運亦相應。己土午月本身強。建祿分明。理更長。官殺輕時宜順運。官輕逆運亦榮昌。己土未月欣逢殺。刃殺相逢更妙哉。運氣中年多發達。不拘順逆稱心懷。己土申月用傷官。若是身輕必不安。所喜須宜行逆運。怕逢寅卯殺相干。己土八月辛金旺。若是身輕命不牢。旺喜順行衰喜逆。無財無殺不爲高。己土如逢九月天。財官兩旺福無邊。運行順逆皆平穩。發達之時在壯年。亥提己土用財官。身旺財官總是權。若是身柔欣順運。東方難保一平安。子月如逢庚日干。有財有殺始平安。西方不似東方運。午運如逢壽數完。庚金丑月有財官。格局分明雜氣看。木火柱無終不美。東南運氣遇爲權。庚金寅月日干微。土透天干命愈奇。逆運初年嫌子丑。順行大運怕逢離。庚金生值仲春時。官煞如逢命始奇。但嫌四柱元神弱。順運三旬恐殞危。庚金三月土重重。更有財官福祿豐。逆運固知強順運。中逢子地有災凶。庚金四月殺星強。有制方知殺伏降。若是無根又無制。其人多有少年亡。五月庚金喜有根。有根有水貴堪言。逆行大運宜東地。子字相逢總不然。庚金未月土旺地。戊己土重命無過。若是土輕行逆運。康寧福壽沐恩波。

七月庚金太剛。坐支若實亦平常。財官兩處宜行順。財殺輕時逆運強。  
八月庚金用刃星。柱中有殺最相應。有財無殺純金局。從革尤當顯姓名。  
庚金九月喜逢財。殺透天干亦妙哉。順命初年兼子地。逆行離巽有凶災。  
庚金十月日干衰。有土相逢亦妙哉。順運必然強逆運。中年惟恐有危災。  
子月辛金喜丙丁。若然無火亦平平。運行木火多通達。財殺多時喜逆行。  
辛金丑月宜丁火。戊己重重亦不妨。無火土多防壽夭。縱然不夭也平常。  
辛金寅月財官旺。大運不須喜逆行。若是無財行順運。中年惟恐喪殘生。  
卯月辛金如有殺。坐支有土更爲奇。順行逆轉名多顯。若到西方反不齊。  
辛金生於辰月中。有財有殺更和同。順行逆運多通達。富貴榮華福壽崇。  
辛金巳月官星旺。傷食全無亦不過。逆運但妨官字否。順行一路總蹉跎。  
辛金午月殺當權。四柱根深逆順堅。若是無根堪棄命。如行西運大連遼。  
未月辛金殺印全。印多尤似有虧偏。逆行木運多通達。順運初年畧不然。  
申月辛金金水清。傷官有殺最相應。坐支無酉方爲妙。運入東南顯姓名。  
辛金酉月日干強。財殺相逢更異常。逆運到頭多發達。順行水地未爲良。  
戌月辛金煞印全。柱中有制福無邊。逆行順去俱無阻。巳地相逢總不然。

辛金亥月若無官。水冷應知金太寒。若有官星又有殺。定應名姓到金鑾。  
壬水生逢子月天。無財無殺未週全。終身困苦多流落。縱到財鄉亦枉然。  
壬水丑月喜逢財。財旺身強更妙哉。運氣順行經水火。堪爲萬事稱心懷。  
壬水如逢寅月生。食神相旺亦相應。南方運氣增財帛。有殺終須播姓名。  
壬逢卯月傷官格。逆運無如順運高。殺透更加身旺處。功名富貴壽彌高。  
壬水辰月殺星強。甲乙相逢殺伏降。更得財星併印綬。不拘順逆亦相當。  
壬水生逢夏月天。財星官殺旺堂前。無根只怕初年失。若到中年福愈堅。  
壬生午月財星旺。亥水相逢更異常。若是無根多棄命。平生白手置田庄。  
壬水生逢季夏時。分明雜氣異爲奇。順行逆轉皆通達。卯地相逢總不宜。  
壬水生身爲殺印。有財有用亦相當。運行南地強如壯。卯地相逢命不長。  
壬水相逢八月天。分明印綬格當權。無官怕入財鄉運。有殺應須福愈堅。  
壬水生來值季秋。財多殺旺忌身柔。財居火地俱通達。遇木之鄉返不週。  
壬水亥提爲建祿。柱中有火運宜東。南方運氣俱爲美。若是無財亦不通。  
癸水冬生值子提。財官重見最爲奇。順行喜到東南運。逆走西方亦不宜。  
癸水丑提爲雜氣。無財無印不堪推。順行木火俱爲妙。逆運西南壽不齊。

癸水寅月木傷官。官殺重逢禍百端。北運不如南運好。若到申宮壽有干。  
癸水生來卯月中。無官無殺喜和同。順行南地多清貴。恐入西方壽早終。  
癸水辰月喜逢財。雜氣分明格美哉。若是無根身太弱。順行南運必多災。  
癸水巳提財更旺。官多不與殺相同。有根逆運多財足。順入西方早見凶。  
癸水生逢午月中。分明財殺格相同。無根運不行申地。棄水從財反有功。  
癸水未月殺星強。有刃無官祿位昌。運入東方經制伏。定看名姓列朝堂。  
癸水生來值孟秋。有財終不忌身柔。順行北運尤爲妙。若是無財反不週。  
癸水酉月印生身。有殺方爲格局真。逆運須知強順運。功名富貴又超羣。  
戊月如逢癸日干。分明雜氣用財官。運行木火多財祿。逆運初年壽有干。  
癸日生來亥月中。傷官水木總相同。逆行最妙南方運。順走須知忌卯凶。

上海文書局發行

當代名人尺牘

吳興 王文瀾選輯 全二冊 六角

著錄各名一家覽

梁任公 陳巢南 吳綱齋 朱劍芒 周仲穆 柳亞子 凌莘子 徐仲可 高吹萬 陳匪石 馮心俠 蔡心覺 歐陽竟無

章枚叔 馮君木 李審言 李鳳亭 邵次公 洪巢靈 徐希平 徐小淑 高天梅 傅鈍根 黃晦開 蔣觀雲 潘力山

章行嚴 廖季平 王大覺 沈穎若 姚鶴鏞 胡樸庵 徐病無 馬通伯 張揮孫 景毓華 葉中冷 劉今希 寶瑞區

章鉅卿 蔡鶴卿 古公愚 沙孟海 姜杏癡 胡寄塵 徐半夢 馬揚吾 陳叔伊 程子大 蔡原清 劉筱墅

尺牘雖小道出自名手便覺不凡本編所輯均係當代大文學家或議論時事或商量學問不特學識有異人處即行文亦俱有古文家法可作尺牘讀亦可作古文讀

各省中華書局經售

# 上海文書局發行

## 歷代名家尺牘

全八冊 二元八角

本編包括「周秦兩漢」「魏晉」「六朝」「隋唐」「宋金元」「明代」「清代」分訂八冊，均選名家之作，短長駢散，無體不備，各擅其妙。手此一編，可以悟文體之源流，文事之修飾；並附作者小傳，可以知人論世。全書八冊合購分購均可，名目列下：

周秦兩漢尺牘	一冊	三角
魏晉尺牘	一冊	二角
六朝尺牘	一冊	三角五分
隋唐尺牘	一冊	三角五分
宋金元尺牘	一冊	三角五分
明代尺牘	一冊	三角五分
清代尺牘	二冊	九角

各省中華書局經售



上海图书馆藏书



A541 212 0015 3435B

D022663

